

# SAN LUCAS

## Jesucristoen huadak hua'a Lucasa mo'nigmadoya'uyate.

**Huakkuruda Lucasa Teófilotaj  
o'nigmadoya'uyate.**

**1** <sup>1,2</sup>O'nigmadoya'ne, huadi'da Teófilo. Kenda Jesús o'kadhuahua'uyate kenpa'ti o'manmadika'onhuahua'uyate. Ken sue'da huakka'a on'tiahuayonhuahua'uyate. Ken Jesús huabo'a'da o'ka'uyate on'tiahuay'uyate. Kenpa'ti Diosba' on'manmadika'uyate. Nogomey on'peeonhuahua'uyate on'timadoya'uyate. Aya' kenda Jesús o'kadhuahua'uyate on'timadoya'uyate. <sup>3</sup>Kenda Jesús o'kadhuahua'uyate kenpa'ti Jesústaj on'timadoya'uyate a'nennada huakkuruda ijba'tiahuayonhuahua'uy. Daka'nada yoknopoeonhuahui kay. Konigepo do'huakon Jesústaj daka' e'timadoya'onhuahua'ta' ijpaki, Teófilo. <sup>4</sup>Kenda Jesústaj i'nigpeedeme'te buttida o'e kanopo'e'po daka'da on'nigmadoya'onhuahua'ne.

**Juan bautiza huamagka' o'si'po'e'apo.  
Ken Diosen huata'moneria  
nogiada ona'uyate.**

<sup>5</sup>A'nennada Romano gobierno huairi Herodes Judea huadaribayo o'uyate. Kenoka' sacerdoti o'epo

sacerdoti Diostaj kenda on'baa'po 'uhua on'nigbatiarakika'uyate. Zacarías sacerdoti o'uyate. Zacaríasere nogomey sacerdoti on'baa'ika'po on'teteyo' on'baa'ika'po kenomeyendik on'madikka'uy Abías. Zacaríasen huatoeen huadik Elisabet. Elisabeten adhuea'pane' Aarón o'uyate. Aarón huakkuruda sacerdoti huairi o'uyate. <sup>6</sup>Zacarías huatoe Elisabetere Diostehuapa' urunopo'da o'nika'uyate. Aya'da Diosen e'mana' on'nigpeika'uyate. Dakhuea'da ogka' be'api' bahuaahue'dik o'ne. <sup>7</sup>Elisabet si'popakhue'dik o'uyate kenpa'ti tone'nanada o'nepo huasi'po to'e'hue' o'nyate.

<sup>8</sup>Nogme'noetida Zacaríasomey konig sacerdoti Diosen jakyo baa'dik o'ne'uyate. <sup>9</sup>Konig sacerdoti ogkika' huidsipo' on'nenepo on'tiahuaydepo Zacaríasyo'da Diosen jakyo kuddik o'uyate. Konig 'uru'huieada vela a'bakpakaya'po Dios Huairitaj Zacarías kuddik o'uyate. <sup>10</sup>Ken Zacarías Dios Huairien jakyo o'epo vela 'uru'huieada o'bakpaka'depo jakkurute huakka'da aratbut ogkupopakdepo on'tiona'pakuyate. <sup>11</sup>Kenoka' Zacarías Dios Huairien huata'moneritaj o'tiahuay'uyate. Ken

kutopate 'uru'huieada vela e'bakpakte huada'kopen o'bo'uyate. Dios huairien huata'moneri kente o'bo'uyate.

<sup>12</sup>Zacarías o'tiahuaypo huakka' o'me'pu'kuyate.

<sup>13</sup>—Me'pukhue' yae', Zacarías.

Kenda Diostaj i'tiona'pakuynok Diosa mepee'uyate. O'nen huatoe Elisabet bokereksi'poa' o'si'popakapo kenpa'ti kentaj i'dikka'apone Juan.

<sup>14,15</sup>O'nensi'poa Diostaj 'uru'ada o'nigpeeapo konigepo durugnanada i'eaone. Kenpa'ti e'si'poe'te huakka'ada on'durugpakapo. Vino mayhue' i'taeapone. Kenpa'ti pisco'pi' mayhue' i'taeapone. Si'popakhued ee'ted Diosen Nokirega o'nopo'toeapo.

<sup>16</sup>Huakka'tada Israel aratbuttaj Dios Huairitaj huaknopoe' Juana o'manopo'korea'apo. <sup>17</sup>Cristo Huairitaj Juan huakkuruda o'eaone. Cristo tiakhued o'nensi'poa Juan huakkuruda o'eaone. Elíasen nokirega o'nopo'toeapo konig Elías teyda o'uyate konigti Juan teyda ka'dik o'eaone. Huaaj huasi'potaj on'bakkahuea'po on'manoeynoeyapo. Ken huayahuaa huaoa huasi'poa huadi'da on'maeapo. Kenda Juana o'ka'apo. Kenpa'ti nigpee'hue' huaje'eritaj o'manopo'korea'apo onte'ti on'nigpeeapo. 'Uru'ada on'nopoepo huadakda ogka'apo. Ken Cristo Huairitaj kanoknopoe'po Juana aratbuttaj 'uru'nopoa'da o'magka'apo. —Diosen huata'moneria Zacaríastaj ona'uyate.

<sup>18</sup>—Kenda ona'nig buttia' oknopohue'dik ijje. Huatone'da ijje, do'hued huatoekon huatone'da o'e. —Zacarías Diosen huata'moneritaj ona'uyate.

<sup>19</sup>—Do Gabriel ijje. Diosen huanaba' ijje. Diosa me'ta'mona'ne. Ontaj kan'batia'pake'po Diosa me'ta'mona'ne. Huadak hua'a kan'batia'pake'po Diosa me'ta'mona'ne. <sup>20</sup>Kenda

ona'denig'a buttia' oknopohue' o'enok a'pakhue'dik i'eaone. O'nensi'po e'si'poede'te onte'ti a'pakdik i'eaone. Kenoka' Diosa o'pak kenda yona'dey o'eaone. —Diosen huata'moneria ona'uyate.

<sup>21</sup>Kenoka' jakkurute aratbut ogkupopakpo Zacaríastaj on'nigepo ijhue'da Diosen jakyo o'enok aratbut on'me'puke'uyate. <sup>22</sup>Ken kenoka' Zacarías o'orokdepo a'pakhue'dik o'uyate. Diosen jakyo konig e'yorokyanig Diosa Zacaríastaj o'tiahuaya' kenomey aratbut on'nokotuyate. Ken Zacarías huaba'a o'tohua'yadhua'uyate. Ken a'pakhue'dik o'uyate.

<sup>23</sup>Ken ken huame'noete Diosen jakya' konig sacerdote o'baa'onhuahua'po o'kuhuitdepo hua'en jakyokon o'hua'uyate. <sup>24</sup>Nogok ke'nen huatoe Elisabet huabo'da bogdakhue' o'uyate. Konig o'iregunhuahua'po cinco puug jakkurute orokhue' o'uyate. <sup>25</sup>“Dakhue'da o'e. Si'popakhue'dik o'e.” Ken aratbut huaahue' me'neapone. Dios Huairia me'tinepahui'po in megka'ne. Elisabet o'nopoe'uyate.

**Jesússi'po i'toeapone. Ken Diosen huata'moneria Maríataj ona'uyate.**

<sup>26</sup>Ken Elisabet seis puug bogdakhue' e'ede'te Diosen huata'moneri Gabrieltaj Diosa o'ta'mona'uyate. Nazaret huakka' jakyo Galilea huadaribayo o'ta'mona'uyate. <sup>27</sup>Mune'yo Maríataj o'huahua'uyate. María katenohued o'uyate. Katopake'po Maríaen huaoa o'yokuy Josétaj. José Davidkudak huairien onaratbutyo' konig huayayo o'uyate. María hueretda toepakhued Gabriel o'huahua'uyate. <sup>28</sup>Maríataj o'huahua'depo,

—Ijtiaki, María, Diosa 'uru'ada megka'ne, onere o'e. Nog ettone'taj Dios sue'da huadak o'magka'nig'a

ontanayo huadaka'da megka'ne.

—Maríataj ona'uyate.

<sup>29</sup>Ken, Diosen huata'moneritaj o'tiahuaydepo o'peedepo ke'nen hua'ataj o'me'pukatupo, ¿Mena'po ken konig mena'ne? o'nopoepo María.

<sup>30</sup>—Me'pukhue' yae', María. Diosa metinepahui'po 'uruu'da megka'ne. <sup>31</sup>Bogdakhue' i'ēapone. Huabokereksi'poa' i'si'popakapone. I'dikka'apone JESÚS. <sup>32</sup>Huairi o'ēapo. Kentaj huakka'da o'noknopoēapopo on'nigpeēapo. Diosen Huasi'po on'dikka'apo. Dios Kurudiensi'po on'dikka'apo. Konig Davidkudak huairitone' huakka'da aratbuttaj o'mana'ika'uyate. Konigti Dios Huairi Jesústaj huairitone' o'yahuea'apo. Ken aya'da Israel aratbuttaj o'mana'onhuahuika'apo. <sup>33</sup>Ken Israel aratbuttaj o'mana'onhuahuika'apopo, batikhue' o'ēonhuahuika'apo. —Diosen huata'moneri Gabriela Maríataj ona'uyate.

<sup>34</sup>—¿Menpa' do ijsi'popakapo? Huabokerekere huedhued ijjej. —Maríaa Diosen huata'moneritaj ona'uyate.

<sup>35</sup>—Diosen Nokireg betihuarakapone. Kenpa'ti Dios teynanada o'ēpo konig e'sihuiā betibukapone, ontaj betibukapone. Konigepo kensi'po o'si'poēapo Diosya' o'tiakapo. Diosenyo'da o'kika'apo. Diosen Huasi'po o'ē. Aratbuta on'batia'pakika'apo. <sup>36</sup>Kenpa'ti o'nen huabet Elisabet huabokereksi'po o'si'popakapo. Ke'na huatone'nanada o'ēnok si'popakhue'dik on'batia'pakikame'te. Ke'na seis puug bogdakhue' o'ēde. <sup>37</sup>Diosnayo aya'da ka'dik o'ē. —Diosen huata'moneria ona'uyate.

<sup>38</sup>—Dios Huairien huanaba' ijjej. Ken konig ona'nig kenda Diosa megke'. —María ona'uyate.

Ken konig ona'depo Diosen huata'moneria okhua'uyate.

**María Elisabettaj bapa' puuga' o'toksike'uyate.**

<sup>39</sup>Kenoka' María atoksikeya'po o'huahua'uyate. Idada o'hua'po Judea ote'bayo o'hua'uyate. Ote' huakka' jakyo o'hua'uyate. <sup>40</sup>Zacariásen jakyo o'kudondepo Elisabettaj “Ijtiaki,” ona'uyate. <sup>41</sup>Kenoka' Elisabet Maríataj o'peedepo yobeda huakiokoya' o'tiarud'uy. Diosen Nokirega' o'nopo'toē'uyate. Elisabettaj o'nopo'toē'uyate.

<sup>42</sup>—Diosa aya' ettone'taj daka' mogkika'ne. Ontanayo 'uruu'da megka'ne. Kenpa'ti o'nensi'potaj 'uruu'da ogka'apo. <sup>43</sup>¿Be'a ijje do do'hued Huairied huayea' o'huatiakne? ¿Menpa' Diosa 'uruu'da megka'? <sup>44</sup>Ken huaboa'da ontaj “Ijtiaki,” ea'te ijpeedepo yobeda huakiokoya' o'durugpakpo be'tiarudne. <sup>45</sup>Dios Huairitaj iknopoepo durugda i'ē konigepo kenda Diosa mena'ne kenda megka'apone. —Ken Elisabeta Maríataj 'utta'da ona'uyate.

<sup>46</sup>Dios Huairi 'uruu'da o'ē huanopoya'da yoknopoey.

<sup>47</sup>Do'hued Dios Huairi do'taj huanopo'yarea'eritaj durugnopo'da ijjej. <sup>48</sup>Konigepo do'taj be'tiahuayne. Pai'da huanaba' eē'pi' daka' be'tiahuayne. Kenda nogok nogok aratbuta mo'batia'pakika'apone. Diosa 'uruu'da megka'nig. Kenda mo'batia'pakapone. <sup>49</sup>Ke'nendik 'uruda o'ēpo aya'da ka'dik o'ēpo konigepo 'uruu'da do'taj megka'ne. <sup>50</sup>Diostaj huakme'pukeritaj nogok nogok o'matinepahuika'po, Diosa o'matinepahuika'. <sup>51</sup>Diosa

teyda o'kika'. Nama'da 'uruda ijje y huanopog'eritaj kenpa'da o'maenapo. <sup>52</sup>Huairitone'taj o'maenpo pai'da aratbuttaj huairi o'bayahuea'. <sup>53</sup>Ken pai'da huae'eritaj huadakda o'bayokika'. Huakka'da huatoe'eritaj o'mata'mona'. Katepi' togehue'da o'mata'mona'. <sup>54</sup>Israel aratbut konig Diosen huanaba' e'huae'taj Diosa daka' o'matojika'po, okkahuehue' o'maepo o'matinepahui'ika'po. <sup>55</sup>Oro'en huapane'kudakomeytaj kenpa'ti Abrahamkudaktaj kenpa'ti aya'da ke'nensi'po ke'nen huayayo nogok nogok aya'tada "Ijmatinepahui'apoy" ona'uyate Diosa. Kenda o'kika'. Kenda Maríaa Elisabettaj ona'uyate.

<sup>56</sup>Ken Elisabetera o'unhuahua'uyate. Bapa' puug María o'unhuahua'uyate. Bapa' puug o'edepo hua'en jakyo o'kume'uyate.

#### Juan Bautista o'si'pog'e'uyate.

<sup>57</sup>Ken, kenoka' Elisabet huasi'popak o'edenok huabokereksi'po o'si'popakuyate. <sup>58</sup>Onteteyo' huahuaderi kenpa'ti Elisabeten huabet huae'eri on'mapeeundepo ken Dios Elisabettaj o'tinepahui'po yobed o'yoknok on'peedepo Elisabetera on'madurugpakuyate. <sup>59</sup>Yobed ocho huame'noe ee'te huabokereksi'poensi'dak kaktege'po konig judío aratbut ogkika'uyate, aktegya'po on'batiakuyate. Si'nontaj huae'ndik Zacarías e'dikkata' on'pakuyng'a.

<sup>60</sup>—Kae'. Ke'nendik Juan o'e. —Ke'nen huaye'a o'mana'uyate.

<sup>61</sup>—¿Menapo? O'nen huabet ken huadik ehue' o'ne. —O'nona'uyate.

<sup>62</sup>—¿Ke'nendik katedik i'pak?" Konig Zacarías peehue'dik o'enek huaba'a

on'tohua'ya'uyate. <sup>63</sup>Kamadoye'po huaen tablataj me'nigtotiak o'mana'uy. En'totiadke'te "Ke'nendik Juan o'e." Zacarías o'madoya'uyate. Aya'da on'tiahuaydepo kenpihuay on'batia'pakuyate. <sup>64</sup>Juanendik o'madoya'depo Zacarías onte'ti huaboa'da a'pakdik o'uy. Dios Huairi 'urua'da o'epo teyda o'kika' Zacarías o'batia'pakuyate. <sup>65</sup>Aya'da aratbut keyoda meyhue'da kenpihuay on'nopog'e'uyate. Kenda Zacarías o'ka' kenpa'ti Juantaj huabada on'batia'pake'uy. Judea ote'yo huabada kenda on'batia'pake'uyate. <sup>66</sup>Ken aya'ada on'tipeedepo kenda on'tinopoeonhuahua'po nogtaj nogtaj on'batia'pakonhua'po:

—Ke'na huasi'po Juana Diostaj kate 'urua'da ya'nigkapet. —Diosa 'urua'da ogkame'nok on'batia'pakuyate.

#### Zacarías konig o'mana'uyate o'batadi'kea'uy.

<sup>67</sup>Juansi'poen huaoj Zacarías o'epo Diosen Nokirega' o'nopo'toenok Zacarías o'mana'pakpo:

<sup>68</sup>Dios Huairitaj Israel aratbuta o'noknopojika'. Dios Huairi 'urua'da o'e. Kan'batia'pakike'po. Oro'omey Israel aratbuttaj bo'huatiakdepo mo'nopo'yarea'ne. <sup>69</sup>Kenpa'ti Diosen huanaba' Davidkudak huakka'da huayayo o'matae'ning'a nogtida bo'yokdene. Dios Huairia oro'omeytaj bo'yokdene. Ke'na Davidkudaken adhuea' huayayo o'epo teynanada huamanopo'yarea'eri o'e. <sup>70-75</sup>Oro'en taka'taj akmaenya'po Dios Huairia o'mata'mona'apo. Oro'omeytaj huahuadiayeritaj Dios Huairia bo'tioka'po o'maenapo. Kenpa'ti oro'omeyen adhuea'pane'taj

a'matinepahuiya'po,  
 "Me'pukhue'ada o'na o'nen  
 huayayoere Diostaj 'urunopo'da  
 kan'nigpeike'po kenpa'ti  
 Diostayo'da kan'nigpeike'po  
 opudomeyen taka'taj  
 bo'tioka'apone." Ken oro'en  
 huaoj Abrahamtaj kenda  
 Diosa ona'uyate. Kenda  
 Diosa okkahuehue' o'ika'.  
 Ken Diosa oa'uyate. Kenda  
 a'ennada Diosen 'uruu'da  
 huamanbatia'pakeria  
 o'mana'uyate. <sup>76</sup>Kenpa'ti,  
 o'na do'huedsi'po, Dios  
 Kuruderien huamanbatia'pakeri  
 mo'dikka'apone konigepo Cristo  
 Huairia manmadikahued o'na  
 huaboa'da i'manmadika'apo.  
 Konig Cristo Huairi  
 o'eapo huakkuruda  
 i'manmadika'apone. Kenda  
 i'manmadika'depo aratbuttaj  
 i'manopo'korea'apone. Cristotaj  
 i'maknopoea'apone. <sup>77</sup>Aratbut  
 Cristotaj o'noknopoe'depo  
 on'nigpeika'po dakhuea'  
 e'ka' Diosa o'bakkahuea'apo  
 kenpa'ti o'manopo'korea'apo.  
 I'manmadika'aponok  
 o'noknopoe'apo.  
<sup>78</sup>Ken oro'en Diosa di' mo'epo  
 mo'matinepahui'po konig  
 niokpo o'ta'tika'nig kutaya'  
 Cristo konigti o'huarakapo.  
<sup>79</sup>Sikkiregyo huae'eritaj ke'na  
 konig huakjey o'maeapo. Aratbut  
 e'buetyaj huame'pukeritaj konig  
 huakjey o'maeapo. Diostaj  
 o'maknopoea'apo. 'Uruda  
 huakadhua' mon'madika'apone.  
 Kenda ena'te on'nopo'noeyapone.  
 Zacarías oa'uyate, ken.

<sup>80</sup>Ken Zacaríasensi'po o'kereko  
 kenpa'ti Diostaj daka'da oknopoe'po  
 nogiti nogiti oknopoe'po aratbut

ehue' e'ne'te o'eonhuahuika'po Israel  
 aratbuttaj a'manbatia'pakya'po  
 huahued aratbut ehue' e'ne'te  
 o'eonhuahuika'po. Nogok Israel  
 aratbuttaj o'manbatia'pakuyate.

**Jesús o'si'po'e'uyate.**

(Mt. 1.18-25)

**2** <sup>1</sup>Kenoka' Romano huairitone' o'ika'po  
 ke'nendik Augusto o'e'uyate. "Aya'  
 huabokerekdik kan'matimadoye'." Huairia  
 Augustoa o'mana'uyate. <sup>2</sup>Ken konig  
 huabokerekdik on'matimadoya'uyate,  
 ken konig Romano huairi o'paknok  
 huakkuruda aya' huabokerekdik  
 on'matimadoya'uyate. Kenoka' Siria  
 aratbut gobierno huairi Cirenio  
 on'nigpeika'uyate. <sup>3</sup>Ken aya'da aratbut  
 kenomeyen adhuea'pane'en huakka'  
 jakyo hua'dik o'nepo huadik gobiernoen  
 beroba'te a'timadoyaya'po on'bahua'uyate.  
<sup>4</sup>Konigepo Nazaret huakka' jakya' José  
 o'hua'uyate. Nazaret Galilea huadaribayo  
 o'e. Nog huadaribayo o'hua'uyate.  
 Judea huadaribayo José o'hua'uyate.  
 Huakka' jakyo Belényo o'hua'uyate.  
 Belényo Davidkudak o'si'po'e'uyate. José  
 Davidkudaken adhuea' huayayo o'uyate.  
<sup>5</sup>Belényo huadik ijje'y a'timadoyaya'po  
 o'hua'po Maríaere on'hua'uyate. Maríaen  
 huaoj Maríataj o'toepakanpo Joséere  
 on'hua'po María bogdakhue' o'uyate. <sup>6</sup>Ken  
 Belényo o'nedepo kenoka' si'popakdik  
 o'epo <sup>7</sup>huakkuru huabokereksi'po  
 o'si'popakuyate. Aratbuten huatay jakyo  
 huakka'da o'nedepo kudhue'dik o'nepo  
 vaca 'uhuaen jakyo o'si'popakuyate. Konig  
 atisuksi'po yobedtaj on'tidoka'po vacaen  
 huabape' aypo cajayo on'hueda'uyate.

**Diosen huata'moneritaj  
 on'tiahuaypo oveja  
 huamatoe'eria on'tiahuaypo  
 kenpa'ti on'mape'e'uyate.**

<sup>8</sup>Belén huakka' jakyo meyhue'da  
 oveja huamatoe'eri o'nebedpo

kenomeyen oveja on'matōebedpo mire huadaribayo on'matōebeduyate. <sup>9</sup>Idada Dios Huairien huata'moneritaj on'tiahuay'uyate. Oveja huamatōe'eria on'tiahuaypo Dios Huairi eyanada nogyen nogyen o'batita'tenok huakka'da on'me'puke'uyate.

<sup>10</sup>—Me'pukhue' yane' konigepo huadak hua'a o'nigtotiakne. Ken aya'ada on'mapeedepo on'madurugpakapo. <sup>11</sup>Davidkudaken jakyo oy Diosen Huamanopo'yarea'eri o'manigsi'poede. Ke'na Cristo Huairi o'e. <sup>12</sup>Kan'nopoe'po huasi'po atisuksi'po e'tidoka' vacaen huabape' aypo cajayo e'huedte bo'huahuayapone. —Ken Diosen huata'moneria o'mana'uyate.

<sup>13</sup>Kenoka' ken Diosen huakkuru huata'moneri ee'ted nog huakka'nanada huata'moneri kurudya' on'huahuarakdepo,

<sup>14</sup>—Dios kutayo o'ika'po 'urua'da o'epo o'ka'de, iyo huadariyo aratbuttaj Diosa o'pakpo o'manoeya'. —Diosen huata'mona'eriomeya 'urua'nanada on'mana'uyate.

<sup>15</sup>Kurudyo Diosen huata'moneriomeyen behuikde'te, "Belényo monhua'. Kenda Diosa o'ka'de Dios Huairia mo'nopoea'dene mon'tiahuay." Oveja huamatōe'eriomeya huayahuaya on'batia'pakuyate.

<sup>16</sup>Idada on'bahua'uyate. María Joséere kenpa'ti yōbedtaj on'bahuahuay'uyate. Yōbed vacaen mire huabape' caya'poyo e'huedte on'huahuay'uyate. <sup>17</sup>Jesús yōbedtaj on'tiahuaydepo kenda Diosen huata'moneria huasi'potaj o'huaa'nig aya'da Josétaj Mariataere o'non'batia'pakuyate. <sup>18</sup>Ken, aya'da on'peedepo José Maríaere kenpihuay on'nopoe'uyate. Kenda oveja huamatōe'eriomeya e'batia'pakde'te on'mepuke'uyate. <sup>19</sup>Mariánayo

kenda oveja huamatōe'eriomeya en'batia'pakde'te kenda okkahuehue' o'epo o'nopoeonhuahua'uy. <sup>20</sup>Ken oveja huamatōe'eriomeynayo ogkume'uyate. Ovejate ogkume'uyate. Ovgkumejpo "Diosen huata'moneria buttida mona'nig. Konig mona'nig Diosa o'ka', konig o'peenig konigti o'tiahuaydey. Dios 'urua'da o'epo huadaknada o'kika'. Huadakda mogka'ne. Dakiti Dios." Ken oveja huamatōe'eriomeya on'batia'pakuyate.

**Diosen jakyo Jesús yōbedtaj on'tohua'uyate. Diosa ka'tiahuaye'po on'tohua'uyate.**

<sup>21</sup>Ken e'si'popakte ocho huame'noe e'ede'te huabokereksi'poensi'dak o'nokteg'uyate. O'noktegdepo on'dikka'uyate Jesús. Ken huadik Diosen huata'moneria a'nenda o'dikyok'uyate. María bogdakhue' ehue' ee'ted o'dikyok'uyate. Kenda o'dikka'uyate Jesús.

<sup>22-24</sup>Huabokereksi'po e'si'popakde'te cuarenta huame'noe e'pokde'te ke'nen huaaj huayere botta' apoyerepi' botta' tukkupi' e'nigarak Diostaj yokdik yane'. Kenda judío aratbuttaj Moisésa o'mana'uyate. Kenpa'ti ettone'en huakkurueri huabokereksi'po e'si'popakde'te "Diosen o'tae." Kenda aratbuta kan'batia'pake'. Judío aratbuttaj Moisésa o'mana'uyate. Ken Jesús e'si'po'e'te cuarenta huame'noe e'pokde'te José Maríaere Jesústaj on'tohua'uyate. Jerusalényo on'tohua'uyate. Aya' Moisésa o'mana'uyatenig kenda a'kaya'po Jerusalényo on'tohua'uyate.

<sup>25-27</sup>Ken Jerusalényo o'nokyedepo Diosen jakyo on'kud'uyate. Diosenba' Moisésa o'nigmadoya'uyatenig a'nigpeeya'po on'kud'uyate. Jesústaj e'nigka' a'nigpeeya'po on'kud'uyate. On'kuddepo Simeón keyoda o'e'uyate.

Simeón Jerusalén huakka' jakyo hua<sub>e</sub>'eri o'uy. 'Urunopo'da o'epo Diostaj huakka'da o'pakika'uyate. Diosen Nokirega o'nopo'to<sub>e</sub>'uyate. Cristoa pai'da Israel aratbuttaj o'manopo'yarea'apo. Kentaj Simeóna o'nigunhuahuika'po Cristotaj Dios Huairia o'ta'mona'apo Cristotaj ijtiahuayapoy, do bueyhued ijje<sub>p</sub>o ijtiahuayapoy. Ken Diosa Simeóntaj o'nopo<sub>e</sub>'uyate. Yobed Jesús huaojere huayeere Diosen jakyo e'kudte Diosen Nokirega Simeóntaj o'tokud'uyate

<sup>28</sup>Simeón Jesússi'potaj o'dokopo, 'urua'nada o'tia'pakpo:

<sup>29-30</sup> Konig mena'ayne megka'dene.

Konig mena'ayne o'nen Huamanoeanhuahuika'eritaj ijtiahuaydey, Dios Huairi oyda menopo'noeyanpo kabueye' meknopo<sub>e</sub>'. <sup>31</sup>Kentaj aya'tada Diosa o'bayokdenok aya'ada aratbuta tiahuydik o'ne.

<sup>32</sup>Insi'poa konig huakjey o'epo Dios konig o'enig judío ehue' aratbuttaj o'maknopo<sub>e</sub>'apo kenpa'ti Israel aratbut 'uruda o'ne ke'na aya'tada o'manopo<sub>e</sub>'apo. Ken konig Diostaj Simeóna oa'uyate.

<sup>33</sup>Simeón Jesústaj 'urua'da o'batia'paknok Jesúsen huaoj huayeere kenpihuay on'nopo<sub>e</sub>'uy. <sup>34</sup>“Diosa daka' mogka'ne.” Simeóna o'mana'uyate Maríataj Josétaere.

—Eya' Diosa o'paknok insi'potaj huakka' Israel aratbut oknopo<sub>e</sub>hue'da o'nepo Diosere ehue' o'neapo nog Israel aratbuta o'noknopo<sub>e</sub>epo Diosere kenpa'da on'noeonhuahuika'apo.

Diosen hua'a oa'ika'nok kenpa'ti konig Dios o'pak o'kika'aponok huakka'ada kentaj dakhue'ada on'huaa'po on'huamahui'ia'apo.

<sup>35</sup>On'huamahui'ia'po dakhuea' huanopoya' on'nopo<sub>e</sub>ng kenda aya'ada

on'nopo<sub>e</sub>apo. O'nakon María pai'da i'ea<sub>p</sub>one. Konig siro e'nopo'huekonig suhue'nanada i'ea<sub>p</sub>one. —Ken Simeóna Maríataj ona'uyate. María Jesúsen huaye o'uyate.

<sup>36</sup>Keyoda Diosen jakyoda Ana o'uyate. Ana Diosen hua'a huamanbatia'pakeri o'uyate. Ana Fanuelen huayobu kenpa'ti Aser aratbut o'uy. Huatone'nanada o'uyate. Konig mune'yo sue'da huabayok e'ta<sub>e</sub>tada o'to<sub>e</sub>pakuyate. Siete huabayok huato<sub>e</sub>ere on'uyate. <sup>37</sup>Kenoka' Jesús Diosen jakyo ee'te konig ayhua ochenta y cuatro huabayok o'eonhuahuika'de'uy. Diosen jakyo o'ika'po jakya' huahue' o'ika'uyate. Diostaj o'nigpeika'po nogok nogok Diostaj o'pakpo bapehue'da o'epo, Diostayo'da o'tiona'pakahuadika'uyate. Kenpa'ti o'tiona'pakbedika'uyate. <sup>38</sup>Kenoka' Simeón enade'te Ana Jesústaj o'huahua'uyate. Ana'a Diostaj dakiti oa'depo ken Jesúsai pai'da en'nopo'ete Jerusalén aratbuttaj o'madurugpakapo. Kentaj huakka'da o'nonmabonok Ana'a Jesústaj o'manbatia'pak ken.

#### Nazaret huakka' jakyo on'kume'uyate.

<sup>39</sup>Ken Dios Huairienba' e'mana'te aya'da on'nigpe<sub>e</sub>depo José Maríare Galilea huadaribayo on'kume'uy. Kenomeyen jakyo Nazaretyo on'kume'uyate. <sup>40</sup>Ken Jesússi'po o'kereko, o'teyyepo kenpa'ti Diosen e'ka' konig 'urua'da e'ka' nogiti nogiti o'nopo<sub>e</sub>'uyate. Kenpa'ti Diosa daka' o'toika'uyate.

#### Diosen Jakyo Jesús huabosi'po o'uyate.

<sup>41</sup>Nogbayok nogbayok aya' huabayokda Jerusalényo Jesúsen huaoj huayeere Jerusalényo

on'hua'ika'uyate. Judío huakkurueri isi'po mabueyhue' ee' okkahuehue' fiestate on'hua'ika'uyate. <sup>42</sup>Ken Jesús doce huabayok e'toede'te aya'da Jerusalényo on'hua'uyate. María Joséere Jesúsere on'hua'uyate. Konig ken fiestate on'huika'po on'hua'uyate. <sup>43</sup>Ken fiesta e'pokde'te on'kumejdepo José Jesúsén huayeere nopoehue' o'nepo Jesús huahue'da Jerusalényo o'e'uyate. <sup>44</sup>Jesús nog aratbutere yatiaket nama'da on'nopoepo nogme'noetida o'nokhua'uyate, huabet e'tahue'yo kenpa'ti nog aratbutyo Jesússtaj on'ukpo <sup>45</sup>huahuayhue' o'nepo Jerusalényo onte'ti on'kume'uyate. A'ukya'po on'kume'uyate.

<sup>46</sup>Ken, bapa' huame'noe on'ukdepo on'huahuay'uy, Jesús Diosen jakyo o'epo Diosba' huamanmadika'eriere o'hadpo o'batia'pakpo kenomeyere o'batia'pakpo. <sup>47</sup>Ken aya'da Jesússtaj on'peede'po 'uru'a'da o'batia'pak on'nopoepo kenpihuay huakka' Jesús o'nopoé Jesússtaj huapee'eria on'nopoé'uyate. <sup>48</sup>Ke'nen huayé Joséere on'tiahuaydepo on'mepuke'uyate.

—¿Mena'po konig i'e oro'taj? Ontaj huakka' o'me'puke'po o'ukne. O'nen huaoj doere o'ukne. —Jesúsén huayea Jesússtaj ona'uyate.

<sup>49</sup>—¿Mena'po do'taj o'duk? Kenda do'hued Apag Dios o'paknok ka'dik ijje. ¿Menpa' kenda nopoehue' mo'e? —Jesús a' mana'uy.

<sup>50</sup>José huayeere kenda Jesús a' mana' nopounkahue' o'nuyate.

<sup>51</sup>Ken Nazaretyo on'kumejpo onte'ti Joséstaj huayetaere Jesús a' on'igpeika'uyate. Kenda Jesús o'ka'depo Jerusalényo María okkahuehue' o'epo huanopoya' o'nopoeonhuahua'ika'uyate.

<sup>52</sup>Ken Jesús o'kere'kpo kenpa'ti nogiti nogiti o'nopounhuahua'uyate. Jesús 'uru'a'da o'kika'. Kenda Dios aratbutakon on'nopoé'uyate.

**Aratbut ehue' e'ika'te Juan Bautista o'manbatia'pakonhuahuika'uyate.**  
(Mt. 3.1-12; Mr. 1.1-8; Jn. 1.19-28)

**3** <sup>1</sup>Huakka' huabayok e'pokde'te Tiberio Roma huape'eria gobierno Huairi o'uyate. Ke'na quince huabayok o'mana'de'ika'uyate. Kenokti Poncio Pilato Judeayo gobierno huairi o'uyate. Herodes Galilea huadaribayo Romayo huape'eria gobierno huairi o'uyate. Kenoka'ti Herodesen huama'buy Felipe Iturea huadaribayo gobierno huairi o'epo kenpa'ti Felipe Traconite huadaribayo huairi o'uyate. Kenoka'ti Lisánias Abilinia huadaribayo gobierno huairi o'uyate. <sup>2</sup>Kenoka'ti Anás Caifásere konig huakkuru sacerdote huairi o'nuyate. Diosen jakyo ogkika'uyate. Kenokti Diosa Juantaj ona'po Diosen hua'a ijmanbatia'pakapoy Diosa Juantaj o'nopoéa'uyate. Juan Zacaríasensi'po o'epo aratbut huakka' ehue' ee'yo o'ikame'te. <sup>3</sup>Jordánhuete nogyon nogyon o'hua'epo aratbuttaj o'manbatia'pakpo,

—Dios opudomeyen dakhuea' e'ka' kabakkahue'po yan'nopo'korea'po bautiza yagka'. —Aratbuttaj o'mana'uyate. <sup>4</sup>Konig Isaías Diosen huamanbatia'pakeri o'timadoya'uyate. Konigti Juana o'ka'uyate. Isaías o'timadoya'po,

Keyo aratbut ehue' e'ika'yo huabokerek 'utta'da

e'mana'te a'peeya'po aratbut on'bahuahua'apo. “Dios Huairien dag kente huahuae' daka' dag yan'nigka'. Butukda yan'nigka'. Konig yan'manopo'korea'po.

<sup>5</sup>Huatota'po yanokbuk. Konig ote' yanoktibusuka'. Sondoda dag e'eo'k yanoktibusuka'. Kente ekkotatuka' dag yan'tinokdejpaka'. <sup>6</sup>Kenpa'ti



konig Dios aratbuttaj  
o'manopo'yarea' aya'ya'da  
huadariya' aya'ada aratbut  
on'tiahuayapo." Kenda Isaiás  
o'madoya'uyate. A'nennada  
o'madoya'uyate.

<sup>7</sup>Ken huakka'ada Juantaj  
on'huahua'uyate. Juantaj bautiza  
megke'po on'huahua'uyate.

—Konig dakhue'da bihui o'magkika'.  
Konigti opudomey dakhuea'da  
bo'kika'po kenpa'ti opudomey nama'da  
mo'nopoika'po. Nopo'koreahue'tada  
bautiza egka'te Diosa dakhuea'da  
castiga egka'te Diostatikonapoy. Kenda  
nama'da mo'nopoene. <sup>8</sup>Urua'da  
yag'kikati'. Daknopo'da yag'kika'po  
Diostaj mo'nopo'korea'ynok aya'ada  
tiahuaydik mo'ea'pone. "Abraham  
oro'omeyen adhuea'pane' o'epo Diostaj  
me'pukhue'dik o'ey." Nopoehue'  
yane'. Diosa e'paknayo huid in  
o'bahuednigtaj Abrahamen huayayo  
magka'dik o'e. <sup>9</sup>Nopo'koreahue'  
ee'nayo ida Diosa castiga mogka'apone.  
In konig o'e. Konig ta'bayo huada  
huatoe'eri o'epo. Huada 'uruada  
onhuadhue' o'eonhuahuika'nok daka'da  
o'tiahuayonhuahua'depo huateya  
o'ta'tegpo ta'akyo o'mahuigika'.

—Juana o'mana'uyate.

<sup>10</sup>—¿Diosa castiga kahue' mo'e'po  
oro' kate ka'dik o'e? —Juantaj  
o'nona'uyate.

<sup>11</sup>—Botta' opiot e'tae'nayo kentaj  
opiotbayo' e'huae'taj nogtida  
yan'bayokika'. O'na aypo e'toe'nayo  
kentaj aypobayo' e'huae'taj  
yan'bayokikati'. —Juana o'mana'uyate.

<sup>12</sup>Juana bautiza megke'po sue'da  
gobierno huakupe huabae'eria Juantaj  
on'huahua'depo engaña e'kikada  
huakka'da huakupe e'bakikada,

—¿Oro' kate ka'dik o'e,  
huamanmadika'eri? —Juantaj  
o'nona'po,

<sup>13</sup>—Kenyo'da ken huakupe Roma  
gobierno o'mana'uyunig kenyo'da  
yan'bae'. Nogda baehue' yane'.

—Gobierno huakupe huabae'eritaj  
Juana o'mana'uyate.

<sup>14</sup>—¿Oro' kate ka'dik o'e? —Roma  
sorotataj Juantaj o'nona'uy.

—Be'tapi' katepi' bakkayhue'  
yanika'. Katepi' a'bakkayya'po  
huiyoka'da manahue' yanika'. Nama'da  
yan'bahuaa'po bakkayhue' yane'.  
Kenpa'ti ken huakupe gobierno  
bo'yokika'ne konig sorotatayo ee'te  
huakupe bo'yokika'ne. Kenpa'da  
dakhuapa me'tene, nogiti pakhue' a'ei'  
yan'nopoika'. —Ken Juana sorotataj  
o'mana'uyate.

<sup>15</sup>Diosa Cristotaj o'ta'monapo kenda  
huakka'ada aratbut on'nopoepo Juante  
ogkupopakdepo Cristotaj huakka'  
o'nonmabopo, Juantaj Cristo o'epi'  
on'tinopoepo.

<sup>16</sup>—Cristo ehue' ijje. Donayo hue'eya  
bautiza iimagkikay. Cristonayo o'tiakde  
opudomeytaj bautiza o'magka'apo.  
Diosen Nokirega bautiza o'magka'apo  
kenpa'ti ta'ak e'bakpakya' bautiza  
o'magka'apo. Ke'na huakhuairi o'epo  
mata'mona'dik o'ea'po. Donayo huairi  
ehue'da ijje. Cristo 'uruada o'epo  
Diostaj huadknada o'e. Donayo  
suhue'da huadak ijje. <sup>17</sup>Cristo  
o'tiakdepo konig aroz huatuga'eri  
o'epo aroz o'tugdepo oktipoa'. Ken  
oktipoa'depo jakyo o'kudapo.  
O'kudā'depo huakusi'hue ta'akyo  
o'huigonhuahuika'po okbithue' o'ea'po.  
Ken huadak huakid konig Cristotaj  
huaknopo'e'eri o'ne. On'nigpeika'.  
Huaknopo'e'eritaj o'bakudā'apo, Diosen  
jakyo o'bakudā'apo. Huakusi'hue konig  
aratbut Diostaj nigpeehue' o'nika'. Konig  
castiga e'magka' ta'akyo o'maenapo.  
—Juana aya'tada o'mana'uyate.

<sup>18</sup>Ken konig nogda nogda Juana  
o'mana'onhuahua'po judío aratbuttaj

huadak hua'a o'manbatia'pakpo Jesucristotaj ken Juana o'manbatia'pakuyate. <sup>19</sup>Herodes Roma huae'eri gobierno huairi o'epo Galilea huadaribayo gobierno huairi o'epo, "Dakhuea' o'ka." Juana o'huaa'de'uy. Herodes huama'buyen huaeto'e o'toepo kenpa'ti nogda nogda dakhuea' o'kame'nok, "Dakhuea' o'ka." Juana o'huaa'de'uy. <sup>20</sup>Juana kenpa' e'huaa'de'te Herodes nigpeehue' o'edepo nogda dakhuea' o'ka'po huabakuda' jakyo Juantaj o'kuda'uyate.

**Jesústaj bautiza ogka'uyate.**

(Mt. 3.13-17; Mr. 1.9-11)

<sup>21</sup>Ken 'ikken Juantaj kudahued Juan bautiza o'magka'po, huakka'da aratbuttaj bautiza o'magka'depo Jesústakon bautiza ogka'uyate. Ken Jesústaj bautiza egkade'te Jesúsua Diostaj e'tiona'pakde'te konig kurudya' akbogpe okhuike'uyate. <sup>22</sup>Diosen Nokireg o'huahuarakpo konig tukku' o'huarakpo Jesústaj o'tikotpo, —On do'hued Huasi'po o'taene. Huadi'da o'taene. Ontaj durugda o'toene. —Kurudya' Diosa ona'uyate.

**Jesucristoen adhuea'pane' o'nika'uyate.**

(Mt. 1.1-17)

<sup>23</sup>Jesús konig treinta huabayok o'epo huaboa'da judío aratbuttaj o'manmadika'onhuahua'po. Joséensi'po o'e aratbut on'no'pika'pi'. José Elíensi'po o'uyate. <sup>24</sup>Elí Matatensi'po o'uyate. Matat Levíensi'po o'uyate. Leví Melquiensi'po o'uyate. Melqui Janaensi'po o'uyate. Jana Joséensi'po o'uyate. <sup>25</sup>José Matatiasensi'po o'uyate. Matatías Amósensi'po o'uyate. Amós Nahumensi'po o'uyate. Nahum Esliensi'po o'uyate. Esli Nagaiensi'po o'uyate. <sup>26</sup>Nagai Maatensi'po o'uyate. Maat Matatíasensi'po o'uyate.

Matatías Semeiensi'po o'uyate. Semei Joséensi'po o'uyate. José Judáensi'po o'uyate. <sup>27</sup>Judá Joanaensi'po o'uyate. Joana Resaensi'po o'uyate. Resa Zorobabelensi'po o'uyate. Zorobabel Salatielensi'po o'uyate. Salatiel Neriensi'po o'uyate. <sup>28</sup>Neri Melquiensi'po o'uyate. Melqui Adiens'i'po o'uyate. Adi Cosamensi'po o'uyate. Cosam Elmodamensi'po o'uyate. Elmodam Erensi'po o'uyate. <sup>29</sup>Er Josuéensi'po o'uyate. Josué Eliezerensi'po o'uyate. Eliezer Jorimensi'po o'uyate. <sup>30</sup>Matat Levíensi'po o'uyate. Leví Simeónensi'po o'uyate. Simeón Judáensi'po o'uyate. Judá Joséensi'po o'uyate. José Jonánensi'po o'uyate. Jonán Eliaquimensi'po o'uyate. <sup>31</sup>Eliaquim Meleaensi'po o'uyate. Melea Mainánensi'po o'uyate. Mainán Matataensi'po o'uyate. Matata Natánensi'po o'uyate. <sup>32</sup>Natán Davidensi'po o'uyate. David Isafensi'po o'uyate. Isaf Obedensi'po o'uyate. Obed Boozensi'po o'uyate. Booz Salmónensi'po o'uyate. Salmón Naasónensi'po o'uyate. <sup>33</sup>Naasón Aminadabensi'po o'uyate. Aminadab Aramensi'po o'uyate. Aram Esromensi'po o'uyate. Esrom Faresensi'po o'uyate. Fares Judáensi'po o'uyate. <sup>34</sup>Judá Jacobensi'po o'uyate. Jacob Isaacensi'po o'uyate. Isaac Abrahamensi'po o'uyate. Abraham Taréensi'po o'uyate. Taré Nacorensi'po o'uyate. <sup>35</sup>Nacor Serugensi'po o'uyate. Serug Ragauensi'po o'uyate. Ragau Heberensi'po o'uyate. Heber Peleg Heberensi'po o'uyate. Peleg Heberensi'po o'uyate. Heber Salaensi'po o'uyate. <sup>36</sup>Sala Cainánensi'po o'uyate. Cainán Arfaxadensi'po o'uyate. Arfaxad Semensi'po o'uyate. Sem Noéensi'po o'uyate. Noé Lamecensi'po o'uyate.

<sup>37</sup>Lemec Matusalénensi'po o'uyate. Matusalén Encensi'po o'uyate. Enoc Jaredensi'po o'uyate. Jared Mahalaleelensi'po o'uyate. Mahalaleel Cainánensi'po o'uyate. <sup>38</sup>Cainán Enósensi'po o'uyate. Enós Setensi'po o'uyate. Set Adánensi'po o'uyate. Adán Diosensi'po o'uyate.

**Jesústaj nama'da kake'po toto' huairia Jesústaj da ona'uyate.**

(Mt. 4.1-11; Mr. 1.12-13)

**4** <sup>1</sup>Diosen Nokireg o'nopo'toenok Jesúsa Diostaj o'nigpeika'po Jordánhueya' o'kume'uyate. Diosen Nokirega' aratbut ehue' e'ika'yo Jesústaj o'tohua'uyate. <sup>2</sup>Keyoda cuarenta huame'noe o'eonhuahuika'po. Keyoda toto'a Jesústaj o'dikdikuyate dakhuea' kake'po. Cuarenta huame'noe bapehue' o'unhua'po kenpa'ti cuarentaa' sikyo bapehue' o'eonhuahua'depo kenoka' aypota' o'e'uyate.

<sup>3</sup>—On buttida Diosen Huasi'po ee'nayo in huiddtaj aypo yaeen. —Jesústaj toto'a ona'uyate.

<sup>4</sup>—Aypoayo'da noikahue'dik o'ne aratbut. Aypo on'bape'po aya'da Apagba' huadik nigpeika'dik o'ne. Apagba'a kenpa' oa'. —Jesúsa ona'uyate.

<sup>5</sup>Kenoka' toto'a o'tohua'po Jesústaj o'tohua'po kutayoda ote'yo o'tobehuijpo. Ken ijhuiti ehue' nogyo nogyoda adteda aya' huadaribayo gobierno huairi Jesústaj o'batiahuay'ea'uyate.

<sup>6,7</sup>—Aya'da 'urua'da huadaribayo kenpa'ti huadariyo huairi huag' o'bayokapone konigepo do'huedda me'tamaenok. Betapi' e'yokta' ijpakpo yokdik ijje. Do'taj huikudate e'tihuadnayo “Uruda huairi me'taene.” Do'taj ena'nayo aya'da i'tiahuaynig o'bayokapone. —Toto'a Jesústaj nama'da ona'uyate.

<sup>8</sup>—Bekhua', toto', konigepo “Dios Huairitayo'da huikudate yanighuadpo

yan'nigpee'.” Apagba'a kenpa' oa'. —Kenpa' Jesúsa toto'taj ona'uyate.

<sup>9</sup>Kenoka' Jerusalényo Diosen jakyo o'tohua'po toto'a o'tohua'po Diosen huaboro' jak jakkutagpiyo o'tobehuijuyate.

—On Diosen Huasi'po ee'nayo barakte yakudaj. <sup>10,11</sup>Apagba' oa'po:

Ka'nonokba'huade'po e'kudajte Diosa ke'nen huata'moneritaj o'mata'mona'aponok huiddbate kothue'dik i'ea'pone. Huaba'a kutate monokba'huadapone.

Apagba' kenpa' o'madoya'uyate.

—Toto'a nama'da ona'uyate.

<sup>12</sup>—“Dios Huairi nama'da kake'po nama'da ahue' yae'.” Apagba' kenpa' o'madoya'uyate. —Jesúsa toto'taj ona'uyate.

<sup>13</sup>Jesús nama'da kake'po toto' huairia nogda nogda da ona'depo nogda nama'da huana' nopoehue' o'edepo o'batikpo okhua'uyate. Nogokpi' da anaya'po yakumeapetdapi'.

**Galilea huadaribayo Jesúsa huaboa'da o'manmadika'uyate.**

(Mt. 4.12-17; Mr. 1.14-15)

<sup>14</sup>Galilea huadaribayo Jesús o'kume'uyate. Diosen Nokirega o'nopo'toenok Jesús teyda o'e'uyate.

'Urua'da o'manmadika'nok Jesústaj on'batia'paknok huabada adta'da nogyá' nogyá' on'batia'pakuyate.

<sup>15</sup>Judío aratbuten huaitake' jakya' o'manmadika'po nogda nogda nogyo nogyo judío aratbuten huaitake' jakya' o'manmadika'ika'uyate. “Urua'da o'manmadika' Jesúsa.” Aya'ada on'batia'pakuyate.

**Nazaretyo Jesúsa o'ika'uyate.**

(Mt. 13.53-58; Mr. 6.1-6)

<sup>16</sup>Ken, Nazaret huakka' jakyo Jesús o'hua'uyate. Keya' Jesús o'kereuyate. Okmapie'ahuaddik huame'noete judío aratbuten

huaitake' jakyo o'kud'uyate. Kenda o'kika'po o'kud'uyate. O'kudondepo Apagba' o'tiahuaypo Apagba' abona'pakya'po o'bo'uyate. <sup>17</sup>Apagba' ken Isafas huamanbatia'pakeria o'manigmadoya'uy. Kenda beroba' Jesústaj on'yokuyate. O'ukpo in o'huahuaydepo, o'mona'pakuyate:

<sup>18</sup>Dios Huairien Nokireg me'nopo'toene

konigepo pai'da aratbuttaj huadak hua'a a'manbatia'pakya'po bektie'ea'me'ne. Pai'da huae'eri aratbuttaj kamadurugpake'po Dios Huairia me'ta'mona'uyne. Huairien huanaba' kenpa'da bahua'dik ka'ne'po kamane'po Dios Huairia me'ta'mona'uyne. Ekpobigtaj kabakpoyare'po Dios Huairia me'ta'mona'uyne. Kenomeytaj dakhuea'da on'magkika'nok kabaktohue'po Dios Huairia me'ta'mona'uyne.

<sup>19</sup>In huadak huabayokte Dios Huairia o'matinepahui'po kamabatia'pake'po Diosa me'ta'mona'uyne. Ken Jesús Isafasba' o'mona'pakpo o'mana'uyate.

<sup>20</sup>Ken Jesús Apagba' o'bokhuikdepo judío aratbuten huaitake' jak huatoe'eritaj o'ba'yokdepo o'huaduyate. Ken aya' aratbut huaitake' jakyoda o'nepo Jesústaj on'tiahuaya'nok,

<sup>21</sup>—Ken Apagba' huaboa'da mo'peedene oy konig Isafas oa'uyate oy kenda ij kay. Oy ijka'nig bo'tiahuayne. —Ken Jesús huaboa'da o'mana'uyate.

<sup>22</sup>Jesústaj “kenpihuay,” on'batia'pakpo “huadakda oa',” “buttida oa',” “urua'da hua'a o'batia'pak,” aya'ada on'batia'pakuyate.

—In Joséensi'po o'énig'a.  
—On'batia'pakuyate. Nopoehue' o'nepo on'batia'pakuyate.

<sup>23</sup>—Konig aratbut oa'ika',  
“Huamadakka'eri i'epo huata'da

yayarea.” Do'taj ena'ta' bo'pakne ijnopoey, “Konig Capernaum huakka' jakyo o'bayareame'te o'pee iyokon o'nen huadaribaya' konigti yaka'.” O'nona'apone. —Jesús Nazaret aratbuttaj o'mana'uyate.

<sup>24</sup>Jesús nogiti o'manbatia'pakpo,  
—Be'api' Diosen huamanbatia'pakeria nogbayo e'hua'nayo Diosen

huamanbatia'pakeri o'e aratbuta o'noknopoeyapo on'nigpeeyapo. Ke'nen huakka' jakya' yakerekyada kentaj Diosen huamanbatia'pakeritaj aratbuta pakhue' o'nika'apo. Buttida ijjay.

<sup>25</sup>A'nennada Elfaskudak o'ika'uyate. Elfaskudak Diosen huamanbatia'pakeri o'uyate. Keyo Israel aratbut o'nika' bapa huabayok nogiti nog seis puug hui'hue' o'uyate. Aypo ehue'da o'uyate. Israel aratbut aypo toehue' o'nuyate. Kenoka' huakka'ada Israel 'ayhua ee'tada

<sup>26</sup>Israel aratbut 'ayhuataj Elfaskudaktaj nigta'monahue' o'uyate. Israel aratbuta oknopoehue'da o'nenok Israel 'ayhuataj aypo kabayokike'po nigta'monahue' o'uyate. Dios nog aratbut 'ayhuataj o'nigta'mona'uyate. Ken Sarepta jak 'ayhuataj o'ta'mona'uyate. Serepta jak meyhue'da Sidón huakka' jak o'e. Sarepta jak 'ayhua nog aratbutda o'uyate. Nog aratbut 'ayhua aypo kabayokike'po o'nigta'mona'uyate.

<sup>27</sup>Kenpa'ti Israel aratbut huadaribayo huae'eri Eliseokudak o'uyate. Eliseo Diosen huamanbatia'pakeri o'uyate. Kenoka' huakka' Israel aratbut ke'poda on'masq'set'uyate. E'sq'set Israel aratbuttaj bayareahue' o'mauyate Diosa. Nogtatipi' bayareahue' Israeltanayo ee'ada Naamantayo'da o'yarea'uyate. Naaman nog aratbutda Siria huadaribayo huae'eri aratbut o'uyate.

—Jesús hu'énbaya'da Nazaretyo o'mana'uyate.

<sup>28</sup>Judío aratbuten huaitake' jakya' aya'ada Israel aratbut

o'nepo on'peedepo diga'da Jesústaj on'huadiay'uyate. <sup>29</sup>On'bopo huakka' jakya' on'to<sup>o</sup>ro<sup>o</sup>kpo Jesústaj on'to<sup>o</sup>ro<sup>o</sup>kpo huakupakunojpoyo on'tohua'po ken huakupate kenomeyen huakka' jak o'e'uy. Ken huakupakunojpoya' andaya'yo on'tohua'uynig'a. <sup>30</sup>Jesúsa huakupakunojpote huakka' aratbut egkupopakte o'bakpokonpo o'bakhua'uyate.

**Dakhue'da nokirega bokerektaj  
o'nopo'toe'uyate.**

(Mr. 1.21-28)

<sup>31</sup>Ken Capernaum huakka' jakyo Jesúsa o'hua'uyate. Capernaum Galilea huadaribayo o'e. Capernaumyo Jesús o'epo aratbuttaj o'manmadika'po judío aratbuten huaitake' jakya' okmapie'ahuaddik huame'noete o'manmadika'uyate. <sup>32</sup>"Kenpihuay 'urua'da o'manmadika', konig huairitone' o'manmadika'." Aratbuta on'tinopo'e'uyate.

<sup>33</sup>Huaitake' jakyo nogbokerektatida dakhue' nokirega o'nopo'toenok 'utta'da o'okoypo,

<sup>34</sup>—Oro'omeytaj ogkahue' moe'. ¿Mena'po oro'omeytaj ogka', Jesús Nazaret huae'eri? ¿Oro'taj kenpa'da a'eny'a'po menpa' o'huatiak? Ontaj oke'a'ne. Diosenyo'da i'ene. —Dakhue' nokirega 'utta'da o'okoy'uyate.

<sup>35</sup>—A'pakhue' yae'. Huabokereky'a' yakhua', nokireg. —Jesúsa ona'uyate.

Ken huabokerektaj dakhue' nokirega sorokte o'en'uyate. Aya' okpoda sorokte o'en'uyate. O'endepo okoro<sup>o</sup>kon'uyate. Huabokerektaj dakhuea' ogkadhue'ada dakhue' nokirega okhua'uyate. <sup>36</sup>Aya'ada on'tiahuaypo on'mepuke'uyate. Huayahua'ya on'manbatia'pakpo,

—'Urua'da huadik oa'. Konig huairitone' ona'po ighua'da o'mana'nok nigpeedik o'nepo o'makoro<sup>o</sup>ka', dakhue'

nokireg o'makoro<sup>o</sup>ka'. —Huayahua'ya on'manbatia'pakuyate.

<sup>37</sup>Ken huadaribayo nogyon nogyon Jesústaj on'manbatia'pakonhuahuika' uyate.

**Simón Pedroen huasu'taj Jesúsa  
o'yarea'uyate.**

(Mt. 8.14-15; Mr. 1.29-31)

<sup>38</sup>Ken Jesús o'oro<sup>o</sup>konpo judío aratbuten huaitake' jakya' o'oro<sup>o</sup>kondepote Simónen jakyo o'kudon'uyate. Keyo Simónen huasu' huakka'da o'digpaknok, "Oro'en huasu'taj yayarea'." Jesústaj o'nona'nok <sup>39</sup>enpahuedte Jesúsa o'tiboato'po o'yarea'nok ke'na o'ta'huitato'depo ida o'bodpo o'manigmanhuada'uyate.

**Huakka' aratbut dakhue'da e'ne'te  
Jesúsa o'bayarea'uyate.**

(Mt. 8.16-17; Mr. 1.32-34)

<sup>40</sup>Nogyo nogyo huakka' aratbut o'nepo, dakhue'da o'nepo, noga noga dakhue'da o'nepo, on'digpakpi', ekpobigpi', nogda nogda dakhue'da o'ne'uyate. Ken e'sikde'te kenomeyen huabeta on'batotiakpo Jesúste on'batotiakuyate. Jesús nogtati nogtatia' o'batibata'tepo o'bayarea'uyate. <sup>41</sup>Nogomey kenpa'ti dakhue'da e'ne'te Jesúsa toto'taj o'makena'uyate. Toto'a o'makoro<sup>o</sup>kpo 'utta'da o'dokoypo,

—Diosen Huasi'po i'ene. —Toto'a on'mana'uyate.

Jesús Diosen Cristo Diosa o'ta'mona'de'uy toto'a o'noknopo<sup>o</sup>enok, —Keje', ahue' yane'. —Jesúsanayo toto'taj o'mana'uy.

**Galilea huadaribaya' Jesúsa  
o'manbatia'pakonhuahua'uyate.**

(Mr. 1.35-39)

<sup>42</sup>E'munyakte Jesúsa huakka' jakya' o'oro<sup>o</sup>konpo aratbut ehue' ee'yo

o'hua'uyate. Aratbuta o'dukpo Jesústaj on'huahuay'uyate.

—Oro'omeytaj okhuahue' moe'.

—Jesústaj o'nona'nig'a,

<sup>43</sup>—Huadak hua'a konig aratbut Dios Huairitaj oknopojka'dik o'neapo. Ken nog huakka' jakyo nogyo nogyo huadak hua'a manbatia'pakdik ka'e'po konigepo Diosa me'ta'mona'uyne.

—Jesúsa aratbuttaj o'mana'uyate.

<sup>44</sup>Ken nogda nogda judío aratbuten huaitake' jakyo Galilea huadaribayo Jesúsa huadak hua'a o'manbatia'pakika'uyate.

**Jesúsa ena'te Simónomey  
o'nokenedepo huakka'nana biig  
o'nontotokuyate.**

(Mt. 4.18-22; Mr. 1.16-20)

**5** <sup>1</sup>Nogok Genesaret e'pog akta'bogpete Jesús o'bo'uyate. Diosen hua'a a'peeya'po huakka'nada aratbut on'batiakpo o'nonda'epo Diosen hua'a e'peeta' on'pakpo Jesústaj o'nonda'e'uy. <sup>2</sup>Botta' kusi'petone' meyhue'da akta'bogpete e'bette Jesúsa o'tiahuaypo sigpi' huadhue' o'nuy. Huakjene'eriomey kusi'petaj o'nokhua'depo huakjene' on'koyoa'uyate. <sup>3</sup>Nogtida kusi'petone'yo Jesús o'kudpo o'bo'uyate, Simónen kusi'peyo o'bopo.

—Sue'pi' e'pognopo'te be'tohuatu', Simón. —Jesúsa Simóntaj ona'uyate. Keyo kusi'peyo o'huadepo huaboa'da huakka'nada aratbuttaj o'manmadika'uyate. Kusi'peya'da o'manmadika'uyate.

<sup>4</sup>O'manmadika'batikdepo, —E'pog jodyoda yanhua'po biigtaj yanokjene'. —Simóntaj ona'uyate.

<sup>5</sup>—Aya' sikyoda oro'omey okjene'bednig'a biig ehue'da o'e, Huamanmadika'eri. O'na ona'nok yokjene'apoy. —Simóna Jesústaj ona'uyate.

<sup>6</sup>Ken o'nokjene'depo huakka'nada biig on'kuda'denok en'totokte huakjene' huaboa'da okputukonpo nogyen nogyen okputukonpo. <sup>7</sup>Nog huakjene'eri nog kusi'petaj Simóna huaba'a ba'ba' o'manenok. Ken on'tiakdepo kenomeyen botta' kusi'peyo biig on'bahueda'po huakka'nada o'epo kusi'pe o'ta'kotay'uyate. <sup>8</sup>Kenda Simón Pedro o'tiahuaypo Jesúsen hua'ite huikudate o'tihuadpo,

—Bekhua', Huairi, donayo dakhuea' huaka'eri ijje. —Jesústaj Simóna ona'uyate.

<sup>9</sup>Biig huakka'da o'enk Simón omepuke'po kenpa'ti nogomey Simónere huakka'da on'mepuke'uy. <sup>10</sup>Kenpa'ti Jacobo Juanere Zebedeoensi'po Simónere huakjene'eri o'nuyate. Kenomeykon on'mepuke'uyate.

—Mepu'kehue' yae'. Oy huaboa'da do'taj kanoknopoe'po aratbuttaj i'bae'apo. —Jesúsa Simóntaj ona'uyate.

<sup>11</sup>Ken kusi'pe on'betandepo huakjene'eria aya'da on'maenanpo kenpa'da on'maenanpo Jesústaj a'nigpeikaya'po on'tahua'uyate.

**Huabokerek ke'poda e'so'set Jesúsa  
o'yarea'uyate.**

(Mt. 8.1-4; Mr. 1.40-45)

<sup>12</sup>Keyo huakka' jakyo Jesús o'edenok huabokereka o'huatiak'uyate. Ke'na ke'poda o'so'seta' Jesústaj o'tiahuaydepo huikudate o'huadpo sorokyo o'kuta'boy'uyate. (Ken konig gobierno huairitaj ogkika'uyate.)

—O'na e'paknayo beyarea', Huairi. —Jesústaj ona'uyate.

<sup>13</sup>Jesúsa o'tibata'tepo —E'yarea'ta' ijpaki, “o'yareay.” —Jesúsa ona'uyate.

Ena'te idada o'yarud'uyate.

<sup>14</sup>—“Jesúsa be'yarea'ne,” mantia'pakhue' yae'. Sacerdote Diostaj

'uhua huanigbatiarakerite sacerdotete yahuati'. I'yaredene betiahuayye'. A'yarea'po konig Moisésa o'mana'uyate konig yayokti'. Sacerdote 'uhua Diostaj kanigarake'po 'uhuapi' yayokti'. Ken konig i'ka'po i'yaredepo huadak i'enok aratbut tiahuydik o'neapo. —Jesúsa ona'uyate.

<sup>15</sup>Urua'da Jesúsa o'bayarea' huadaknada o'manmadika' nogya' nogya' on'tipeepo nogiti nogiti huakka'da on'tipeepo huakka'da aratbut Jesústaj ogkupopakpo a'peeya'po kenpa'ti be'yare'po ogkupopakuyate. <sup>16</sup>Egkupopakta da Jesúnayo o'bakhua'ika'po keyo aratbut ehue' huag'yo o'bakhua'ika'uyate. Keyoda o'tiona'pakonhua'uyate.

**Huabokerek e'ketpaktaj Jesúsa o'yarea'uyate.**

(Mt. 9.1-8; Mr. 2.1-12)

<sup>17</sup>Nogoka' Jesúsa e'manmadika'te keyo fariseo aratbut on'bahuadpo fariseo Moisésenba' on'nigpeika'uyate. Kenpa'ti Moisésenba' huamanmadika'eri on'bahuadpo Galileaya' Judeaya' kenpa'ti Jerusalénya' on'huatiakde'uyate. Kabayare'po Diosa Jesústaj o'tihuapokpo <sup>18</sup>ken Jesústaj huabokerek asukte enpahuedte on'nigtotiakpo sue'ada huabokerek on'nigtotiakuyate. Ken huabokereka asukte e'ketpak onpahuedika'uyate. Jakyo e'kuda'ta' on'pakpo Jesústaj a'nighuedaya'po e'kuda'ta' on'paknig'a <sup>19</sup>huakka'nanada o'nenok meya' kudahue' o'ne'uy. Konigepo jak kutayo on'tobehuikepo jakonpid on'tiokendepo huabokerek asukte enpahuedte o'nonhuaraka'po aratbutnopote Jesústaj huakokpen o'nonhuaraka'uyate. <sup>20</sup>Jesúsánayo o'yarea'apo on'nopo'e'uy. Kenda Jesúsa oknokot. Huabokerek e'ketpaktaj,

—Aya'da Diostaj dakhuea' i'ka'uyatenig'a do'a yokkahueay, huabokerek. —Jesúsa e'ketpaktaj ona'uyate.

<sup>21</sup>Ken Moisésenba' huamanmadika'eri kenpa'ti fariseo aratbut Jesústaj on'peedeipo huabo'a'da on'nopoepo “Diostaj dakhuea' Jesúsa oa'. Nama'da o'nopoepo dakhuea'da Jesúsa oa'. Huabokerekanayo okkahueahue'dik o'e. Diosayo'da dakhuea' e'ka' okkahuea'dik o'e.” Moisésenba' huamanmadika'eri fariseoere huabo'a'da huanopoya'da on'nopoepo.

<sup>22</sup>Kenda fariseomey huanopoya'da on'nopo'enig Jesúsa o'nopo'e'uyate.

—Menpa' ken konig dakhuea' on'tinopo'e. <sup>23</sup>Diostaj dakhuea' e'ka' huabokereka okkahueahue'dik o'e. Diosayo'da dakhuea' e'ka' okkahuea'dik o'e. Huabokerekanayo sigpi' yareahue'dik o'e. Diosayo'da yarea'dik o'e. <sup>24</sup>Do huabokerek ijjeipo Diosya' ijtiakuy. Diostaj dakhuea' e'ka' bakkahuea'dik ijjei opudtaj a'manopoeyaya'po e'ketpaktaj ijyareapoy. —Jesúsa o'mana'po, —Yabo', asuk ya'udpo, o'nen jakyo yahuati'. —Huabokerek e'ketpaktaj Jesúsa ona'uyate.

<sup>25</sup>Huabo'a'da ena'te ke'na o'bod'uyate. Huamanmadika'eri fariseoere en'tiahuayte o'bodpo, asuk o'udpo ke'nen jakyo o'hua'po Diostaj dakiti o'tiona'pakpo Dios 'uruada megka'ne o'batia'pakuyate. <sup>26</sup>Aya'ada on'tiahuaydepo on'mepuke'po Dios 'uruada o'ka' on'batia'pakuyate. On'mepu'kudpo, —Oy konig a'nenda tiahuyhue' o'nika'uyunig o'tiahuaydey. Diosa 'uruada o'ka' o'tiahuay. —Aratbuta on'tiahuaydepo on'batia'pakuyate.

**—Diostaj aknopoeyaya'po do'taj menigpeepo be'tahua'. —Jesúsa Levítaj ona'uyate. (Leví konogda o'dikka'uy Mateo)**

(Mt. 9.9-13; Mr. 2.13-17)

<sup>27</sup>Nogoka' Jesúsa o'orokpo Levítaj o'tiahuay'uyate. Leví huabokerek o'epo

gobiernotaj huakupe o'tabae'ika'po  
gobierno huakupe huatabae' jakyo  
o'huad'uyate.

—Diostaj aknopoe'ya'po do'taj  
menigpeunhuahuika'. —Jesúsa Levítaj  
ona'uyate.

<sup>28</sup>Ken Leví o'bodpo aya'da kenpa'da  
o'maenanpo Jesúsere o'hua'uyate.

<sup>29</sup>Nogok Jesústaj huakka'da  
aypo on'manigmanhuada'po Levien  
huanaba'a on'nigmanhuada'uyate.  
Levien jakya' on'nigmanhuada'uyate.  
Kutopate Jesúsere Leviere huakka'da  
on'bahuadpo, gobiernotaj huakupe  
huatabae'eri on'bahuadpo kenpa'ti  
nogomey on'bahuadpo gobierno  
huakupe huatabae'eria engaña  
ogkika'uyate. <sup>30</sup>Fariseo aratbut kenpa'ti  
Moisésenba' huamanmadika'eri o'nepo  
huaboa'da on'bahuua'po Jesúsén  
huanigpeika'eritaj on'bahuua'depo,

—¿Gobierno huakupe huatabae'eri  
kenpa'ti dakhuea' huaka'eriene mena'po  
opudomeya mo'bape'? Kenomeyere  
bapehue' yane'. Dakhuea'da boka'ne.  
—On'mana'uyate.

<sup>31</sup>—Aratbut huadakda ee'nayo  
huamadakka'eriyo huahue' o'nika'.  
Dakhue'da ee'nayo huamadakka'eriyo  
on'hua'ika'. <sup>32</sup>Konigepo “Huadak  
huaka'eri ijje.” Aratbut kenda huata'  
huatinopoe'eritaj “Yan'nopo'korea'.  
Diostaj yan'nigpee',” a'manaya'po  
Diosya' bahuatiakhue' ijje'uy.  
“Dakhuea' huaka'eri ijje.” Aratbut  
kenda huata' huatinopoe'eritaj  
“Yan'nopo'korea'. Diostaj yan'nigpee',”  
a'manaya'po Diosya' ijbahuatiakuy.  
—Jesúsa o'mana'uyate.

**Diosa kamapee'po bapehue'  
o'nunhua'depo on'tiona'pakika'.**

(Mt. 9.14-17; Mr. 2.18-22)

<sup>33</sup>—Juan bautiza huaka'erien  
huanigpeika'eri kenpa'ti fariseoen  
huanigpeika'eri Diosa me'pee'po

bapehue' o'nunhua'po on'tiona'pakika'.  
¿Mempa' o'nen huanigpeika'eriata aypo  
on'bape'ika'? —Fariseomey kenpa'ti  
Moisésenba' huamanmadika'eriomeya  
nama'da on'nopoe'po Jesústaj  
o'nona'uyate.

<sup>34</sup>—Do konig huabokerek e'toepak  
konig ijjenok. Kenoka' huabokerek  
o'toepakapo huakka' huadi'a  
a'durugpakya'po kenere a'bapeya'po  
on'bahuatiakika'. Kenoka' huadi'  
kenere o'nepo “Bapehue' ya'nunhua',”  
manahue'dik o'nenig'a <sup>35</sup>kenoka'  
do'taj kadarake'po boktohua'denok  
huadi' aratbuta bapehue' o'nunhua'po  
on'tiona'pakonhua'apo. —Jesúsa  
o'mana'uyate.

<sup>36</sup>—Huatone'ok ke'poda e'para'te  
akbetya'po huabo huaoktaj okteghue'  
monika' oro'omey judío aratbut.  
Huaboenpa huatone'oktaj ekbetnayo  
onte'ti ke'poda o'para'apo kenpa'ti  
huabo huaok dakhue'da o'epo.  
Konigti adhuea'pane'a e'manmadika'  
huatone'dik onte'ti nigpeehue'dik yane'.  
Do'hued huabodikyo'da e'manmadika'  
nigpeedik yanika'. <sup>37</sup>Huatone'si'dak vino  
huatoge' ayda kenpa'ti hurugada o'epo  
konigepo huabo vino sine' huebiahued  
onjoyhue'dik o'ene. Huatone'si'dakyo  
huabo vino onjoyhue'dik o'ika'ne.  
Huatone'si'dakyo huabo vino enjoinayo  
o'huepoagpo huasi'dak on'titagonapo.  
Vino o'surukapo kenpa'ti huasi'dak  
ke'poda o'su'huitonapo, dakhue'da o'epo.  
<sup>38</sup>Huabo vino huabosi'dakyo onjoydik  
o'ene. Konigti adhuea'pane' ogkika'  
kahue'dik yanika'. Do'hued huabo  
e'manmadikayo'da yan'nigpeika'po,  
yag'kika'. <sup>39</sup>Be'api' vinotone'  
on'mamay'ikame'te huabo vino pakhue'  
o'nepo. “Vinotone'yo'da huadakda o'e.”  
O'da'. Ken konig adhuea'pane' ogkika'  
be'api' ogkadhuahuika'depo do'hued  
huabo e'manmadika' e'ka'ta' pakhue'  
o'ne. —Jesúsa o'mana'uyate.



**Judíoen okmapie'ahuaddikte  
Jesúsen huanigpeika'eria  
o'nogkupoktega'uyate.**  
(Mt. 12.1-8; Mr. 2.23-28)

**6** <sup>1</sup>Nogok judío aratbuten okmapie'ahuaddik huame'noete Jesús ta'bayo o'hua'epo huanigpeika'eriene o'hua'e'uyate. Jesúsen huanigpeika'eri trigo o'nogkupaya'po huaba'a on'tipita'po on'bape'uyate. <sup>2</sup>Ken sue'da fariseo huamanmadika'eri o'nepo,  
—Kenda Judíoen okmapie'ahuaddik huame'noete ogkupayahue'dik o'énig'a. ¿Mena'po bo'ka'? Dakhuea'da bo'ka'ne.  
—Fariseo huamanmadika'eriomey Jesúsen huanigpeika'eritaj on'mana'uyate.  
<sup>3</sup>—Apagba'te Davidtaj e'batia'pak mo'ba'tiahuay'uyate. David kenere huae'eri ogkusitokuyate.  
<sup>4</sup>Diosen carpa jakyo ogkud'uyate. Pan Diostaj on'nighueda'ika' o'hued'uyate. Sacerdote Diostaj 'uhua huanigbatiarakeriyo'da ken pan bape'dik o'nika'. David kenere huae'eri ogkusitokpo ken pan o'depo on'bape'uyate. —Jesúsa fariseomeytaj o'mana'uyate.

<sup>5</sup>Nogdakon Jesúsa o'mana'po,  
—Do huabokerek ijjenok Diosa me'ta'mona'uyne. Judío aratbuten okmapie'ahuaddik huame'noete huairi ijjepo katepi' yagka' aratbuttaj mana'dik ijje. —Jesúsa o'mana'uyate.

**Eba'po'ketpaktaj Jesúsa  
o'ba'yarea'uyate.**  
(Mt. 12.9-14; Mr. 3.1-6)

<sup>6</sup>Nog okmapie'ahuaddik huame'noete judíoen huaitake' jakyo Jesús o'kuddepo huaboa'da o'manmadika'uyate. Keyo huabokerek huada'kopen eba'po'ketpak o'uyate.  
<sup>7</sup>Moisésenba' huamanmadika'eri

fariseomeyere Jesústaj on'tiahuaya'po okmapie'ahuaddik huame'noete menpa' o'yareapopi' kenda e'tiahuayta' on'pakpo. Okmapie'ahuaddik huame'noete e'yarea'nayo “Dakhuea' o'ka'.” huaa'dik o'ey on'nopoepo.  
<sup>8</sup>Kenda fariseomey en'nopo'e'te Jesúsnayo o'maknokotuy. Huabokerek eba'po'ketpaktaj

—Yabo', iyq eretnopoyo yaboato'.  
—Jesúsa ona'uyate.  
Ken huabokerek o'bopo eretnopoyo o'boato'uyate.  
<sup>9</sup>—Okmapie'ahuaddik huame'noete huadak ka'dik o'ene. Dakhuea' kahue'dik o'ene. Okmapie'ahuaddik huame'noete dakhue'taj yarea'dik o'ene. Barakhue'dik o'ene. Menpa' kenpa' mo'nopo'e opuda. —Jesúsa o'mana'nig'a fariseomey soata' a'tokhue'da o'noke'uyate.

<sup>10</sup>Konigepo Jesús nogta nogta o'batiahuaypo,  
—Yabate'. —Jesúsa huabokerek eba'po'ketpaktaj ona'uyate.  
O'ba'tedepo o'ba'yarudpo huadakba'da o'ean'uyate.  
<sup>11</sup>Fariseomeynayo Jesústaj huakka'da on'huadiaydepo a'arakya'po monig ka'dik o'e, on'batia'pakuyate.

**Jesúsen doce huamata'mona'eritaj  
Jesúsa o'baktie'ea'uyate.**  
(Mt. 10.1-4; Mr. 3.13-19)

<sup>12</sup>Nog huame'noete Jesúsa a'tiona'pakya'po ote'yo o'behuikpo aya' sikyoda o'tiona'pakbedpo Diostaj o'tiona'pakbeduyate. <sup>13</sup>Emede'te ke'nen huanigpeika'eritaj o'magkupopaka'depo doceyo'da o'baktie'ea'uyate. Opuda doce do'hued huamata'mona'eri mo'eapone. Jesúsa o'madikka'uyate.  
<sup>14</sup>Simóntaj oktie'ea'uyate. Simón konogda o'dikka'uy Pedro. Simónen huama'buy Andréstaj oktie'ea'uyate. Jacobotaj Juantaj, Felipetaj,

Bartolomé taj, <sup>15</sup>Mateotaj, Tomástaj o' baktie'ea'uyate. Alfeoensi'po Jacobo g'epo Jacobotakon oktie'ea'uyate. Kenpa'ti Simón Zelote oktie'ea'uyate. <sup>16</sup>Kenpa'ti Jacoboen huama'buy Judastaj oktie'ea'uyate, kenpa'ti Judas Iscariotetaj oktie'ea'uyate. Ke'na Judas Iscariote Jesústaj judío huairitaj nogok o'bayokuyate. Kadarakepo o'bayokuyate.

**Jesúsa huakka'tada  
o'manmadika'uyate.**

(Mt. 4.23-25)

<sup>17</sup>Ken Jesús ote'ya' o'huarakpo doce huamata'mona'eriene huatota'yo on'huarakuyate. Jesúsen huanigpeika'eri huakka'nada g'nepo kenpa'ti nogomey huakka' on'batiakdepo Judea huadariya' Jerusalén ya' e'pogya' huakka' jak Tiroya' kenpa'ti e'pogya' huakka' jak Sidón ya' on'batiakde'uyate. Jesústaj a'peeya'po on'batiakpo Jesúsa be'yare' on'nopo'epo on'batiakuyate. <sup>18</sup>Kenomeytaj toto'a dakhuea' e'magka'tada Jesúsa o'bayarea'uyate. <sup>19</sup>Jesúsa aya'tada o'bayarea'ika'nok aya'ada a'yareya'po Jesústaj e'nejta' on'pakuyate.

**Durugda aratbut o'nika'apo kenpa'ti  
noga suhue' g'nika'apo. Jesúsa  
o'mana'uyate.**

(Mt. 5.1-12)

<sup>20</sup>Ken Jesús huanigpeika'eritaj o'batiahuaypo, o'manmadika'po, —Opudomey pai'da mo'epo katepi' to'ehue' mo'e. Dios opuden Huairi g'e. Dios mo'nopo'toenok Diostaj mo'nigpeika'. Durugda mo'ika'ne. <sup>21</sup>Opudomey aypotaj e'eadada durugda mo'ika'apo dapotey mo'ika'apone. Opudomey oy suhue' mo'edepo bo'huikdepo durugda mo'epo bo'erikapone.

<sup>22</sup>Opudomeytaj on'huadiayapo. Do'taj bo'paknok on'huadiayapo. Do huabokerek ijje'po Diosya' ijtia'kuy. E'huadiaytada durugda mo'ika'apone. Kenpa'ti do'taj bo'paknok mo'enapone. E'entada durugda mo'ika'apone. Kenpa'ti do'taj bo'paknok e'tidi'ke'tada durugda mo'ika'apone. Kenpa'ti do'taj bo'paknok "dakhue'da g'ne," e'huaa'tada durugda mo'ika'apone. <sup>23</sup>Nogok ken konig egka'tada huakka'da yan'madurugpakti'. Dios kurudya' 'uru'ada mo'nigka'apone. Kenomey aratbuta opudomeytaj dakhue'da mogka'apone. Kenomeyen adhuea'pane' Diosen huamanbatia'pakeritaj dakhue'da on'magka'uyate.

<sup>24</sup>Opudomey oy huakka'da mo'to'epo mo'durugpakne. Nogok pai'da mo'epone.

<sup>25</sup>Huakka'da aypopi' mo'to'epo konig oy dapotey e'ika'ada nogokda pai'da mo'epopo bo'kusitokapone.

Oy durugteda e'erikada pai'da mo'epo bo'huikapone.

<sup>26</sup>Huadakda g'ne. Aya'ada opudtaj mo'tinopo'epo on'batia'pakika'nig'a nogokda pai'da mo'nopo'epone. Konigti a'ennada da huamanbatia'pakeritaj on'tinopo'e'uyate, huadakda g'ne nama'da on'tinopo'e'uyate. Huadakda g'ne nama'da on'batia'pakuyate.

**Dig huabahuhauay'eritaj konig  
taka'taj onte'ti diayahue'ada di'  
yan'mae'.**

(Mt. 5.38-48; 7.12)

<sup>27</sup>Do'taj on'peene opudomeytaj o'nona'ne. Opudtaj dig bo'huahuayika'ne konig taka' g'nepo dakhuea' mogkika'ne. Kenomeytaj di' yan'maika'po huadak yan'magkika'. <sup>28</sup>Opudtehuapa' dakhue'da ka'e' huahuaa'eritaj Diostaj daka' yamagka'

ya'nona'. "Kenomeytaj Diosa kamanopo'kore'." Yan'tiona'pakti'. Kenpa'ti kenomeya dakhue'da mogka'ne, kenomeytaj yan'tiona'pakti'.<sup>29</sup> Noga opudtaj e'tuktuknayo diayahue'ada kentaj daka' yana'. Onte'ti e'batuktuknayo onte'ti daka' yana'. Noga opiot e'kai'nayo diayahue'ada chompakon yayokti',<sup>30</sup> "Aypo beyok." Noga ena'nayo sue'nopo ehue' yaepo yabayokti'. Yudtaj bektoyok ena'nayo daknopo'da yaepo yaktoyokti'. Onte'ti "Betahua'," ahue' ya'e'.<sup>31</sup> Konigti huadakda nogomey opudtaj e'nigka'ta' bo'paknok kenomeytaj konigti huadakda yan'manigkikati'.

<sup>32</sup> Sue'ada opudomeytaj di' mo'ene kenomeytayo'da di' ee'nayo kenda sue'da huadak o'e. Kenda dakhuea' huaka'eria ogkika'nigtaj. Nogomeya di'da ee'nayo di' on'mae'. Dihue' huag'eritakon di' yan'mae'. Kenda huadakda o'e.<sup>33</sup> Sue'ada opudomeytaj huadakda mogkika'po montihuapokika'ne. Kenomeytayo'da e'tihuapoknayo sue'da huadak o'e. Ken konig dakhuea' huaka'eri ogkika'. Nogomey dakhue' huag'eri huadak egka'nayo e'tihuapoknayo kenomeytaj dakhue' huag'eria huadak ogkika'po on'tihuapokika'. Opudomeytaj huadakda kahue' huag'eritaj kenpa'ti tihuapokhue' huag'eritaj huadakda yag'kikati'. Kenda e'kika'nayo huadaknanada o'e.<sup>34</sup> Kenomeyanayo kenpa'ti be'tahuapone, yan'nopoepo kenomeytayo'da ektoyoknayo sue'da huadak o'e. Kenda konig dakhuea' huaka'eria ogkika'. Nog dakhuea' huaka'eritaj on'baktoyokika'. Kenpa'ti be'tahuapone on'nopoepo. Nogomeyanayo onte'ti tahuahue' me'taeapone nopohue'ada opudomeynayo kenomeytaj yan'baktoyokika'. Kenda huadaknanada o'e.<sup>35</sup> Opudtaj

huahuadiayeritaj kenpa'ti taka'taj di' yan'maika'. Huadakda yan'magkika'. Taka'taj huadakda yan'magkika'. Kenomeytaj yan'baktoyokika'. Kenpa'ti tahuahue' me'taeapone nopohue'ada yan'baktoyokika'. Ken konig e'kika'nayo Dios kurudyo 'urua'da bo'yokapone. Opudomey kenpa'ti Dios Huairi kuruderiensi'po mo'aeapone. Dios kuruderi teynanada o'e. Konigepo dakiti ahue' huag'eritaj kenpa'ti dakhuea' huaka'eritaj Diosa huadakda o'manigkika'.<sup>36</sup> Konig opuden Apag Dios o'matinepahuika' konigti yan'matinepahuika'.

**Nog aratbuttaj dakhuea' o'ka',  
e'nopo'e'ada bahuahue'dik yane'.**

(Mt. 7.1-5)

<sup>37</sup> Nogat "Dakhuea' o'ka'," huaahue' yanika'. "Dakhuea' o'ka'," huaahue' e'ika'nayo "Dakhuea' o'ka'," Dios opudtakon huaahue' mo'ika'apone. Kenpa'ti nogomeytaj "Dakhuea' o'ka'nok mabitbitdik o'ey," ahue' yanika'. Ken konig ahue' ee'nayo "Dakhuea' o'ka'nok mabitbitdik ijjej." Diosa opudtakon onahue' mo'aeapone. Nogomeytaj bakkahuea'nayo Diosa opudtakon bokkahuea'apone.<sup>38</sup> Nogomeytaj yan'bayokti', konig en'pakte huakka' yan'bayokti'. Huakka' e'bayoknayo opudtakon huakka'nanada Diosa mo'bayokapone. Nogomeytaj sue'da e'bayoknayo kenpa'ti Diosa sue'da bo'yokapone. Nogomeytaj huakka'da e'bayoknayo Diosa opudtakon huakka'da mo'bayokapone. —Jesusa kenda o'manmadika'uyate.

<sup>39</sup> Konig huamanbatia'pakonhua' Jesusa o'manmadika'po,  
—Huabot ekpobiga' batohuahue'dik o'ne. Konigepo huakogtone'yon bakotdik o'ne. Ken konig be'api' huamanmadika'eritaj daka' peehued e'eadada Diosenba' daka' kikhued e'eadada

Diosba' nogtaj manmadikahue'dik o'ne. <sup>40</sup>Huamanmadika'erien huanigpeika'erinayo sue'da on'nopoeng'a ke'nen huamanmadika'erinayo huakka'da on'nopoika'. Nogok e'nigpeeonhuahuade'te konigti kenomeyen huamanmadika'eri o'manmadika'ika' nogomeytakon manmadika'dik o'neapo.

<sup>41</sup>Noga suepi' dakhuea' eka'nayo "Dakhuea' o'ka'," ida huaahue' yane'. Onnayo dakhuea'nanada i'kuy'etpi'. Kenda nopoehue' i'e. In konig o'e ijbatia'pakapoy. Nog aratbuten huakpoyo huata'sujsi'po ekpohuedte o'na i'tiahuaynig'a. O'nen huakpoyoa'taj huaboro'ta'sua bekpohuedne. <sup>42</sup>"Huata'suj huakpoyo oktoki', eg'." Menpa' ina'. Nama'da ia'. Ken o'nen huakpoyoa'taj huaboro'ta'sua bekpohuednig'a tiahuayhue' i'ene. Nama'da huanopoe'eri i'ene. Huakkuruda o'nen huakpoya' huaboro'ta'sutaj on huata' yakopotoken. Ken konig dakhuea' i'ka'ne yanopo'korea'po yabatik. Kenoka' i'batikde'po daka' i'tiahuaydepo nogen ta'sujkon okpotokdik i'epone. Noga nama'da eka'nayo dakhuea' e'huaka' kabatike'po tihuapokdik i'epone.

**Hueymeyen huada huadakda ee'nayo o'tiahuaypo hueymey huadakda o'e o'nopoene.**

**Konigti aratbut huadakda e'batia'pakika'nayo huadakda o'ne o'nopoene.**

(Mt. 7.17-20; 12.34-35)

<sup>43</sup>Aratbut konig hueymey o'ne. Huadak hueymey ee'nayo dakhue'daa' huada dapakhue'dik o'e. Huadakdayo' o'dapakika'. Kenpa'ti dakhue' hueymey o'epo huadak huada dapakhue'dik o'e. Dakhue'ayo' huada o'dapakika'.

<sup>44</sup>Hueymeyen huada huadak ee'nayo o'tiahuaydepo hueymey huadakda o'e o'nopoene. Hueymeyen huada dakhue' ee'nayo hueymey dakhue'da o'e o'nopoene. <sup>45</sup>Konigti bepi' huabokerek huadakda ee'nayo huadakyo' oa'ika'. Huadaknopo'da o'epo huadakyo' o'batia'pakika'. Kenpa'ti bepi' dakhue'da o'epo dakhue'yo' oa'ika'. Dakhue'nopo'da o'epo dakhue'da o'batia'pakika'. Konig huanopo'a o'e, konig o'nopoika'po ken konig o'batia'pakika'ne.

**Jesústaj huanigpeika'eri konig jak huaka'eri o'ne.**

**Jesúsa o'manbatia'pakpo o'manmadika'uyate.**

(Mt. 7.24-27)

<sup>46</sup>"Do'hued Huairi o'taene. Do'hued Huairi o'taene." Nama'da do'taj o'onika'ne. Do'taj nigpeehue' mo'ika'ne. Kenda o'nonika'ne kahue' mo'ika'ne. <sup>47,48</sup>Aya'da do'taj menhuatiakpo do'taj menigpeika'po do'hued hua'a bo'kika', konig 'urua'da jak huaka'eri daka' jak o'ka'po dariteyya' o'ka'po 'iddu boro'da adteda o'kudyapo jak o'ka'. Huekuru o'tiakdepo jakta o'pokpo daka' jak o'ka'nok tohuahue'dik o'e. Huekuru tohuahue'dik o'e. Ken konig do'taj huanigpeika'eri o'nepo, oknopoebatikhue'dik o'neapo. <sup>49</sup>Nogomeya do'taj nama'da menpeenig'a kenda ijmanay nigpeahue' o'nika'po konig dakhue' jak huaka'eri o'ne. Dakhue' jak huaka'eri kuhuadta' jak o'ka'po, 'iddu adteda kudyahue'ada jak o'ka'po. Nogok huekuru o'huetiakdepo ken jak o'huekedepo huekuru jaktaj o'tohua'po. Aya'da o'tohua'. Dakhue' jak huaka'erien jak ehue'da o'tae. Ken konig do'taj nigpeehue' huae'eri o'neapo. Ken konig e'dik o'neapo. —Kenda Jesúsa o'manmadika'uyate.

**Roma gobierno sorotataj capitánen huanaba'taj Jesúsa o'yarea'uyate.**

(Mt. 8.5-13)

**7** <sup>1</sup> Jesúsa huakka'da o'manmadikandepo o'batikdepo huakka' jak Capernaumyo o'hua'uyate. <sup>2</sup> Capernaumyo o'kudondepo Roma gobierno sorotataj capitán o'e'uyate. Capitán cien sorotataj o'mata'mona'ika'. Huadi'da huanaba' o'taepo kentaj huakka' o'pakika'uyate. Ken huanaba' dakhue'da o'epo ehue' huae'dikte o'uyate. <sup>3</sup> Jesúsa o'bayarea'deme'te o'tipeedepo sue'da judío huairitone'taj o'mata'mona'po Jesúste o'mata'mona'po. "Do'hued huanaba'taj betayarea'." Jesústaj ya'nonati'. O'mana'uyate. <sup>4,5</sup> Jesústaj onhuahua'depo digá'da on'pakpo,

—Roma sorotataj capitána oro'omey judío aratbutaj huakka'da o'pak. Oro'omeytaj di'da o'e. Oro'en huaitake' jak o'ka'uy. Konigepo capitánen huanaba'taj yayarea'. —Judío huiritone'a ighua'da Jesústaj o'nona'uyate.

<sup>6</sup> Ken huairitone'ere Jesús o'hua'uyate. Capitánte o'hua'po capitánen jak meyohue'da en'tikayopakte capitána huadi' aratbuttaj o'mata'mona'uyate. Jesúste yanhua' o'mana'po,

—Iyo do'hued jakyo kudhue' kae' konigepo o'na 'urua'da i'e. Huairi i'ene. Donayo huairi ehue'da ijjej. <sup>7</sup> Do'huada ijpakpo ontaj huahuahue' o'ene. "Kayare'," yaa'. Kenda o'na ea'te do'hued huanaba' o'yarudapo. <sup>8</sup> Do'hued sorotataj huairia menika'ne kenda ijnigpeikay. Kenpa'ti do'hued sorotataj ijmanikay do'taj mennigpeika'ne. "Yahuati'," do'hued sorotataj e'nade'te o'hua'ika'. Nogtaj "Yatiak," ena'te o'tiakika'. Do'hued huanaba'taj katepi "Yaka'," ena'nayo

o'ka'ika'. Kenpa' Jesústaj ya'nonati'. —Capitána huadi'taj o'mana'uyate.

<sup>9</sup> Kenda Jesús o'peedepo "Kenpihuay, huakka'da capitána meknopoene." Jesúsa o'nopoepo. Huakka' aratbut huatahua'eritaj Jesúsa o'batiahuay'epo, —Ken capitána huakka'da meknopoene. Huakka'da Diostaj oknopoe'. Judío aratbutnayo Diostaj sue'da o'noknopoe ijnopoej. Diostaj sue'da o'noknopoe. Buttida ijjay. —Jesúsa o'mana'uyate.

<sup>10</sup> Jakyo e'kumejde'te kenomeytaj capitán o'mata'mona'denig ogkumejdepo capitánen huanaba' e'yarede' huadakda e'ede' on'huahuayato'uyate.

**'Ayhuaensi'po huabokerek huaboa'da e'bueytada Jesúsa o'noyhuada'uyate.**

<sup>11</sup> Nogoka'da Naín huakka' jakyo Jesús o'hua'uyate. Jesús huanigpeika'eriere kenpa'ti nogomey huakka'ada on'hua'uyate. <sup>12</sup> Huakka' jak huakye'dikte o'huahua'depo huabokudak huaboa'da e'bueyde'te a'kubarakkaya'po ohuey cajónpote e'ntonohua'te Jesúsa o'tiahuay'uyate. Ken huabokerekkudak 'ayhuanen nogtida huabosi'po o'taika'uyate. 'Ayhuaere huakka'da aratbut on'hua'uyate. <sup>13</sup> Jesús Huairia 'ayhuataj o'tiahuaydepo o'tinepahui'po, —Huikhue' yae'. —Ona'uyate.

<sup>14</sup> Ken Jesús o'huahua'po ohuey cajónpota' o'tibata'tenok huantohua'eriomeya o'nontoboato'uyate. —Yanoyhuad, huabo, do'hua ijjay. —Jesúsa ona'uyate.

<sup>15</sup> Ken huaboa o'huadato'po huaboa'da aratbuttaj o'mana'pakato'uyate. Ken huabotaj huayetaj o'yokuyate. <sup>16</sup> Huakka'ada aratbut keyo o'nepo on'tiahuaypo huakka'ada on'mamepu'kudpo Diosa

'urua'nanada o'epo huadakkanada o'kika'. On'batia'pakpo,

—Diosen huamanbatia'pakeri teyda o'epo orote o'tiakde. —Onda'po, kenpa'ti,

—Diosa iyo ke'nen aratbutte o'tiakde. Oro'omeytaj mantihuapokya'pone.

—Onda'uyate.

<sup>17</sup>Kenda Jesúsa o'ka'denig on'batia'pakpo, nogya' nogya' adta'da on'batia'pakpo, Judea huadaribayo kenpa'ti Judea huadaribaya' nogya' nogya' on'batia'pakuyate.

**Jesúste Juan Bautista botta'taj o'mata'mona'uyate.**

(Mt. 11.2-19)

<sup>18,19</sup>Kenda Jesúsa o'ka'denig Juan Bautistaen huanigpeika'eria on'batia'pakdenok kenda Juana o'tipeedepo botta' huanigpeika'eritaj o'mata'mona'po, Jesúste o'mata'mona'po, “Diosa Cristotaj mo'ta'mona'apone. Cristo o'tiakapo oknopoe. ¿Menpa' o'na Cristoda i'e? ¿Oro'omey menpa' nogtaj nige'dik o'e?” Jesús Huairitaj ya'nonati'. Juana o'mana'uyate. <sup>20</sup>Kenomey Juanen huanigpeika'eri botta'a Jesústaj on'huatiakdepo,

—“¿Menpa' o'na Cristoda i'e? ¿On Cristo ehue' ee'nayo menpa' nogtaj on'mabodik o'epo oro'omeya?” Ontaj kenpa' kanone'po Juana bo'ta'mona'ne. —Jesústaj o'nona'uyate.

<sup>21</sup>Kenoka' botta' en'tiakde'te Jesúsa huakka'tada o'bayarea'po, dakhue'taj o'bayarea'po, pai'da e'nopo'ete kenomeytaj o'bayarea'uyate. Nogomeytaj toto'a e'manopo'toetada toto'taj o'maen'uyate. Kenpa'ti Jesúsa huakka' ekpobigtaj o'makpoan'uyate.

<sup>22,23</sup>—Ekpobigtaj ijmakpoani, huakkettaj ijhua'eadi, ke'poda e'so'para'taj ijbayareay, e'peokbettaj ijbayareay, huakudaka'da

e'bueytada ijmanoyhuaday. “Do'taj eknopoe'nayo Diosere onte'ti mo'noeonhuahuika'apone.” Pai'da huag'erimeytaj ijmanikay. Do'taj okbirahue' huag'erimeytaj ijmadrugpaka'apoy. Kenda e'ka'te on'tiahuayne on'peedene Juantaj yanhuahua'po yan'batia'pakti'. —Jesúsa Juanen huanigpeika'eritaj o'mana'uyate.

<sup>24</sup>Ken Juan Bautistaen huanigpeika'eri e'nokhuade'te huakka' aratbut egkupopakte Jesúsa Juantaj o'tia'pakpo,

—Nogbayo jakbahue'yo aratbut ehue' e'ika'yo opudomey bohua'uyne. Huabokerek konig teyda ehue' konig dakhue' ka'huey ahue' huag'eri konig huihuipi e'bapokte o'ika' kentaj konig a'tiahuaya'po huahue' mo'uyne <sup>25</sup>Huabokerek 'urunada yudtaj e'otte a'tiahuaya'po huahue' mo'uyne. Aratbut 'uru yudtaj on'otika'po konig katetapi' o'deretpakika'po huairien 'uru jakyoda o'nika'. <sup>26</sup>Diosen huamanbatia'pakeritaj a'tiahuaya'po jakbahue'yo bohua'uyne. Diosen huamanbatia'pakeri huadakda o'ne. Juannayo nogiti hueretnanada Diosen huamanbatia'pakeri o'ika'nok. Juantaj a'tiahuaya'po bohua'uyne. <sup>27</sup>Do'taj katiapake'po huakkuruda Diosa Juantaj o'ta'mona'uyate. Apagba'te kenpa' o'timadoya'po:

Ontaj huakkuruda do'hued huata'mona'eritaj ijta'mona'apoy. Dakhuea' ogkika'nok aya'tada yamanopo'korea'. Diosen Huasi'potaj yanoknopoe'. Aratbuttaj o'mana'apo. Apagba'te o'nigmadoya'uyate. Kenda Diosa Apagba'te mena'uyne do'taj.

<sup>28</sup>Aya'da huabokerek sue'da huadak o'nenok Juannayo huadaknada o'enek Diosa huakka' Juantaj o'pak.

Dios Huairitaj e'nigpeika'te Diosen Huasi'potaj huaknopoe'eri huadakda o'neapo. Diosa kenomeytataj huakka'nada o'baeretpakapo. Juantaj sue'damon o'pakapo. Ijjay. —Jesúsa o'mana'uyate.

<sup>29</sup>Aya' aratbuttaj kenpa'ti gobiernotaj huakupe huanigbae'eritaj Juana bautiza o'magkame'nok kenomeya Jesústaj e'peede'te “Diosa huadakda o'ka.” On'batia'pakuyate. <sup>30</sup>Moisésenba' huamanmadika'erinayo kenpa'ti fariseomeynayo konig huairi o'nepo Diostaj e'nopo'korea'ta' pakhue' o'nepo bautiza megke'po Juantaj huahuahue' o'ne'uyate. Juana konigepo kenomeytaj bautiza magkahue' o'mae'uyate. <sup>31-34</sup>Jesúsa nogiti o'mana'po:

—Aratbut oy ken konig o'nika' ijbata'pakapoy. Kenomeytaj be'api' madurugpakahue'dik o'ne. Katepi' nogomey on'pakpo ogkika'nig kenomeynayo konigti e'ka'ta' pakhue' o'ne. Kenda Juan Bautista o'kika'nig kenomeynayo pakhue' o'ne. Kenpa'ti do huabokerek ijjenok Diosa me'ta'mona'uyne konig do ijikika'nig kenda kenpa'ti pakhue'da o'ne. Juan bautista katepi' 'uru'da aypo bapehue' o'ika'po kenpa'ti vino konig sine' pai' mayhue' o'ika'po. Kenda Juana o'kika'nok toto'a Juantaj o'nopo'toe kenomeya nama'da on'batia'pakika'nig'a. Nogok do huabokerek ijjenok Diosa me'ta'mona'uyne opudere katepi' 'uruda aypo ijbapikay kenpa'ti do katepi' ijmay'ikay. Do'takon dakhuea'da menhua'pakika'ne. “Huakka'da o'papika' kenpa'ti huakka'da huamai'eri o'ika'. Kenpa'ti Jesúsa dakhuea' huaka'eritaj di'da o'maika'. Kenpa'ti gobierno huakupe huanigbae'eritaj di'da o'maika'.” Do'taj kenpa' menhuaa'ika'ne. Aratbut oy ken konig o'nika' nogda ijbata'pakapoy. Katepi'

nogomey on'pakpo ogka' kenomeynayo konigti e'ka'ta' pakhue' o'nika'. Konig huasi'po on'batuerikika'nig aratbut oy konigti o'ne. Huasi'po huakka' jak kurute on'bahuadpo on'batuerikpo nogtaj nogtaj on'mana'po, “Tete'pu'te 'uru'da o'batadi'key opudnayo oro'ere e'durugpakta' pakhue' mo'ene baila ee'ta' pakhue' mo'ene. Oro' e'bahuiktada opudnayo huikhue' mo'ene.” Ken konig huasi'poa onda'ika'. Ken konig aratbut oyda ogkika'. <sup>35</sup>Diosa 'uru'da o'nopoika'nok Diostaj huanigpeika'erinayo 'uru'da on'nopoenkika'. Kenomeyyo'da durugda o'ne. —Jesús Huairia o'mana'uyate.

**Jesús Simónen jakyo o'bape'uyate.**

**Simón fariseo aratbut o'uyate.**

<sup>36</sup>“Do'hued jakya' mobape'.”

Nogtiada fariseo aratbut Jesústaj ona'uyate. Jesús ke'nen jakyo o'hua'po kutopate o'huadpo o'bape'uyate.

<sup>37</sup>Ken ettone' o'epo huakka' jakyo huae'eri o'epo dakhuea' huaka'eri o'uyate. Jesús fariseoen jakyo o'bape' o'nopoepo Jesústaj o'huahua'po 'uruda yereda huidpu' 'uru'huieada huasihua' o'tohua'uyate. <sup>38</sup>Jesústaj hua'ita'pote o'tihuadpo o'huikpo dig'a da huakpot'a huae' Jesúsen hua'ita' o'itisuruka'po ken o'ikoyopo o'itidukutpo ettone'a huakuhui'a o'itidukutpo hua'ita' o'ibuyukepo, Jesústaj di'da o'epo o'ibuyukepo kenpa'ti di' o'epo hua'ita' 'uru'huieada huasihua'a o'ihueke'uyate. <sup>39</sup>Ken fariseo Jesústaj o'tobape'po kenda ettone' egkade'te o'tiahuaydepo “Diosen huamanbatia'pakeri Jesús ehue'dik o'e, yoknopoe'epo Diosen huamanbatia'pakeri ee'nayo in ettone' dakhuea' huaka'eri o'e, ya'nopoeyet.” Kenda fariseoa huanopoya' nama'da o'nopo'e'uyate.

<sup>40</sup>Jesúsa kenda joknokotpo,

—Ontaj e'batia'pakta' ijpak, Simón.

—Jesúsa fariseotaj ona'uyate.

—Mena', Huamanmadika'eri.

—Fariseoa ona'uyate.

<sup>41</sup>—Huakupe huabaktoyokeritaj botta' huabokereka huakupe dehuea' o'nyuayate. Nogtiada quinientos denario huakupe dehuea' o'uyate. Noga cincuenta denario huakupe dehuea' o'uyate. <sup>42</sup>Huakupebayo' o'nepo tahuahue'dik o'nenok huakupe huabaktoyokeria huabokerek botta'taj huakupetaj betahua' e'manata' pakhue' o'epo o'batiokkahue'uyate. Oy, ¿mena'taj di'da e'dik ya'e? —Jesúsa fariseotaj ona'uyate.

<sup>43</sup>—Ke'na huakka'da dehuea' o'epo kentaj huakka'da o'batiokkahue'uyate, ke'na huakka' di' o'e, ijnopopo.

—Simóna ona'uyate.

—Buttida ia'ne. —Jesúsa ona'uyate.

<sup>44</sup>Ken Jesúsa ettone'taj huatiahua'ya'a', Simóntaj,

—In ettone'taj yatiahua'y'. O'nen jakyo ijkudondey. Hua'ita' a'ikoyoya'po hue'ey yokhue' me'ene. In ettone'nayo huakpotá'hueá be'ikoyoa'po kenpa'ti huakuhui'a be'itidukutne. <sup>45</sup>O'nanayo buyukhue' o'ene. Ettone'anayo huaboa'da do e'kudte be'ibuyukene.

<sup>46</sup>E'kudonde'te huakuta' do'taj huasihuaj kutioyhue' o'ene. Ettone'anayo 'uru'huie'ada huasihuaj be'itioyne. <sup>47</sup>Ettone' huakka' dakhuea' e'ka' Diosa okkahuea'nok ettone' huakka' di' me'edene. Kentaj Diosa sue'da okkahuea'nok sue'da di' me'ene.

—Jesúsa Simóntaj ona'uyate.

<sup>48</sup>Ettone'taj,

—On dakhuea' i'ka'uyatenig okkahuea'ne. —Jesúsa ona'uyate.

<sup>49</sup>Nogomeya' kutopata' on'batobape'po huayahua'ya on'batia'pakpo,

—Ken huabokereka dakhuea' e'ka' okkahuea'de. Konig Diosa okkahuea'

ke'na dakhuea' e'ka'taj okkahuea'.

¿Be ya'e? —Aypo huatobape'eria on'batia'pakuyate.

<sup>50</sup>Ettone'taj,

—Do'taj oknoponenok Diosa ontaj bekkahuea'po me'nopo'yarea'ne. Daknopo'da yaepo yahuati'. —Jesúsa ettone'taj ona'uyate.

#### **Ettone'a Jesúsomey huá'eritaj on'tihuapokuyate.**

**8** <sup>1</sup>Nogok nogyo nogyo huakka' jakyo Jesús o'hua'epo huakka' jakyo huadak hua'a Diosen huairi okyeyakde Dios huairitaj yanoknopoepo yan'nigpeika', o'manmadikika'uyate. Jesúsen doce huamata'mona'eri kenere on'hua'udhua'po. <sup>2</sup>Ettone'ere o'hua'epo toto'a e'manopo'toetada Jesúsa o'manopo'yareame'te toto' o'makenme'te. Nogomey ettone'taj o'bayareame'te. María Magdalena Jesúsero o'ika'uyate. Jesúsa Maríataj siete toto' okmaename'te. <sup>3</sup>Juanakon Jesúsero o'ika'uyate. Juana Chuzaen huatoe o'uyate. Chuza Huairi Herodesen jak huatoe'eri o'uyate. Kenpa'ti Susana Jesúsero o'ika'uyate. Nogomey ettone' sue'da huakka' Jesúsero o'nepo Jesúsomey huá'eritaj katepi' on'paknok on'bayokika'uyate. Aypopi' yudtapi' on'bayokika'po kenpa'ti on'tihuapokika'uyate.

#### **Huabakidena'eri ken konig ogkika' o'manbatia'pakpo o'manmadika'uyate.**

(Mt. 13.1-9; Mr. 4.1-9)

<sup>4</sup>Huakka'ada aratbuta Jesústaj on'huahua'uyate. Nog jak nog jakya' on'huahua'po Jesústaj on'tikupopaknok huabakidena'eri ken konig ogkika' Jesúsa o'manbatia'pakpo o'manmadikanhua'uyate.

<sup>5</sup>—A'bakidenaya'po huabakidena'eri o'hua'uyate. O'hua'epo o'bakidena'po



dagte sue'da o'kidkahuapo hua'ia o'bakidtuḡe'a'po kenpa'ti nogte bakoya o'kidye'kuyate. <sup>6</sup>Huidbate kuhuadonokparedte sue'da o'kidkahuad. Ida o'kereknig'a. Kuhuadonokparedte dariayda o'ḡenok ida o'ay'uyate.

<sup>7</sup>Nog huakid okpota'pidsi'bayo o'kidkahu'uyate. Huakpi sue'da o'batipakbonig'a okpota'pidsi' dig'a'da o'bakerekpo huakpitaj o'batibuk'uyate.

<sup>8</sup>Nog huakid huadak sorokte o'kidkahu'uyate. O'batipakbodepo huakka'da huakid ogkupapakuyate. Sue'da huakpi cien huakid ogkupapakpo noga sue'da huakid ogkupapakuyate.

—Jesúsa kenda e'mana'te,  
—Huadakpeok e'huaḡa daka' men'pee'.  
—Jesúsa 'utta'da o'mana'uyate.

**Jesúsa o'manbatia'pakpo  
o'manmadika'uyatenok huakka'a  
nopenkahue'dik ya'neapet.**

(Mt. 13.10-17; Mr. 4.10-12)

<sup>9</sup>—Ken huakidena'eri ken konig o'ka' huaboa'da oro'taj on'batia'paknig nopenkahue'da o'ey. Oro'taj daka' mo'nopoḡa'. —Jesúsen huanigpeika'eria Jesústaj o'nona'uyate.

<sup>10</sup>—Opudomey do'hued huanigpeika'eri mo'ḡenok konig aratbut Diosen Huakhuairitaj on'nigpeika'apo, konig buttida o'ḡapo Diosa opudomeytanayo e'manopoḡa'ta' o'pak. Nogomeytaj do'hued huanigpeika'eri ehue'taj nogda ken konig o'ḡe ijmanbatia'pakikay. Kenda e'mapeḡeada nopenkahue' o'neapo. —Jesúsa huanigpeika'eritaj o'mana'uyate.

**Huakidena'eri konig o'ḡe  
a'nopenkaya'po Jesúsa  
huanigpeika'eritaj daka'  
o'manopoḡa'uyate.**

(Mt. 13.18-23; Mr. 4.13-20)

<sup>11</sup>—Ken huakidena'eri ijmanopoḡa'apoy. Ken huakid konig

Diosen hua'a o'ḡe. <sup>12</sup>Dagte sue'da o'kidkahu'uyate. Ken huakid dagte o'kidkahu'uyate konig sue'da aratbut Diosen e'manmadika'taj on'peenig'a ida toto'a o'huahua'po huanopoya' Diosen hua'a o'bakkaynok onte'ti Diostaj oknopoḡehue'dik o'neapo onte'ti nopo'yareahue'dikda o'neapo. <sup>13</sup>Huidbate sue'da o'kidkahu'uyate.

Ken konig aratbut Apagba' en'peeatu'te durugda on'peeatunig'a konigḡepo daka' nigpeonhuahuahue' o'nepo sue'da on'nopoenka'po sue'da huame'noe o'noknopoehua'po toto'a nama'da e'manade'te onte'ti Diostaj nigpeḡehue' o'nepo kenpa'da okkahue'dik o'neapo. <sup>14</sup>Huakid okpota'pidsi'bayo o'kidkahu'uyate. Ken konig aratbut Diosen e'manmadika'taj on'peeapo on'peenig'a nogok nogta' nogta' on'mamepu'kepo onte'ti sig sig Diostaj o'noknopoḡebatikapo. Kenpa'ti huakka' e'ta'maeta' on'pakpo sig sig Diostaj o'noknopoḡebatikapo. Kenpa'ti huata'da e'durugpaka'ta' on'pakika'po onte'ti Diostaj pakhue' o'neapo, nigpeḡehue' o'neapo. Diosen kahue' o'neapo. <sup>15</sup>Ken huakid huadak sorokyo o'kidkahu'uyate. Ken konig aratbut huadaknopo'da Diosba'taj on'peeonhuahuika'po on'nigpeeonhuahuika'. Daka' konig 'urunopo'da on'nigpeeapo batikhue'da huadakda ogkika'apo. Kenomey Diosensi'po o'ne, huakka'ada on'nopoḡeapo.

**Jakkiregya' huakjeytaj  
o'batia'pakpo o'manmadika'uyate.**

(Mr. 4.21-25)

<sup>16</sup>Sikyo jakkiregya' huakjey e'bakpakte kosoa tiokkubukhue'dik o'nika'. Kenpa'ti huakjey e'bakpakte huataytoyo huadahue'dik o'nika'. Kutopate huakjey on'huada'ika'. Jakyoda aya'ada on'kuddepo

tiahuaydik ka'ne'po. <sup>17</sup>Ken konigti Diosen e'nopoꝑe' oy konig e'ireg ee'tada nogok aya'ada on'nopoꝑeapo, aya'ada on'tiahuayapo.

<sup>18</sup>Ken, daka' Apagba'taj yan'pee' konigepo sue'da e'pee'nayo sue'da eknoꝑoꝑe'nayo Diosa bo'tihuapokapone nogiti nogiti Diostaj moknoꝑoꝑeapo, nogiti nogiti Diostaj mo'nigpeꝑeapo. Daka' peehue' ee'nayo Diosba'taj oknoꝑoꝑehue' ee'nayo kenda mo'nopoꝑe Diosa bokkayapone onte'ti oknoꝑoꝑehue'dikada mo'eaꝑone. —Jesúsa o'manmadika'uyate.

**Jesúsen huaye Jesúsen huama'buyere Jesústaj on'huatiakuynig'a.**

(Mt. 12.46-50; Mr. 3.31-35)

<sup>19</sup>Kenoka' Jesúsen huaye Jesúsen huama'buyere Jesústaj onhuatiakuynig'a huakka'nanada ogkupopaknok kentaj huatiakhue'dik o'ne'uyate.

<sup>20</sup>—O'nen huaye o'nen huama'buyere aratbuttiokpeyon mo'nigbone. Ontaj e'batia'pakta' on'pak. —Noga Jesústaj o'nonatu'uyate.

<sup>21</sup>—Be'api' Diosen hua'a on'peepo on'nigpeꝑe konig ogkika' ke'na do'hued huaye o'ne, do'hued huama'buy o'ne ijnoꝑoꝑe. —Jesúsa aya' huakupopakeritaj o'mana'uyate.

**Jesúsa e'hueniri'tone'taj bapoka'tere o'batikan'uyate.**

(Mt. 8.23-27; Mr. 4.35-41)

<sup>22</sup>Nogok Jesús huanigpeꝑika'eriere huaboa'da kusi'petone'yo on'bahuadpo, —E'pog monokteg. —Jesúsa o'mana'nok huaboa'da o'nehua'uyate.

<sup>23</sup>Ken e'nonoktegte kusi'peya' Jesús o'tay'uyate. E'pognopoya' ida huaboro'bapokada o'bahuatiakpo. Teya'da o'bapoknok huaboro' o'hueniri'tone'po diga'da o'huekudpo

o'tihuedpo huata'kotdikte o'uyate.

<sup>24</sup>Jesústaj on'huahua'po a'maboaya'po, —Huamanmadika'eri, Huamanmadika'eri, montakotnede. —Jesústaj o'nona'uyate.

Ken Jesús o'mabodpo, “Yabatik, bapokhue' yae'.” Kenpa'ti, “Yabatik, huenirihue' yae'.” Jesúsa ona'nok o'batikanpo bapokhue' o'uyate kenpa'ti huenirihue' o'uyate.

<sup>25</sup>—Mena'po do'taj oknoꝑoꝑehue' mo'e, —Jesúsa huanigpeꝑika'eritaj o'mana'uyate.

Kenomeynayo Jesústaj on'tome'pukepo huayahuaya, —¿Kenpihuay, be in huabokerek ya'e? Bapokataj ona'nok o'nigpeꝑe kenpa'ti e'pogtaj ona'nok e'pogakon o'nigpeꝑe. ¿Kenpihuay, be ya'e? —Huanigpeꝑika'eria huayahuaya on'manbatia'pakuyate.

**Gadara huadaribayo nogbokerektatida huakka' toto'a on'nopo'toꝑe'uyate.**

(Mt. 8.28-34; Mr. 5.1-20)

<sup>26</sup>Ken akodpen Gadara huadaribayo on'tiakpo on'be'tuyate. Gadara e'dea' akudpen Galilea o'e. <sup>27</sup>Jesús e'kotde'te Jesústaj nogbokerektatida huakka' jakya' o'huatiakonpo. Ken huabokerektaj huakka' toto'a on'nopo'tounhuahua'uyate. Yudtaj othue' o'unhuahua'uyate. Jakyo ehue' o'ikame'te. Kubarakbayo o'unhuahua'ika'uyate. <sup>28</sup>O'tiahuaydepo Jesústaj huikudate o'tisakotuyate. O'okoypo,

—¿Mena'po do'taj o'huatiak, Jesús? Dios kutayo huae'erien Huasi'po i'e. Do'taj ogkahue' mee'. Diga'da ona'ne. —Huabokereka 'utta'da Jesústaj ona'uyate.

<sup>29</sup>Kenpa' enade'te Jesúsa toto'taj huamaena'dikte o'uyate. Nogok nogok huakka' toto'a on'nopo'toikame'te.

Aratbuta kentaj sirobia huaba' kenpa'ti hua'i on'tinukupo daka' a'toeya'po.

On'tinukunig'a ken huabokereka o'tipukpukanika'uy. Aratbut ehue' e'ika'yo toto'omeya on'tohua'uyate.

<sup>30</sup>—¿Katedik i'e? —Jesúsa

huabokerektaj ona'nok,

—Do'hued huadik “Huakka” ijjej.

—Ona'uyate.

Kenda ona'nigtaj huakka' toto' kentaj on'nopo'toika'uyate.

<sup>31</sup>—Sorokkogyo adyonda dakhuea' toto'omeya pai'da on'nopo'eunhuahuika'apo. Keyo oro'omeytaj mata'monahue' moe'.

—Toto'omeya Jesústaj o'nona'uyate.

<sup>32</sup>Kente ote'te huakka'da huakyari' on'pe'nok,

—Huakyariere a'eya'po yan'kud.

Mona'. —Jesústaj diga'da o'nona'nok,

—Yan'kud. —Jesúsa toto'taj

o'mana'uyate. <sup>33</sup>Ken toto'a huabokerektaj o'nenonpo o'nokhua'po huakyaritaj on'huankudonpo ken huakyari' aya'da huaduk o'bahuarakpo kubogyo on'baajpo e'pogyo o'bata'ko'tuyate. Toto'ere on'bata'ko'tuyate.

<sup>34</sup>Ken huakyari' huatoe'eri kenda on'tiahuaydepo on'mame'puke'po kenda a'manbatia'pakya'po huakka' jakyo on'bake'tuyate. Kenpa'ti ta'baya' a'manbatia'pakya'po on'hua'uyate.

<sup>35</sup>Kenda on'pe'edepo monig Jesúsa yaka' a'tiahuaya'po huakka' jakya' huakka'ada on'maorokondepo Jesústaj on'huahua'po on'huatiakdepo ken huabokerektaj huakka' toto' huaboa'da e'nokbahua'de' on'tiahuaypo, ken huabokereka Jesúsen hua'ite o'huadpo, yudtaj o'otpo, kenpa'ti oyda huadakda o'e. Ken huabokerektaj on'tiahuaydepo on'me'puke'uyate. <sup>36</sup>Aratbut keyo Jesúserere e'huaea on'tiahuaydepo kenda Jesúsa o'ka'de eatiahuaya on'manbatia'pakpo huakka' jakyo

huae'eritaj on'manbatia'pakpo, konig kentaj huakka' toto'a e'nopo'tounhuahuika'de'te Jesúsa o'yarea'denig, on'manbatia'pakuyate.

<sup>37</sup>Kenda on'pe'edepo aya' aratbut Gadara huadaribayo huae'eri keyo ogkupopakdepo huakka'da onme'pukpo,

—Oro'edbaya' yahuade'. —Jesústaj ighua'da o'nona'nok. Jesús kusi'petone'yo o'huadpo huahua'dikte o'enig'a <sup>38</sup>huahued ee'ted ken huabokereky'a' toto'a huaboa'da o'nokhua'de ke'na Jesúserere e'hua'ta' o'pakpo,

—Onere e'hua'ta' ijpak. —Jesústaj ona'nok.

—Doere huahue' yae'. <sup>39</sup>O'nen jakyo yahuati'. Ayo o'nenbaya' yamanbatia'pak. Aya'da Diosa menigka'dene yamanbatia'pakhuati'. —Jesúsa ken huabokerektaj ona'uyate. Kenpa' ona'depo Jesúsa o'hua'uyate.

Ken huabokerek a'manbatia'pakuaya'po o'hua'po ke'nen jak huae'eritaj Jesúsa huakka' toto'taj mekmaename'ne, be'yareame'ne o'manbatia'pakhua'uyate.

**Jairoen huayqubtaj  
o'noyhuada'uyate. Kenpa'ti  
ettone' Jesúsen yudtaj o'nejdepo  
o'yarud'uyate.**

(Mt. 9.18-26; Mr. 5.21-43)

<sup>40</sup>Jesús akudpen onte'ti o'kumejdepo huakka'ada aratbuta o'nonmabopo ogkupopakpo durugteda huabada on'de'uyate. <sup>41,42</sup>Ken huabokerek Jairodik o'tiakuyate. Jairo judfoen huaitake' jak huairi o'uyate. Jairo Jesúsen hua'ite huikudate o'tisakotpo,

—Nogtida huayetsi'po me'taene. Doce años o'epo ke'poda o'epo huabueydikte mekene. Betayarea', do'hued jakyo yahua'. —Jesústaj ighua'da ona'uyate.

Ken Jesús e'hua'te huakka'ada aratbut ogkupopakpo Jesústaj huakka'ada aratbutpoya' andaya'po o'nogka'uyate.

<sup>43</sup>Ettone' o'epo huakka' aratbutere o'epo ke'na dakhue'da o'epo mimi batikhue' o'unhuahuika'po doce huabayok o'tipokde batikhue'da o'unhuahuika'uyate. Nogtaj nogtaj huamadakka'eritaj o'bahuahuae'ika'uyate.

Huamadakka'eritaj aya'da ke'nen huakupe gasta o'tika'onhuahua'uyate. Huamadakka'eritaj e'yoktada yareahue' o'uyate. <sup>44</sup>Jesústa'piyen o'huatiakpo, yudta'jok huakubogpita' o'nejpo, o'nejdepo mimi o'batikonpo o'yarud'uyate.

<sup>45</sup>—¿Be'a me'nej? —Jesúsa oa'uyate.

Ehue' be'a nejhue' meene, aya'ada on'batia'pakpo

—Huakka'ada aratbutpoya' ontaj monda'ene andaya'po mogka'ne. “¿Be'a me'nej?” ¿Mena'po ia'? —Pedro nogomeyere Jesústaj o'nona'uyate.

<sup>46</sup>—Be'api' me'nejne ijnopoe y konigepo betapi' ijyarea'dey huanopo'ada ijnopoe y. —Jesúsa o'mana'nok.

<sup>47</sup>Do'taj be'yareadne Jesúsa me'tinopoe ettone' o'nokotdepo ome'pukpo o'iriga'po Jesústaj o'huahua'po Jesúsen hua'ite huikudate o'tisakotuyate. Huakka' aratbuttaj kan'pee'po kena'po Jesústaj ijnej kenpa'ti konig idada be'yareaddene ettone'a o'batia'pakuyate.

<sup>48</sup>—Do'taj oknopoenok o'yareaddene. Dakda yahuati'. —Jesúsa ettone'taj ona'po.

<sup>49</sup>Jesúsa ettone'taj e'batia'pakde'te Jairo huaitake' jak huairien jakya' huabokerekakon okyeyakpo,

—O'nen huayetsi'po o'bueyde. Huamanmadika'eritaj totiakhue' yae'. —Jairotaj ona'uyate.

<sup>50</sup>Jesús kenda o'peepo,

—Me'pukehue' yae'. Do'hua o'yarea'apo meknopoe. O'nen huayobu o'yarudapo. —Jesúsa Jairotaj ona'uyate.

<sup>51</sup>Jesús jakyo okyedeipo, “Ettone'si'poen huaye huaojere Pedroere Jacoboere Juanereyo'da kuddik o'ne. Nogomeynayo kudhue'dik mo'ene.” Jesúsa o'mana'uyate. <sup>52</sup>Huakka' aratbut on'kupopakdepo ettone'si'po e'bueyta' en'bahuikte,

—Huikhue' yane'. Mune'yosi'po bueyhue' o'e. O'taypo o'e. —Jesúsa o'mana'uyate.

<sup>53</sup>Jesústaj on'peepo on'tierikpo ettone'si'po kenpa'da o'bueydenig'a oa' on'nopoe'uy. <sup>54</sup>Jesúsnayo mune'yoen huaba'ta' o'ba'padpo,

—Yabo', mune'yosi'po. —Jesúsa 'utta'da ona'uyate.

<sup>55</sup>Ke'na o'noyhuaddepo ida o'bod'uyate.

—Aypo yan'yok. —Jesúsa o'mana'uyate.

<sup>56</sup>—Kenpihuay. —Mune'yoen huaoj huayereera o'da'uyate.

—Kenda ijkay manbatia'pakhue' yane'. Betapi' manbatia'pakhue' yane'. —Jesúsa o'mana'uyate.

#### Doce huanigpeika'eritaj Jesúsa o'ta'mona'uyate.

(Mt. 10.5-15; Mr. 6.7-13)

**9** <sup>1</sup>Doce huanigpeika'eritaj Jesúsa “Inta' mogkupopak,” o'mana'po. On'kupopakdepo, “Doa o'nona'nok nogda nogda dakhue' toto' nokiregtaj maendik mo'epone kenpa'ti aya' aratbut dakhue' ee' bayarea'dik mo'epone.” Kenda Jesúsa o'mana'uyate. <sup>2</sup>Docetaj Jesúsa o'mata'mona'po huadak hua'a konig aratbut Dios Huairitaj o'noknopoeapone on'nigpeika'apone. Kenda doce kan'manmadike'po kenpa'ti dakhue'taj kan'bayare'po docetaj Jesúsa o'mata'mona'uyate.

<sup>3</sup>—Yanhua huudhuahuika'po dagte ka'tepi' tohuahue' yanikati'. Oteypaj tohuahue' yane'. Cuperina yudtaj mantoahue' yane'. Huenpu tohuahue' yane'. Aypo tohuahue' yane'. Huakupe tohuahue' yane'. Nogtida 'opiot yan'ot. Botta' 'opiot tohuahue' yane'. <sup>4</sup>Huakka' jakyo bo'kuddepo ken jakyo huaboa'da bo'tayapet keyoyo'da yanikati'. Nogen jakyo huahue' yane'. Ken huakka' jakya' en'bahuade'te keyoda yanikati'. <sup>5</sup>Ken huakka' jakyo opudomeytaj e'peeta' pakhue' e'ne'te ken huakka' jakya' yan'bakhua'. Bohua'depo soroka e'itimabette yan'itihuekead. Ken huakka' jak huage'eriomey on'tiahuaydepo on'nopeapo kenda ogka'de dakhuea'da Diostaj o'enok ogka' on'nopeapo. —Jesúsa docetaj o'mana'uyate.

<sup>6</sup>Ken doce huanigpeika'eri on'bahua'udhuahuika'po, nog huakka' jakyo nog huakka' jakyo on'hua'po huadak hua'a on'manbatia'pakpo dakhue' huage'eritaj on'bayarea'uyate.

**Konig Juan Bautista o'buey'uyate.**

(Mt. 14.1-12; Mr. 6.14-29)

<sup>7</sup>Herodes Roma huage'eri gobiernu huairi o'epo Jesústaj tiahuayhued o'epo kenda Jesús o'kika'nig o'tipeedepo huaboa'da o'nopepo o'mepu'kepo Herodes Juantaj on'huerenokteg'uy. Juan e'bueyada o'noyhuadme'te sue'ada on'batia'paknok, Juan o'e Jesústaj o'tinopepo o'mepu'ke'uy Herodes. <sup>8</sup>“Diosen huamanbatia'pakeri Elíaskudak kurudya' o'huarakdenok kentaj o'tiahuayikay Jesús o'etaj.” Nogomeya on'batia'pakpo, “Diosen huamanbatia'pakerikudak nogtida o'noyhuadme'te Jesús o'etaj.” Nogomeya on'batia'paknok Herodes o'mepu'kepo,

<sup>9</sup>—Juantaj yan'huerenokteg ijmana'mey. Jesústaj e'manbatia'pak ijpeey. Jesús be ya'e. —Herodesa

o'po. Jesústaj a'tiahuaya'po Herodesa o'uk'uyate.

**Cinco mil huabokerektaj Jesúsa aypotaj o'bia'po o'batobape'uyate.**  
(Mt. 14.13-21; Mr. 6.30-44; Jn. 6.1-14)

<sup>10</sup>Jesúsen doce huata'mona'eri on'kumejdepo kenda o'ka'mey Jesústaj o'nonbatia'pakuyate. Ken doce huamata'mona'eritaj o'batohua'uyate. Huakka' jak Betsaidayon on'bahua'po kente aratbut ehue'yo on'bahua'uyate. <sup>11</sup>Jesús o'pokonde on'tipeepo huakka' aratbut huakka' jakya' on'nokotondepo Jesústaj on'tahua'uyate. Jesúsa o'baedpo kenpa'ti huadak hua'a konig aratbut Dios huairitaj o'noknopoeapone mo'nigpeepone Jesúsa o'manmadika'po kenpa'ti aratbut dakhue' e'ne'te o'bayarea'uyate.

<sup>12</sup>Huaboa' e'sikonyakte Jesúsen doce huata'mona'eria Jesústaj on'huahua'po —Iyo katepi' jak ehue' o'e, aratbut ehue' o'ne, aypo ehue' o'e, konigepo huakka' aratbut egkupopakte kan'taye'po kan'bape'po huakka' jakyo meyhue'da yamata'mona'. —Jesúsen doce huata'mona'eria Jesústaj o'nona'nig'a,

<sup>13</sup>—Opudomeya aypo yan'bayok. —Jesúsa docetaj o'mana'uyate.

—Ehue'da togehue'da o'ey. Cinco panes dos biigyo'da o'toey. Biig aypoere kanokayatue'po menpa' oro'taj e'ta'mona'ta' o'tipak. —Docea Jesústaj o'nona'uyate.

<sup>14</sup>Ken, cinco mil huabokerek o'ne'uyatepi'.

—Yan'bahuad. Yan'mana'. Cincuenta huakupo huakupoa' yan'bahuad yan'mana'. —Jesúsa huanigpeika'eritaj o'mana'uyate.

<sup>15</sup>Kenda on'mana'nok aya'da on'bahuad'uyate. <sup>16</sup>Ken, Jesús huaba'te cinco panes botta' biigere o'bapadpo kurudyo o'mabopo Diostaj dakiti

o'tiona'pakdepo panes o'posakea'po biigkon okpukpukpo huanigpeika'eritaj o'bayokenok huanigpeika'eriomeya huakka'da aratbuttaj on'bayoke'uyate. <sup>17</sup>Aya'ada on'bape'po dapoteymeya' ogka'uyate. On'bape'depo doce kusogyo huata'suj hueda'da on'dohuea', huaboro' huaenmo boro'ta'sujmonere on'tihueda'uyate.

**Diosen Cristo i'ene. Diosa kurudya' meta'mona'uyne. Pedroa Jesústaj ona'uyate.**

(Mt. 16.13-19; Mr. 8.27-29)

<sup>18</sup>Nogok nogme'noete aratbut bahue'yo huanigpeika'erieroyo'da Jesúsere o'nepo Jesúsua o'tiona'pakpo, o'tiona'pakdepo huanigpeika'eritaj —¿Be'a ijje do? ¿Katia' do'taj aratbuta menhuaika'? —Jesúsua o'mana'uyate.

<sup>19</sup>—Juan Bautista ke'na o'e. Sue'ada bo'huaa'ika'ne. Noga Elías ke'na o'e. Bo'huaa'ika'ne. Nogomeya nogtida Diosen huamanbatia'pakerikudak a'nennada o'uyatenig, o'noyhuadde, kena o'e. Bo'huaa'ika'ne.

—Huanigpeika'eria Jesústaj o'nona'uyate.

<sup>20</sup>—¿Opuda katedik o'e do'taj on'tinopo'e? —Jesúsua huanigpeika'eritaj o'mana'nok.

—Diosen Cristo i'ene. Diosa kurudya' ontaj meta'mona'uyne. —Pedroa ona'uyate.

**“Ijbueyapoy.” Jesúsua o'mana'uyate.**

(Mt. 16.20-28; Mr. 8.30-9.1)

<sup>21</sup>—Kenda Pedroa huaboa'da mena'nig manahue' yane'. —Jesúsua ihgua'da o'mana'uyate. Kenpa'ti

<sup>22</sup>—Do huabokerek ijjeipo Diosya' ijtiakuy. Huakka'da pai'da ijnopo'eapoy. Judío huairitone', sacerdote huairi, kenpa'ti Moisésenba' huamanmadika'eriere do'taj pakhue' o'nepo men'arakapone. Bapa'me'noe

e'pokde'te Diosa me'noyhuada'apone. —Jesúsua o'mana'uyate.

<sup>23</sup>Aya'tada o'mana'po,

—Be'api' do'hued e'manmadika' e'ka'ta' e'paknayo katepi' hua'enda on'pak ona'ti eretpakhue' ka'ne'. Ona'ti do'huedyo'da kan'pakike'. Konig cruzte pai'da ijnopo'eapoy konigti kenomeyakon pai'da kan'nopo'e.

Kenpa'ti do'taj do'hued en'mana'taj men'nigpeike'. <sup>24</sup>Kenomey kenpa'da hua'enda on'pakpo Cristoere kurudyo onte'ti noeonhuahuikahue' o'neapo.

Kenomey kenpa'da hua'enda pakhue' o'neapo, Diostayo'da e'nigpeeta' huakka' on'pakpo onte'ti Diosere o'neonhuahuika'apo. <sup>25</sup>Be'api' huabokerek katetapi' huakka'ta'da on'eretpakpo on'bae'ika'po do'taj e'nigpeeta' pakhue' o'neapo kenpa'da on'bueyapo. Diosyo noeonhuahuahue' o'neapo.

Huakka' on'matoeipo Diosyo huahue'dik o'neapo. <sup>26</sup>Do'taj e'nokbira'nayo kenpa'ti do'hued e'manmadika'taj en'tobira'nayo nogok do ijtiakdepo kenomeytakon ijbakbira'apoy. Huabokerek ijjenok

Diosa me'ta'mona'uyne konig Apag Dios huakhuairionig ijjeipo, 'urua'da ijjeipo, Diosya' kurudya' ijhuarakdepo kenomeytakon ijbakbira'apoy. Kenpa'ti ijhuarakdepo konig Diosen huata'monerionig 'urua'da ijjeapoy.

<sup>27</sup>Opudomey sue'da iyo mo'ening'a bueyhued mo'eipo huakka'tada Dios Huairitaj e'noknopoika'te en'nigpeika'te mo'ba'tiahuayapet. Buttida ijjay. —Jesúsua aya'tada o'mana'uyate.

**Jesúsua o'jeypakatu'uyate.**

(Mt. 17.1-8; Mr. 9.2-8)

<sup>28</sup>Jesúsua kenda eade'te ochopi' huame'noe e'pokde'te Jesús ote'yo o'behuikpo a'tiona'pakya'po o'behuikpo Pedroere Jacoboere

Juanere on'behuik'uyate. <sup>29</sup>Jesúsa o'tiona'pakdepo Jesúsen huakok kokeyda o'etuy kenpa'ti yudtaj keregnada o'etuy kenpa'ti senogda o'etuyate. <sup>30</sup>Ken kenta' Jesústaj botta' huabokereka on'bopo on'batia'pakpo adhuesa'pane' Moisés kudak kenpa'ti adhuesa'pane' Elíaskudakere on'batia'pakpo <sup>31</sup>'urua'da konig jeynanada o'nepo ken konig Jesús paí'da o'nopo'eapo Jerusalén'ya' kenpa'ti ken konig o'bueyapo on'batia'pakuyate. <sup>32</sup>Pedromey digá'da taytaya' e'ada tayhue' o'nepo Jesústaj on'tiahuaypo Jesústaj 'urua'da jeynanada on'tiahuaypo. Kenpa'ti nog botta' huabokerektaj on'tiahuaypo Jesúsere e'ne'te on'batiahuay'uyate.

<sup>33</sup>Huabokereka Jesústaj e'nokhua'de'te —Oro' iyo o'epo huadakda o'e. Bapa' bak o'kai'. Ontehuapa' nogtida Moisés'taj nogtida kenpa'ti Elíastaj nogtida bak o'kai', Huamanmadika'eri. —Pedroa Jesústaj ona'uyate.

Pedroa koniga' oa' nopoehue'ada oa'uyate. <sup>34</sup>Pedro kenda eade'te e'sihui'a kenomeytaj o'batibuk'uyate, E'batibukte on'mepukpo. <sup>35</sup>E'sihuiya' on'peepo,

—In do'hued Huasi'po me'taene. Huadi'da me'taene kentaj yan'pee'. Ken e'sihuiya' on'pee'uyate.

<sup>36</sup>Kenda Diosa eade'te Jesústayo'da on'tiahuay'uyate. Soatayo' o'nepo kenda huaboa'da on'tiahuaydenig batia'pakhue' o'neonhuahua'uyate.

**Huasi'potaj toto' nokirega  
o'nopo'to'epok dakhue'da ee'tada  
Jesúsa o'yarea'uyate.  
(Mt. 17.14-21; Mr. 9.14-29)**

<sup>37</sup>Eme'te ote'ya' Jesúsomey e'huarakde'te huakka'ada aratbut Jesústaj on'huahua'uyate.

<sup>38</sup>Huakka'ada aratbut egkupopakyo nogtiada huabokereka 'utta'da ona'po:

—In do'hued nogsi'potida me'taenig yatiahuay'. <sup>39</sup>Toto'a o'nopo'to'epok o'sagkia'ika', o'iriga'ika', huakittaya' kutajpoa' o'orokika'po, kenpa'ti huasi'potaj digá'da ogkadhuahuika'po e'enonta' pakhue' o'e. <sup>40</sup>“Toto'taj yanta'mona'.” O'nen huanigpeika'eritaj ijmana'denig'a okenhue'dik o'neme', Huamanmadika'eri. —Huabokereka 'utta'da Jesústaj ona'uyate.

<sup>41</sup>—Opudomey aratbut oknopoehue' huae'eri mo'epo, dakhuea'da mo'ika'ne. Opudere huakka'da huame'noe ikahue'dik ijjeapoy. Opudomeytaj nogok nogok peehue'dik ijjeonhuahuika'apoy. O'nensi'potaj yatotiak. —Jesúsa ona'uyate.

<sup>42</sup>Huasi'poa Jesústaj e'huahuade'te toto'a barakte o'huekanpo o'iriga'uyate. Toto'taj,

—Keje', kenpa'da yakhuati'. —Jesúsa toto'taj enade'te huasi'potaj o'yaread'uyate. Huasi'po huadakda e'unde'te ke'nen huaojtaj o'yokuyate.

<sup>43</sup>—Kenpihuay ijjay, Dios kutayo huaboro'da o'epo 'urua'da o'epo konig teyda o'kika'. —Aya'ada on'batia'pak'uyate.

**“Do'taj me'darakapone.” Onte'ti  
Jesúsa o'batia'pak'uy.  
(Mt. 17.22-23; Mr. 9.30-32)**

Ken 'urua'da Jesúsa o'kika'nok aya'ada, “Kenpihuay,” en'batia'pakte huanigpeika'eritaj,

<sup>44</sup>—Daka' yan'pee'. Okkahuehue' yane'. Do huabokerek ijjenok Diosa me'ta'mona'uyne. Do'taj huairiomeytaj menyokapone. Huairiomeya do'taj dakhuea'da ka'nogke'po menyokapone. —Jesúsa huanigpeika'erimeytaj o'mana'nig'a <sup>45</sup>huanigpeika'eri nopenkahue' o'nenok konig Diosa o'makirega'po manopenkahue' o'maea'nok. “¿Monig ya'e?” Anai' e'nopoada onme'pukpo onahue' o'ne'uyate.

**“¿Be’a hueret huairida e’dik  
ya’eapet?” Huanigpeika’erimey  
on’batia’pakuyate.**

(Mt. 18.1-5; Mr. 9.33-37)

<sup>46</sup>“¿Oro’omeya be’ata hueret huairida  
e’dik ya’eapo?” Ken huanigpeika’eria  
huayahuaya on’batia’paknig’a  
<sup>47</sup>kenda huanigpeika’eri huanopoya’  
on’nopoenig Jesúsa o’nopoe.  
Huasi’potaj o’topepo o’boa’po  
<sup>48</sup>o’mana’po,  
—In huasi’po ehue’ o’e moknopoene.  
In huasi’potaj be’api’ ee’nayo do  
ijpaknok ee’nayo konigti do’taj e’dik  
mo’ene kenpa’ti be’api’ do’taj o’deapet  
doere do’hued Apageretaj o’deapone.  
Do’hued Apaga me’ta’mona’uyme.  
Huasi’potaj huatihuapokeri konig  
hueret huairida o’ne Diosnayo  
o’nopoe. —Jesúsa huanigpeika’eritaj  
o’mana’uyate.

**Ken aratbuta opudomeytaj  
dakhuea’ egka’ta’ pakhue’ o’nepo  
opudomeytaj on’tihuapokika’.**

(Mr. 9.38-40)

<sup>49</sup>—Huabokerektaj e’tiahuayde’ta,  
ke’na o’nendik o’dikka’po toto’taj  
o’maenika’, “Keje’, kahue’ yae’.” Oro’a  
ona’nok kenbokereka oro’ere huahue’  
o’ika’nok. —Juana Jesústaj ona’nig’a.

<sup>50</sup>—Ken huabokerektaj “Kahue’  
yae’,” onahue’ yane’. Ken aratbuta  
oro’omeytaj dakhuea’ egka’ta’ pakhue’  
o’nepo oro’omeytaj bo’tihuapokne.  
—Jesúsa ona’uyate.

**“Kenda ahue’ yane’.” Jacobotaj  
Juaneretaj Jesúsa o’mana’uyate.**

<sup>51</sup>A’ti kurudyo ijhua’apoy Jesús  
o’nopoeapo “Jerusalényo ijhua’apoy,”  
me’pukhue’ada ’urua’da o’nopodepo  
<sup>52</sup>huakkuruda menigtayo’da  
o’mata’mona’uyate. Samaria  
huadaribayo huakka’ jakyo

o’mata’mona’uyate huatay jak  
kan’uke’po. <sup>53</sup>Jesús Jerusalényo  
o’hua’nok Samaria huakka’ jakyo  
huae’eria Jesústaj iyo yataya’ manahue’  
o’ne’uyate. <sup>54</sup>Jacobo Juanere Jesúsen  
huanigpeika’eri kenda on’peedeapo,  
—¿Konig Elíaskudak Diosen  
huamanbatia’pakeria o’ka’uyate,  
kenomeytaj Samariayo huae’eritaj  
konigti kan’mameyye’po ta’ak kurudya’  
kakote’ oro’omeya ena’ta’ menpa’ on  
i’pak, Huairi? —Jesústaj o’nona’uyate.

<sup>55</sup>Jesúsa o’batiahuayatupo Jacobotaj  
Juaneretaj o’mana’po,  
—Nama’da mo’nopoene, ken konig  
nopoe’hue’ yane’. <sup>56</sup>Do huabokerek  
ijjenok Diosa me’ta’mona’uyme.  
Aratbuttaj a’barakya’po tiakhue’  
ijje’uy. Aratbuttaj a’manopo’yareaya’po  
ijtiakuy. —Jesúsa o’mana’uyate.

Ken nog huakka’ jakyokon  
onhua’uyate.

**Nogomey Jesústaj e’nigpeika’ta’  
on’pakuyate.**

(Mt. 8.19-22)

<sup>57</sup>Ken dagte on’hua’po Jesústaj  
—Meyopi’ i’huaika’apo o’nen  
huanigpeika’eri ee’ta’ ijpaki.  
Eta’hua’ika’ta’ ijpaki, Huairi.  
—Huabokereka Jesústaj ona’uyate.

<sup>58</sup>—Nubakuhued huakog o’taika’.  
Bakoyen kenpa’ti huapak o’taika’.  
Do huabokerek ijjenok Diosa  
me’ta’mona’uyme. Konigepo donayo  
jak toehue’ ijikay. Nog jakyo nog jakyo  
ijtay’ikay. —Jesúsa huabokerektaj  
ona’uyate.

<sup>59</sup>—Beta’hua’. —Jesúsa nogtaj  
ona’nig’a,

—A’ti, huakkuru huaojtone’taj daka’  
toen’dik ijjeapoy. Kenpa’ti e’bueyde’ta  
kubarakka’dik ijjeapoy. —Jesústaj  
ona’uyate.

<sup>60</sup>—Keje’. Huabot oknopoehue’ya’  
huae’eria nog oknopoehue’



huae'eritone'taj daka' kan'toike'  
kenpa'ti kan'kubarakke'. Onnayo  
yahuati'. Huadak hua'a konig aratbut  
Dios Huairitaj oknopoe'dik kenpa'ti  
nigpee'dik ka'ne'po yamanbatia'pakika'.  
—Jesúsa ona'uyate.

<sup>61</sup>—Huaboa'da ontaj eta'hua'ta'  
e'pakada, Huairi huakkuru huabettaj  
"Ijhuay," a'mana'tuya'po jakyo  
e'hua'tuta' ijpaki. —Noga Jesústaj  
ona'uyate.

<sup>62</sup>—Aratbut huaboa'da Diostaj  
o'noknopoe'po on'nigpee'po  
batikhue'da nigpee'dik o'ne. Ken  
konig 'ikken ogkika'uy onte'ti ken  
konig nopoe'hue'dik o'nika'apo. Diostaj  
o'noknopoe'po on'nigpee'po e'batiknayo  
konig ogkika'uy onte'ti e'nopoika'nayo  
nogomey Dios Huairitaj huaknopoe'  
kenpa'ti huanigpee' tihuapokhue'dik  
o'neapo. —Jesúsa ona'uyate.

**Setenta huanigpeika'eritaj  
Jesúsa o'mata'mona'uyate.**

**10** <sup>1</sup>Nogok Jesús Huairia  
o'baktie'ea'po nog setenta  
huanigpeika'eritaj o'baktie'ea'po  
huakkuru botta' botta'taj  
o'mata'monea'uyate. Nog huakka' jak  
nog huakka' jakyo o'mata'monea'po a'ti  
Jesúsakon ta'pota' o'hua'apo.

<sup>2</sup>—Huakka'ada Diostaj yanoknopoe'apet  
yan'nigpeika'apet sue'ada huabokereka  
Dios Huairitaj huamaknopoe'eri  
o'ne. Dios Huairitaj yan'tiona'pakika'.  
Dios Huairia huamaknopoe'eri'taj  
kamata'mone' yan'tiona'pakikati'.

<sup>3</sup>Yanhuati'. Opudomey konig ovejasi'ponig  
mo'enok konig dubakuhuaenbanopoyonig  
mo'eapo. Konig dubakuhuaa ovejasi'potaj  
on'arakika' kenpa'ti aratbuta opudomeytaj  
konigti mogka'apetdapi'. <sup>4</sup>Yudtaj  
kutamate tohuahue' yane'. Huakupe  
huamantoe'pi' tohuahue' yane'. Nogda  
hua'iotpi' tohuahue' yane'. Aratbuta dagte  
e'de'jpi' batia'pakonhue' yane'. <sup>5</sup>Ken jakyo

bo'kuddepo huakkuruda "Opudomeytaj  
Diosa mo'nopo'yare," yan'tiona'pakti'.  
<sup>6</sup>Ken jakya' aratbut en'nopo'yareata'  
en'paknayo kan'nopo'yare'. E'nopo'yareata'  
pakhue' e'ne'nayo kenda huaboa'da  
yan'tiona'pakde'po keje' yan'manati'. <sup>7</sup>Ken  
jakyo bo'kudapet keyoyo'da yanikati'.  
Kenda aypo bo'yokapetnig yan'bapikati'.  
Kenda hue'ey bo'yokapetnig yan'mayikati'.  
Nogen e'baa'nayo dakhuaapa aypopi'  
bayokika'dik mo'ika'apone. Ken nog  
jakyo nog jakyo hua'ehue' yanikati'. Ken  
jakyo huakkuru bo'kudapet, keyoda  
yanikati'. <sup>8</sup>Huakka' jakyo e'kudde'te  
aratbuta opudtaj bo'eddepo kenda  
aypo bo'yokapet, yan'bapikati'. <sup>9</sup>Keyo  
huakka' jakyo e'kudde'te dakhue'  
e'huae'taj yan'bayarea'ikati'. "Huadak  
hua'a konig Dios Huairi meyhohue'da  
o'edenok opudomeya oy yanoknopoe'."  
Yan'manati'. <sup>10</sup>Kenoka' huakka'  
jakyo e'kudde'te opudomeytaj ee'ta'  
pakhue' ee'nayo yanbakhua'ti. Jakya'  
yan'bakhua'depo, <sup>11</sup>"Oro'omeytaj  
pakhue' mo'enok opudomeyen huakka'  
jak kuruta' sorok oro'en hua'ita' e'tibette  
oro'a o'tihuekey. Huadak hua'a konig  
Dios Huairi meyhohue'da o'edenok  
oyedda yanoknopoe'." Yanhua'depo  
yan'manati'. <sup>12</sup>Nogok dakhuea'  
huakka'eri aya'tada Diosa ke'poda  
castiga o'magka'apo. Kenoka' ken jak  
huae'eria opudomeytaj ehue' moe'uyinigtaj  
kenomeytataj ke'ponanada castiga  
o'magka'apo. Sodomatanayo sue'da  
castiga o'magka'uyate. —Jesúsa setenta  
huaknopoe'eritaj o'mana'uyate.

**Huakka' jak huae'eria Diostaj  
nigpee'hue'ada dakhuea'da  
ogkika'po nopo'koreahue'  
o'ne'uyate.  
(Mt. 11.20-24)**

<sup>13</sup>—Huakka' jak Corazín huae'eria  
pai'da mo'nopo'e'apone. Kenpa'ti  
huakka' jak Betsaida huae'eria pai'da

mo'nopo'eapone. Opudomeyen jakya' Diosa teyda o'kame'nig'a 'urua'da o'kame'nig'a o'bayareame'nig'a, opudomeynayo nopo'koreahue' mo'eme'ne. Konig Betsaida huakka' jakya' kenpa'ti Corazínya' Diosa 'urua'da o'kame' kenpa'ti teyda o'kame' konigti Tiro huakka' jakya' Sidón huakka' jakya'kon Diosa 'urua'da egka'nayo kenomeya ida yan'manopo'korea'uyyetnig'a kenpa'ti pai'da o'nea' aratbuttaj moknopoepo saconig yan'otay'uyyetnig'a.

<sup>14</sup>Nogok kenoka' Diosa aya'tada aratbuttaj dakhuea' huaka'eritaj castiga o'magka'po Tiro huae'eritaj Sidón huae'erieretaj sue'da castiga o'magka'apo. Opudomeytanayo diga'da castiga mogka'apone. <sup>15</sup>Opu Capernaum huakka' jakyo huae'eri "Huadakda o'ey." Mo'nopoenig'a, "Kurudyo o'hua'apoy." Mo'nopoenig'a. Kubarakoyo'da bo'hua'apone. —Jesúsa o'mana'uyate.

<sup>16</sup>—Aya'ada opudomeytaj e'nigpee'nayo do'taj on'nigpeeapo. Aya'da opudomeytaj pakhue' ee'nayo do'taj pakhue' o'ne. Kenpa'ti aya'da do'taj pakhue' ee'nayo Diostaj pakhue' o'ne. Diosa me'ta'mona'uyne. —Jesúsa setentataj o'mana'denok setentaakon o'nokbahua'uyate.

#### Setenta onte'ti on'kume'uyate.

<sup>17</sup>Nogok setenta huanigpejika'eri on'kumejdepo durugteda on'kumejpo, —O'na bo'teypaka'nok toto'a oro'taj mo'nigpeeapo bokbahuame'ne, Huairi. —Jesústaj o'nona'uyate.

<sup>18</sup>—Diosa toto' huairitaj o'enme' kurudya', ijtiahuamey. Konig ojbed idada kurudya' o'kotonme'. Toto' kurudya' barakyo okotme'te. <sup>19</sup>Do'hua yona'nok bihuitaj tugdik kenpa'ti to'tidtaj tugdik kenpa'ti toto'taj gana ogka'dik mo'epo bihuia to'tidapi'

toto'api' opudomeytaj sigpi' diga' noeyanhue'dik mo'ene. <sup>20</sup>Kenda huadakda o'enig'a toto' opudomeytaj mo'nigpeeme'tenok durugpakhue' yane'. Diosensi'po mo'enok kurudya' opudendik Diosa e'timadoya'de' mo'tene Diosere o'noeonhuahuika'apoy. Kenda yan'nopoepo yan'durugpak. —Jesúsa o'mana'uyate.

#### Jesús o'durugpakuyate.

(Mt. 11.25-27; 13.16-17)

<sup>21</sup>Diosen Nokirega o'nopo'toenok Jesúsa o'durugpakpo Diostaj, —Kurudyo huae'eri Huairi i'ene kenpa'ti huadariyo huae'eri Huairi i'ene, Apag Dios. Huaboa'da setentataj i'bateypakame'nig kenda suhwe'da huanopoe'eritaj i'ma'nopoe'ne Apag Dios. Kenda huakka' huanopoe'eritanayo manopoeahue' i'ene. Kenda i'pakpo 'urua'da i'ka'de. —Apag Diostaj Jesúsa o'tiona'pakpo,

<sup>22</sup>—Do'hued Apaga be'teypaka'uyne, me'nopoea'uyne. Aya'da beyokuyne. Do Diosen Huasi'po o'e, Apag Diosayo'da moknopo'ne. Konig Apag Dios o'epo, konig o'nopoe, konig Apag Dios o'ka' do'huayo'da ijnopoey kenpa'ti kenomeytaj do'hua Diosen Huasi'poa ijmaknopo'ey. —Jesúsa o'mana'uyate.

<sup>23</sup>Huanigpejika'eritaj o'batiahuay'epo, —Opudomey do'hued huanigpejika'eri mo'epo do'taj Diosen Huasi'potaj on'tiahuaypo durugda mo'ene. <sup>24</sup>A'nenda huakka' Diosen huamanbatia'pakeria kenpa'ti huadaribayo huairierea do Diosen Huasi'potaj e'tiahuayta' men'pakuyatenig'a tiahuayhue' me'nuyne. Kenpa'ti do'hued e'manmadika' e'peeta' on'pakuyatenig'a peehue' me'nuyne. —Jesúsa huanigpejika'eritayo'da o'mana'uyate.

#### Konig Samaria huadaribayo huae'eria 'urua'da o'ka'uyate, konigti yag'kikati'.

<sup>25</sup>Ken Moisésenba' e'mana' huamanmadika'eri o'bodpo, Jesústaj o'huahua'po Jesúsa nama'dapi' kae'po,

—¿Diosere a'noeonhuahuikaya'po kate ka'dik ijje? —Jesústaj ona'uyate.

<sup>26</sup>—¿Katea' Moisésba' ya'madoya'uyate? ¿Monig i'tiahuay?

—Jesúsa ona'uyate. Moisésenba' huamanmadika'eritaj ona'uyate.

<sup>27</sup>—Dios Huairitaj di' yanika'. Huanopo'a huakka'da yan'pakpo Diostaj di' yanika'. Nokirega huakka'da yan'pakpo Diostaj di' yanika'. Huaso'a teyda ya'nepo Diostaj di' yanika'. E'nopoi'ka' ya'deretpakpo Diostaj di' yanika'. Kenpa'ti konig huata' di' i'e konigti nog aratbuttaj di' yan'maika'. —Moisésenba' huamanmadika'eria Jesústaj ona'uyate.

<sup>28</sup>—Buttida ia'. Kenda eka'nayo Diosere i'noeonhuahuika'apone. —Jesúsa ona'uyate.

<sup>29</sup>Huadakda ona' aratbut kan'nopo'ede'po Jesústaj ona',

—¿Betataj di' mae'dik ijje?  
—Moisésenba' huamanmadika'eria ona'nok.

<sup>30</sup>—Nogbokerektida Jericó huakka' jakyo dagte o'huae'uyate. Judío aratbut o'epo Jerusalénya' Jericóyon o'huarakpo dagte e'hua'ete sue'da huabereeria on'huahua'po, o'nogka'po, on'bitbitpo, aya'da o'nokbakaya'po yudtakon o'nokbakaya'po dagte ken huabokerektaj o'nenonpo o'nokbahua'uyate. Ke'na judío huabuey'dikte dagte onpahueduyate.

<sup>31</sup>A'ti judío sacerdote ken dagte o'hua'epo judío huabokerek enpahuedtaj e'tiahuayada dagte adpenda okpokon'uyate. <sup>32</sup>Nog huabokerekkon o'hua'epo ke'na Leví aratbut ee'tada, o'hua'epo kente enpahuedte e'tiahuayada ke'nakon okpokon'uyate. Leví aratbut Diosen jakya' on'baa'ika'uyate. Ken enpahuedte e'tiahuayada okpokon'uyate. <sup>33</sup>Nog huabokereknayo judío ehue' Samaria huae'eri o'epo

Samaria huae'eri judío huae'eritaj di' maehue' o'nika'. Ken Samaria huae'eri dagte o'hua'epo judío enpahuedte o'tiahuayato'po o'tinepahui'po <sup>34</sup>o'huahua'po, huaentaj 'urusihuada vinoere okhueke'edepo huakbetakon o'tinuku'depo ke'nen mulayo o'behuika'po huatay jakyo o'tohua'de'uyate. Keyo daka' o'toe'uyate. <sup>35</sup>Eme'te ken Samaria huae'eri ahua'deyapo botta' huakupe kutamayo o'tokdepo jak huatoe'eritaj o'yokpo "In judío huabokerektaj daka' yatoe'. Nogda huakupe e'paknayo a'ti ijkumejdepo o'yokapone."

Samaria huae'eria ona'uyate. <sup>36</sup>Ken huabokerektaj huabereeria o'nogka'uyate, bapa' huabokereka on'tiahuay'uyatenig'a, ¿Be'ata di' o'uyate? —Jesúsa Moisésenba' huamanmadika'eritaj ona'uyate.

<sup>37</sup>—Ke'na o'tinepahui'po okbetbetpo o'tinuku'uyate. Ke'na di' o'uyate. —Ken Moisésenba' huamanmadika'eria Jesústaj ona'nok,

—Yahuati'. Konigti yakikati'. —Jesúsa ona'uyate.

#### Marta Maríaenere jakyo Jesús o'ika'uyate.

<sup>38</sup>Jesúsa onte'ti o'hua'udhuahua'po huanigpeika'eriere o'hua'uyate. Huakka' jakyo o'kuddepo ettone' o'dikka' Martaa ke'nen jakyo kataye'po o'ed'uyate Jesústaj. <sup>39</sup>Martaen huama'buy María Jesústaj daka' a'nigpe'aya'po Jesúsén hua'ita'pote o'huad'uy. <sup>40</sup>Martanayo huakka' o'baa'po kenpa'ti huakka'da ka'dik ijje' o'nopo'epo o'mepu'kepo Jesústaj o'huahua'po,

—Do'hued huama'buya do'taj tihuapokhue' me'ene. Nogtia'da aya'da ijkay. Do'hued huama'buya do'taj tihuapokdik o'e. Kenpa' i'nopo'et. "Martataj yatihuapok." Maríataj yana', Huairi. —Martaa Jesústaj ona'uyate.

<sup>41</sup>—Nogda nogda huakka'da i'ka'po i'mepu'ke'nig'a, Marta. <sup>42</sup>Kenyo'da do'taj e'nigpee' huadaknada o'e. Kenda o'nen huama'buy María o'pak. Do'taj e'peeta' o'pak. Kenda huadaknada o'e. Be'api' do'hueddik okdikkahue'dik o'ne. —Jesúsa ona'uyate.

**Jesúsa konig tiona'pakdik o'e  
o'manmadika'uyate.**

(Mt. 6.9-15; 7.7-11)

**11** <sup>1</sup>Nogok behahueya' Jesúsa o'tiona'pakonhua'depo o'batikdenok,

—Juan Bautista ken'en huanigpeika'eritaj o'manmadika'po huatona'pak o'manmadika'uyate. Konig Juan o'manmadika'uyate konigti oro'omeytaj mon'madika', Huairi. —Nogtiada Jesúsen huanigpeika'eria Jesústaj ona'uyate.

<sup>2</sup>—In konig yan'tiona'pakti': Oro'en Apag i'ene, Apag Dios. Kurudyo i'ika'po kenpa'da huadakda i'ika'ne. O'wendik kenpa'da huadakda o'e. Huairi i'enok ida aya'ada ontaj mo'nigpeike'. Dios Huairi i'epo aya'da i'pakpo i'manika'. Kurudyo huape'eria mo'nigpeika'po ogkika' konigti iyo huadariyo aya'ada huaka'.

<sup>3</sup>Inme'noete aypo oro'taj a'nigyaya'po bo'tihuapok.

<sup>4</sup>Oro'omeyen dakhuea' e'ka' bokkahuea' kenda oro'taj dakhuea' mogkame'nigtaj oro'akon o'bakkahuea'demey. Keya' dakhuea'da ogkika' keyo toahue' moe'. Oro' nama'da e'ka'ta' e'paknayo dakhuea' kahue' oej' bo'tihuapok, Apag Dios, ken.

—Jesúsa e'tiona'pak o'manmadika'po.

<sup>5,6</sup>Jesúsa nogiti o'manmadika'po,

—Opudomey nogtipi' sikyo nopoka' huadi'en jakyo e'hua'nayopi'. “Do'hued

jakyo bidta'da do'hued huadi' okyedenig'a aypobayo' ijjeapo aypo yokhue'dik ijjeapo sue'da aypo beyok.” Ke'na ena'nayo 7'kenen huadi' jakyo o'epo, “Aypo beyok. Onnahue' mee'. Yokhuikdey. Do'huedsi'poere doere o'tay'i. Aypo a'yokya'po e'mabota' pakhue' ijjey.” Ke'na yaapetpi'.

<sup>8</sup>Oro'en huadi' e'edada sikyo nopoka' aypo yokhue' me'ene. “Aypo beyok” oro'omeya batikonhue'da ona'bednok kan'batike'po sikyo nopoka' aypo bo'yokapone. Katepi' aypo o'paki bo'yokapone. <sup>9</sup>In o'nona'nig e'tiona'pak o'nonmadika'ne. Katepi' bo'pakpo, “Beyok.” Diostaj yan'tiona'pakika'. Diosa bo'yokapone. Katepi' bo'pakpo, yan'tiona'pakika'po yaduk, batikhue'da bo'ukpo bo'huahuayo, mo'toepone. Ijtiaki, menigokhuike' konig Diostaj e'tiona'pak o'enok Diosa mo'nigokhuike'apone.

<sup>10</sup>Konig bo'pakpo, “Beyok.” Diostaj e'tiona'paknayo Diosa bo'yokapone. Katepi' bo'pakpo bo'tiona'pakpo e'uknayo batikhue'da e'uknayo bo'huahuayo mo'toepone. “Ijtiaki, menigokhuike',” e'tiona'pakika'nayo Diosa mo'nigokhuike'apone.

<sup>11</sup>Apag Diostaj e'tiona'pak in konig o'e. Huasi'po katetapi' on'pakpo huaojtaj “beyok” o'nona'ika'. Kenda ea'te bo'yokika'apone. “Pan beyok,” huasi'poa ena'nayo huaoa huid yokhue' o'epo. Panda beyokapone. “Biig beyok,” huasi'poa ena'nayo huaoa bihui yokhue' o'epo biigda beyokapone. <sup>12</sup>“Huatahuaokda beyok,” huasi'poa ena'nayo huaoa to'tid yokhue' o'epo huatahuaokda beyokapone. <sup>13</sup>Dakhuea' huaka'eri ee'pi' huasi'potaj katepi' huadaknada mo'bayokika'ne. Opuden Apag Dios kurudyo o'ika' huadaknada o'epo 'urua'da bo'yokapone. “Diosen Nokireg beyok.” E'tiona'paknayo bo'yokapone.

—Kenda Jesúsa huationa'pakonhua' o'manmadika'uyate.

**“Toto' huairia Jesústaj o'teyya'.”**  
**Sue'ada nama'da on'huaa'uyate.**  
*(Mt. 12.22-30; Mr. 3.19-27)*

<sup>14</sup>Nogok huabokerek o'e'uyate. Toto'a o'nopo'toenok a'pakhue'dik o'uyate. Jesúsa toto'taj okendenok huaboa'da oa'pakon'uyate. Kenda aratbut on'tiahuaydepo kenpa'ti on'pe'edepo, “Kenpihuay,” o'da'uyate.

<sup>15</sup>—Toto' huairia Jesústaj o'teyya'nok toto'taj o'makenika'. —Sue'ada oknopo'ehue' huaj'eria on'huaa'uyate.

<sup>16</sup>—Diosa ontaj e'ta'mona'uyayoy konig Dios kuruderia teyda o'kika'nig konigti yaka'. —Nogomeya nama'da Jesústaj o'nona'uyate. <sup>17</sup>Kenda kenomey judío huairia on'nopo'oenig Jesúsnayo kenda o'nopo'epo,

—Huadari gobierno huairi huakka'da aratbuttaj huamana'ika'eria huayahuaya e'magkika'nayo aya'da ken aratbuten gobierno huairi ehue'da o'neapo. Kenpa'ti huabet huabetere nogtaj nogtaj e'batuktuknayo ehue'da o'neapo. <sup>18</sup>Konigti toto' huairiomey egka'nayo toto' nog toto'taj e'magka'nayo toto' huairi ehue'dik o'neapo. “Toto'taj a'makenya'po toto' huairia Jesústaj o'teyya'.” Nama'da mo'batia'pakne. <sup>19</sup>Toto'taj ka'makene'po toto' huairia do'taj o'teyya' opudomey nama'da mo'tinopo'oenig'a. Oro'en huanigpeika'eritaj toto' huairia o'manopo'teypaka'ika' toto'taj kamakmaene'po opuda kenpa' ea'nayo “Da boa'ne.” Opudomeyen huanigpeika'eria mona'apone. <sup>20</sup>Dios teyda o'epo do'taj be'teypaka'nok toto'taj ijmakenikay. Do Diosen Huairi ijtiakdey aya'ada nopoe'dik o'neapo kenpa'ti nigpeika'dik o'neapo. Opudomeyere ijjedey. Do'taj menoknopoika'.

<sup>21</sup>Huabokereki' teyda o'epo konig huairi o'epo huakka' piya' o'mato'epo ke'nen jak daka' o'tat'epo. Do'hued jakyo katepi' me'taenig daka' ijto'enok bepi' kudhue'dik o'epo o'nopo'oenig'a, <sup>22</sup>nogapi' huamagka'eria nogiti teyda o'epo kentaj e'huatiaknayo ogka'po jobbakaya'po piya' kenpa'ti aya'da okbatohua'apo.

<sup>23</sup>Be'api' do'taj pakhue' ee'nayo konig do'taj dakhue'da mo'ene. Sue'ada do'taj on'pakpo daka' moknopo'epo mo'nigpe'epo huakka'tada Diostaj moknopo'ea'ne do'taj mo'nigpe'ea'ne. Nogomeynayo do'taj batotiakhue' o'nepo huakka'tada maknopo'ahue' on'maea'. —Jesúsa o'mana'uyate.

**Dakhue' toto' nokirega huabokerektaj ekhua'deada onte'ti o'kumej.**  
*(Mt. 12.43-45)*

<sup>24</sup>—Dakhuea' toto' huabokerektaj e'nopo'toeonhuahua'de' okhua'depo aratbut ehue' ee'yo o'hua'po meyopi' huajka' e'uktada huahuayhue' o'epo “Keyo ijikamey a'kumeyi'.” Ken nokirega o'nopo'epo, <sup>25</sup>ken huabokerektaj o'nopo'toikame', kentaj ekyede'te Diosapi' nopo'to'ehue'tada daknopo'da konig jak e'beroke'yonig 'uruada o'enek <sup>26</sup>ken toto'a o'hua'po nog siete dakhue'nada nokiregtaj o'bahuahuaydepo o'batotiakpo dakhuea'da o'nepo ke'nanayo sue'da dakhue' o'epo ken ontayo' huabokerektaj on'nopo'toenok. Huakkuruda nogtoto'tida o'nopo'to'epo sue'da dakhue'da o'epo ta'pota' ocho dakhuea' toto' on'nopo'to'edepo huabokerek dakhuea'da o'epo. —Jesúsa o'mana'uyate.

**Diosa ea' huanigpeika'eri durugda o'nika'apo.**

<sup>27</sup>Jesúsa kenda e'manade'te,  
 —Ken ettone' o'nen huayea ontaj besi'popakuypo kenpa'ti ontaj

meminoganhua<sup>h</sup>ua<sup>h</sup>u<sup>h</sup>ay<sup>h</sup>u<sup>h</sup>po durugnada kai<sup>h</sup>ke'. —Ettone<sup>h</sup>a aratbut egkupopakyo o<sup>h</sup>epo 'utta'nada ona'uyate.

<sup>28</sup>—Do<sup>h</sup>hued hu<sup>h</sup>ay<sup>h</sup>enayo sue<sup>h</sup>da durugmon o<sup>h</sup>enig<sup>h</sup>a aya<sup>h</sup>da Diosba<sup>h</sup>taj on<sup>h</sup>pe<sup>h</sup>depo on<sup>h</sup>nig<sup>h</sup>pe<sup>h</sup>epo ogkika<sup>h</sup>po kenata<sup>h</sup>taj nogiti durugda o<sup>h</sup>nika<sup>h</sup>apo. —Jesúsa ettone<sup>h</sup>taj ona'uyate.

—On Diosya<sup>h</sup> o<sup>h</sup>tiakuyate. Oro<sup>h</sup>omeya oknop<sup>h</sup>o<sup>h</sup>e<sup>h</sup>dik ka<sup>h</sup>'ne<sup>h</sup>po konig Dios teyda o<sup>h</sup>kika<sup>h</sup>' konigti yaka<sup>h</sup>.

—Dakhuea<sup>h</sup> huaka<sup>h</sup>'eriomeya<sup>h</sup> Jesústaj o<sup>h</sup>nona<sup>h</sup>uyate.

(Mt. 12.38-42; Mr. 8.12)

<sup>29-32</sup>Huakka<sup>h</sup>'ananada Jesústaj en<sup>h</sup>tikupopakte,

—Opudomey aratbut oy mo<sup>h</sup>'noika<sup>h</sup>. Dakhuea<sup>h</sup>da hu<sup>h</sup>ae<sup>h</sup>'eri mo<sup>h</sup>'ika<sup>h</sup>. Konig Dios teyda ka<sup>h</sup>'dik o<sup>h</sup>'e konig e<sup>h</sup>'bayarea<sup>h</sup> konigti oro<sup>h</sup>taj mogke<sup>h</sup> mo<sup>h</sup>'nopo<sup>h</sup>enig<sup>h</sup>a. Konig Jonás o<sup>h</sup>'e'uyate, konigti Diosa do<sup>h</sup>taj me<sup>h</sup>'ea<sup>h</sup>apone. Jonás 'urua<sup>h</sup>da o<sup>h</sup>'e'uyatenok Nínive huakka<sup>h</sup>' jak aratbut on<sup>h</sup>nig<sup>h</sup>pe<sup>h</sup>epo Diostaj on<sup>h</sup>'manopo<sup>h</sup>'korea<sup>h</sup>uyate. Konigti do huabokerek ijjenok Diosa me<sup>h</sup>'ta<sup>h</sup>mona<sup>h</sup>'u<sup>h</sup>ne 'urua<sup>h</sup>da ijje<sup>h</sup>aponok aratbuta men<sup>h</sup>'tiahuaypo oknop<sup>h</sup>o<sup>h</sup>e<sup>h</sup>dik ya<sup>h</sup>'neapet, Diosa o<sup>h</sup>'ta<sup>h</sup>mona<sup>h</sup>'uy oknop<sup>h</sup>o<sup>h</sup>e<sup>h</sup>dik ya<sup>h</sup>'neapet. A<sup>h</sup>nennada huakka<sup>h</sup>' jak Nínive hu<sup>h</sup>ae<sup>h</sup>'eritaj Jonás Diosba<sup>h</sup> e<sup>h</sup>'mana<sup>h</sup>'de<sup>h</sup>te Nínive aratbut Diostaj on<sup>h</sup>'nopo<sup>h</sup>'korea<sup>h</sup>po huaboa<sup>h</sup>da Diostaj on<sup>h</sup>nig<sup>h</sup>pe<sup>h</sup>e'uyate. Oy aratbut do<sup>h</sup>taj mo<sup>h</sup>'pe<sup>h</sup>edenig<sup>h</sup>a nopo<sup>h</sup>'koreahue<sup>h</sup> o<sup>h</sup>'nepo do<sup>h</sup>taj oknop<sup>h</sup>o<sup>h</sup>ehue<sup>h</sup> mo<sup>h</sup>'ene. Jonás sue<sup>h</sup>da huairi o<sup>h</sup>'uyate. Donayo huahuak huairi ijje<sup>h</sup>po, konigepo kene<sup>h</sup>'huaya<sup>h</sup>'me<sup>h</sup>'noete aya<sup>h</sup>da Diostaj on<sup>h</sup>nig<sup>h</sup>bakupobopo kenoka<sup>h</sup> opudomey oy hu<sup>h</sup>ae<sup>h</sup>'eri a<sup>h</sup>'neneri Nínive hu<sup>h</sup>ae<sup>h</sup>'eriere Diostaj onteteyo<sup>h</sup> bo<sup>h</sup>'ta<sup>h</sup>'bopo. Opudomey oy hu<sup>h</sup>ae<sup>h</sup>'eri dakhuea<sup>h</sup>da mo<sup>h</sup>'epo do<sup>h</sup>taj e<sup>h</sup>'tiahuayada e<sup>h</sup>'pe<sup>h</sup>deada nopo<sup>h</sup>'korehue<sup>h</sup> mo<sup>h</sup>'uyatenok. Nínive hu<sup>h</sup>ae<sup>h</sup>'eria kenda

Diostaj on<sup>h</sup>'bahuaa<sup>h</sup>apo. A<sup>h</sup>nennada huadaribayo ettone<sup>h</sup>a huairi o<sup>h</sup>'uyate. Ke<sup>h</sup>'nendar adtenada o<sup>h</sup>'uyate. Salomón Israel aratbuten huairi huakka<sup>h</sup>'nada o<sup>h</sup>'nopo<sup>h</sup>epo 'urua<sup>h</sup>da o<sup>h</sup>'batia<sup>h</sup>'pakika<sup>h</sup>'nok a<sup>h</sup>'peeya<sup>h</sup>po ken ettone<sup>h</sup> ke<sup>h</sup>'nenbaya<sup>h</sup> bidtenada o<sup>h</sup>'hua<sup>h</sup>'onhuahua<sup>h</sup>'uyate. Israel aratbutenbayo o<sup>h</sup>'hua<sup>h</sup>'onhuahua<sup>h</sup>'uyate. Salomóna sue<sup>h</sup>da 'urua<sup>h</sup>da o<sup>h</sup>'nopo<sup>h</sup>e'uyate. Donayo 'urua<sup>h</sup>'nanada ijnopo<sup>h</sup>epo huakka<sup>h</sup>da ijnopo<sup>h</sup>enig<sup>h</sup>a oy hu<sup>h</sup>ae<sup>h</sup>'eria sue<sup>h</sup>ada do<sup>h</sup>taj mo<sup>h</sup>'pe<sup>h</sup>epo moknop<sup>h</sup>o<sup>h</sup>ene. Konigepo nogok kene<sup>h</sup>'huaya<sup>h</sup>'me<sup>h</sup>'noete aya<sup>h</sup>da Diostaj en<sup>h</sup>nig<sup>h</sup>bakupobo<sup>h</sup>te opudomey oy hu<sup>h</sup>ae<sup>h</sup>'eri dakhuea<sup>h</sup>da mo<sup>h</sup>'e do<sup>h</sup>taj nig<sup>h</sup>pe<sup>h</sup>ehue<sup>h</sup>ada oknop<sup>h</sup>o<sup>h</sup>ehue<sup>h</sup> mo<sup>h</sup>'uynok, ettone<sup>h</sup> huairia Diostaj o<sup>h</sup>'bahuaa<sup>h</sup>apo. —Jesúsa o<sup>h</sup>'mana'uyate.

Oro<sup>h</sup>omeyen huakpo konig hu<sup>h</sup>aso<sup>h</sup>'en huakjey o<sup>h</sup>'e.

(Mt. 5.15; 6.22-23)

<sup>33</sup>—Huakjey e<sup>h</sup>'bakpakde<sup>h</sup>te ek<sup>h</sup>tiok<sup>h</sup>e<sup>h</sup>yo huadahue<sup>h</sup> o<sup>h</sup>'nika<sup>h</sup>. Sorokkosotone<sup>h</sup>toyo huadahue<sup>h</sup> o<sup>h</sup>'nika<sup>h</sup>. Huakjey e<sup>h</sup>'bakpakte kutopa kutapen on<sup>h</sup>'huada<sup>h</sup>'ika<sup>h</sup>. Kente jeyda o<sup>h</sup>'enok aya<sup>h</sup>da on<sup>h</sup>'kudpo batiahuya<sup>h</sup>'dik o<sup>h</sup>'ne. <sup>34,35</sup>Aratbuten huakpo konig hu<sup>h</sup>aso<sup>h</sup>'en huakjey o<sup>h</sup>'ne. Aratbuten huakpo huadakda ee<sup>h</sup>'nayo hu<sup>h</sup>aso<sup>h</sup>'a jeyonigti o<sup>h</sup>'e. Konigti huakjey jeyda ee<sup>h</sup>'te aratbut katepi<sup>h</sup> e<sup>h</sup>'ka<sup>h</sup> tiahuaydik o<sup>h</sup>'ne. Aratbuten huakpo dakhue<sup>h</sup>da ee<sup>h</sup>'nayo daka<sup>h</sup> tiahuayhue<sup>h</sup>'dik o<sup>h</sup>'ne. Konig sikkiregyo hu<sup>h</sup>aso<sup>h</sup>' o<sup>h</sup>'nepo katepi<sup>h</sup> kahue<sup>h</sup>'dik o<sup>h</sup>'ne. Konigti aratbuten huanopo<sup>h</sup> o<sup>h</sup>'e konig huakjey aratbutenso<sup>h</sup>'yo o<sup>h</sup>'e. Huadaknopo<sup>h</sup>da ee<sup>h</sup>'nayo huadakyo<sup>h</sup> on<sup>h</sup>'nopoika<sup>h</sup>. Konig 'urua<sup>h</sup>da Diosa o<sup>h</sup>'nopo<sup>h</sup>e kenpa<sup>h</sup>ti Diosa o<sup>h</sup>'pak aratbutkon o<sup>h</sup>'nopo<sup>h</sup>e kenpa<sup>h</sup>ti ogka<sup>h</sup>. Aratbutenno<sup>h</sup>po<sup>h</sup> dakhue<sup>h</sup>da ee<sup>h</sup>'nayo katepi<sup>h</sup> dakhue<sup>h</sup> e<sup>h</sup>'nopo<sup>h</sup>e'nayo aratbuttaj 'uruda e<sup>h</sup>'nopo<sup>h</sup>e Diosa manopo<sup>h</sup>eahue<sup>h</sup>'dik o<sup>h</sup>'mae. Aratbut dakhue<sup>h</sup>'nopo<sup>h</sup>da ee<sup>h</sup>'nayo konig

sikkiregyo o'ne. Meyon huahue'dikda o'ne. Konigepo keyoj, dakyo' yag'kikati'. Huanopoya' huadakyo' yan'nopoepo, batikhue' yane'. E'batiknayo konig sikkiregyo mo'ika'apone. <sup>36</sup>Huanopoya' huadakda e'nopo'e'nayo Dios konig huakjey ke'nen dag bo'tiahuaya'ne kenpa'ti huadak e'ka' mo'nopo'e'ane. Sikkiregyo ehue' mo'eapone. Konig huakjey o'bakpakpo 'urua'da o'ta'te tiahuaydik mo'epo kenpa'ti Diosen e'ka' mo'nopo'e'apo. —Kenda Jesúsa o'manmadika'uyate.

**Fariseo huairitaj kenpa'ti  
Moisésenba' huamanmadika'eritaj  
Jesúsa o'bahuua'uyate.**

(Mt. 23.1-36;

Mr. 12.38-40; Lc. 20.45-47)

<sup>37</sup>Jesúsa e'manmadika'de'te, “Doere mo'bape'.” Jesústaj fariseoa ona'uyate. Jesús ke'nen jakyo o'kuddepo kutopate o'huaduyate. <sup>38</sup>Judío aratbut bapehued huaba' on'bakoyo'ika'. Jesús ba'koyohue' kutopayo o'huadnok fariseoa o'tiahuaydepo, “Kenpihuay, ba'koyohue'ada o'bapeapo,” fariseoa o'tinopo'e'uyate.

<sup>39</sup>—Opudomey fariseo huairi konig plato' taza huabakoyoa'eri mo'epo huaso'ensi'dakyo'da daka' bo'koyoa'ika'ne. Aratbut kan'tiahuaye'po 'urua'da huaso'si'dak bo'koyoa'nig'a huanopo'nayo dakhue'da mo'ene. Nogen on'tae bo'eretpakpo mo'bakkay'ika'ne kenpa'ti katepi' dakhuea' bo'kika'. <sup>40</sup>Nama'da mo'nopo'ika'. Diosa huaso'si'dak o'ka'uyate. Ken Diosa kenpa'ti huaso'en huanopo' o'ka'uyate. Kenda nopo'e'dik mo'ene. <sup>41</sup>Huanopoya' yan'matinepahui'po pai'da aratbuttaj yan'bayokikati' kenda e'kika'nayo aya'da huaso'en 'uruda mo'eapone.

<sup>42</sup>Pai'nada mo'nopo'e'apone, opudomey fariseo huairi. Aypo

huatokbuk sue'da Diostaj bo'yokika'nig'a nog aypo huatokbukba'a 'uruda Diostaj sue'da bo'yokika'nig'a aratbuttanayo huadakda kahue' mo'ika'po kenpa'ti Diostaj di' ehue' mo'ene. Aypo huatokbuk Diostaj yokdik mo'epo kenpa'ti aratbuttaj huadakda kika'dik mo'epo kenpa'ti Diostaj di' e'dik mo'ene. <sup>43</sup>Huanopo'a pai'nada mo'nopo'e'apone, opudomey fariseo huairi. Judíoen huaitake' jakyo 'uruda huairien huahuadte ehuadta' bo'eretpakika'ne. Huakka' jakte e'hua'e'te “Ttiak huairi.” “Ttiak huamanmadika'eri.” Kenpa' enayo'da e'peeta' bo'eretpakika'ne. <sup>44</sup>Opudomey fariseo huairi kenpa'ti Moisésenba' huamanmadika'eri pai'nada mo'nopo'e'apone. “Oro'omey huadakda o'ey.” Nama'da mo'nopo'e'ika'nig'a konig tahuirigda dakhue'nada mo'ene. Dakhue'da e'ne'tada aratbuta nokothue' o'ne. Opud konig kubaraktone'onig mo'ene. Kubaraktone'taj aratbut tiahuayhue' o'nepo kente on'huae'ika'. Aratbut sorokyo e'para' ee'tada tiahuayhue'da o'nepo on'huae'ika'. —Jesúsa o'mana'uyate.

<sup>45</sup>—Oro'omeytakon dakhuea'da o'huaa'ne, huamanmadika'eri. —Moisésenba' huamanmadika'eria Jesústaj ona'uyate.

<sup>46</sup>—Pai'nada mo'nopo'e'apone opudomey Moisésenba' huamanmadika'eri. Nogda nogda huakka'da yag'kika', be'api' kenda kahue'dik ee'tada opudomey aratbuttaj mo'mana'ika'ne. Opudnayo sigpi' kenda kahue' mo'ika'ne.

<sup>47</sup>Pai'nada mo'nopo'e'apone opudomey. Opudomeyen adhuae'pane'kudak Diosba' huamanbatia'pakeritaj on'barakuyate. E'bueykudaken kubarakta' huid jaksi'po konig okkahuehue'dik

huid jaksi'po bo'kika'ne. <sup>48</sup>Diosba' huamanbatia'pakeritaj opudomeyen adhuea'pane'a on'batiaraka'uy. Opudomeyen adhuea'pane' huadakda ogka'uyate opudomeyakon mo'nopo<sub>o</sub>epo, kubarakta' okkahuehue'dik huid jaksi'po bo'kika'.

<sup>49</sup>Konigepo, "Diosba' huamanbatia'pakeri ijmata'mona'apoy kenpa'ti huanigpeika'eri ijmata'mona'apoy. Sue'tada on'barakapo nogomeytaj onhuadiaypo diga' on'magka'apo." Diosa huakka' o'nopo<sub>o</sub>epo kenda o'mana'uyate. <sup>50,51</sup>Konigepo opudomey aratbut oyda mo'noenig, opudomeytaj Diosa diga' mogka'apone. Opudomeyen adhuea'pane' Diosba' huamanbatia'pakeritaj on'barakuyate. Diosa huadari e'ka'de'te huakkuruda Abeltaj o'arakpo o'buey'uyate. Nogok nogok nogtaj nogtaj on'barakpo, ta'pota' Zacaríastaj o'darakuyate. Diosen 'uru jak kurute 'uhua e'arakika'ta' Diostaj e'nigbakpakika' kutopa o'e. Kutopa Diosen jaknopoya' Zacaríastaj o'darakuyate. Diosba' huamanbatia'pakeritaj opudomeyen adhuea'pane' on'barakuynok opudomeynayo barakhue' e'uyipi' Diosa diga' mogka'apone.

<sup>52</sup>Opudomey Moisésenba' huamanmadika'eri pai'nada mo'nopo'eapone. Aratbuttaj daka' Diosba' nopoeahue'dik mo'ene. Konig Diosensi'po ee' nopoehue' o'nepo. Opudomeykon Diosensi'po ehue' mo'eapone kenpa'ti nogomey Diosensi'po ehue'dik o'neapo oknopoehue'ada bo'ka'po. —Jesúsa o'mana'uyate.

<sup>53</sup>Jesúsa kenda e'mana'de'te Moisésenba' huamanmadika'eriomeya fariseoerea Jesústaj diga'da on'huadiaypo nogpa' nogpa' kirigayo' o'nona'uyate. <sup>54</sup>Jesúsa nama'da

kae'popi' yaapetpi' on'nopo<sub>o</sub>epo on'peenig'a dakhuea' ea' e'peeta' on'paknig'a. Jesúsa dakhuea' oa' e'huaa'ta' on'pakpo.

**“Oro' huadakda o'ey.” Fariseomeya nogomeytaj nama'da on'manopo<sub>o</sub>ea'ika'nig'a fariseotaj keyoj daka' yan'peika'.**

**12** <sup>1,2</sup>Jesúsa daka' o'manmadika'onhuahua'po huakka'nanada aratbut ogkupopakdepo huakka'ada aratbut o'nepo batugon ogka'uyate. Huakkuruda huanigpeika'eritaj o'mana'po: —“Oro'omey huadakda o'ey.” Fariseo huairia aya'tada e'manopo<sub>o</sub>ea'ta' on'paknig'a dakhuea'da o'ne. Konig pan e'bia'og' fariseo o'ne. Huakkuruda pan e'ka'te e'bia'og' tiahuyahued mo'epo a'ti e'biade'te e'bia'og' o'e mo'nopo<sub>o</sub>. Huakkuruda fariseo huairi huadakda o'ne nama'da mo'nopo<sub>o</sub>enig'a nogok kenda ogkika' bo'tiahuyaydepo dakhuea'da o'ne nopoe'dik mo'eapone. Konigepo fariseomey huairitaj keyoj, ijjay. <sup>3</sup>Katepi' konig soatayo' sikkiregya' boa'ika'nig, kenda boa'ika'nig nogok konig huame'noete aya'ada on'peeapo. Konigti ज्या'ada nog aratbut ehue' ee'ya' kenpa'ti jakhui'kay ekhuiky' utaka' boa'ika'nig kenda nogok huakka' jak eretnopote jakkutagpite on'bopo 'utta'da o'da'apo, aya'ada kan'pee'po o'da'apo.

**¿Be'taj okme'pukdik mo'e?**  
(Mt. 10.28-31)

<sup>4,5</sup>Huabokerek huaso'taj arakdik o'ne. Kenyo'da aratbutso'taj arakdik o'ne. Nokiregtanayo arakhue'dik o'ne. Konigepo aratbuttaj mididhue' yanika'. Be'ta'taj okme'pukdik moe' daka' o'nona'ne. Diostayo'da yanokme'pukika'. Diosnayo arakdik o'e kenpa'ti e'bueyde'te nokiregtaj pai'da kan'nopo'e'po ta'akyo



en'dik o'e. Kentaj yanokme'puk, ijJay.  
Do'hued huadi'taj ijJay.

<sup>6</sup>Bakoyta' aratbut suhuigda on'pakika'.  
Cinco bakoy a'bakaya'po botta' sigupe  
bayokdik o'ne. Diosnayo bakoytaj o'pakpo  
nogtatipi' okkahuehue' o'e. <sup>7</sup>Opodomeytaj  
Diosa huakka'da o'pakpo daka'  
mo'matojka'ne. Opuden huakuhijitapi'  
mo'dikika'ne. Bakoytaj konig sue'da o'pak.  
Diosa sue'da o'pak. Opodomeytaj huakka'  
o'paknok me'pukhue' yanika'.

**“Jesucristotaj huaknopoe'eri ijJey.”**

**Huaa'eritaj Jesúsa o'batia'pak.**

(Mt. 10.32-33; 12.32; 10.19-20)

<sup>8</sup>“Jesucristotaj huaknopoe'eri ijJey.”  
Aya'ada aratbuttaj on'mana'aponig  
do huabokerek ijJenok Diosa  
me'ta'mona'uynne, “Kenomey kenda  
e'manade'te do'hued huaknopoe'eri o'ne.”  
Diosen huata'moneritaj ijmana'apoy.

<sup>9</sup>“Jesucristotaj oknopoe'hue'ya ijJey.”  
Aratbuttaj on'mana'po “Do'hued  
huaknopoe'eri ehue' o'ne.” Diosen  
huata'moneritaj ijmana'apoy ijJay.

<sup>10</sup>Do huabokerek ijJenok Diosa  
me'ta'mona'uynne, do'taj be'api' dakhuea'  
e'huaa'nayo Diosa bakkahuea'dik o'e.  
Diosen Nokiregtaj dakhuea' e'huaa'nayo  
Diosa bakkahueahue'dik o'eapo.

<sup>11</sup>Nogok judío huaitake' jak huairitaj  
bo'tohua'apone. Dakhuea' boka'ne mona'po  
judioen huaitake' jakyo bo'tohua'apone.  
Kenpa'ti gobierno huairite bo'tohua'apone.  
“¿Ka'tia'pi' huairitaj ijmanbatia'pakapo?”  
Yan'nopepo me'pukehue' yane'.

<sup>12</sup>Huairitaj manbatia'pakdik ee'te Apag  
Diosen Nokirega mo'nopoea'aponok  
'urua'da batia'pakdik mo'eapo. —Jesúsa  
o'mana'uyate.

**Huakka'da katepi' e'matoe'ta'**  
**eretpakhue' yane'. Jesúsa**  
**o'manmadika'uyate.**

<sup>13</sup>—Kenda oro'en huaojkudak  
o'matoe'uyate kenda do'taj

jonposakea'dik o'enok, do'taj yabayokti'.  
Do'hued huama'buytaj yanati',  
Huamanmadika'eri. —Huakka' Jesústaj  
en'tikupopakya' nogtiada Jesústaj  
ona'uyate.

<sup>14</sup>—“O'nen huama'buytaj yabayokti'.”  
Onahue'dik ijJeyapoy. —Jesúsa  
huabokerektaj ona'uyate.

<sup>15</sup>—iKeyoj! Huakka'nada e'matoe'ta'  
eretpakhue' yanika'. Durugnada  
a'eya'po huakka'da katepi' toehue'dik  
yanika'. Sue'da e'taepi' durugda e'dik  
mo'ene. —Jesúsa o'mana'uyate.

<sup>16</sup>Jesúsa a'manmadikaya'po  
o'manbatia'pakpo,  
—A'nenda huabokerek o'uyate. Konig  
huairi o'epo huakka'da o'matoe'uyate. Ke'nen  
ta'batone' huakka'da aypo o'kerektaj konig  
aroz huakka'da o'taboyog'uyate. <sup>17</sup>“Menpa'  
ijka'apo. Do'hued aroz do'hued aypo huatoe'  
jak suhuigda o'e. Aypo huakka'da o'enok meyo  
kudahue'dik o'e.” Kenpa' huairia o'nopoepo.  
<sup>18</sup>Ken, “Oy konig ijka'apoy ijnopoey.

Do'hued aypo huatoe' jaksi'po ijJakyogapoy.  
Nogda huaboroa'da aypo huamatoe' jak  
ijka'apoy ijJakka'depo aya'da aypo arozere  
keyo ijKuda'apoy. Aya'da katepi' ijmatoenig  
ijbakuda'apoy. <sup>19</sup>Kenaka' ijbakuda'depo  
do'hued huamatoe' jakyo huakka'da  
ijtoe'apoy. Huakka'da huabayok ijtoeapoy.  
Baahue'ada bape'dik ijJeyapoy. Mai'dik ijJeyapoy.  
Durugda ijJeyapoy.” Ken huabokerek nama'da  
o'nopoenig'a. <sup>20</sup>“Nama'da i'nopeenig'a. In  
sikyó i'bueyapone. Aya' aypopi' arozpi' nogda  
nogda huakka'da i'matoepo huaboro' jakyo  
i'bakuda'depo noga on'matoeapo. Diosa  
ken huairitaj ona'uyate.” <sup>21</sup>Ken konig o'epo  
aratbut ke'nen huata' huakka'da nogiti  
nogiti on'matoepo, huakka'da e'matoeada  
Dioستهuapa'nayo pai'da on'e. —Jesúsa  
o'manmadika'po o'mana'uyate.

**Diosa huaknopoe'eritaj daka'**  
**o'matojka'.**  
(Mt. 6.25-34)

<sup>22</sup>Nogok huanigpejka'eritaj,

—Aypota' mepu'kehue' yanika'.  
 Kenpa'ti yudtata' mepu'kehue' yanika'.  
<sup>23</sup>Diosa teyda o'epo oro'omeytaj  
 mo'manoea'ika'ne. Oro'omeytaj aypo  
 yudtakon bayokdik mo'ika'apone.  
<sup>24</sup>Surujpig konig o'e yan'nopoepo.  
 Batukehue' o'nika'. Oqkupaeahue'  
 o'nika'. Aypo huamatoe' jak toehue'  
 o'nenig'a Diosayo'da surujpigtaj  
 aypo o'bayokika'. Diosa bakoymtaj  
 sue'da o'pak. Opudomeytanayo Diosa  
 huakka'da bo'pakika'ne. Aya'da  
 katepi' bayokdik mo'ika'apone.  
 Mepu'kehue' yanika'. <sup>25</sup>Aratbut nogiti  
 huabidda ee'ta' on'pakpo, huakka'da  
 e'mepu'keada nogiti huabidda ehue'dik  
 o'neapo. <sup>26</sup>Kenda mo'mepukepo  
 ehue'dik mo'epone. Nogta' nogta'  
 katetapi' mepu'kehue' yanika'.

<sup>27</sup>Huakhuen 'urunada o'ne.  
 Baahue'ada o'nika' kenpa'ti  
 batiokhuihuihue' o'nika' mo'nopoet.  
 Salomónkudak huairitone' o'uyate.  
 Huakka'da o'matoe'uyate. 'Uruda  
 yudtaj o'matoe'po o'utika'uyate.  
 Huakhuen 'urunada o'nika',  
 Salomónnayo sue'da 'uruda  
 o'utika'uyate. <sup>28</sup>Diosa huakunopia  
 okhuenpaka'. 'Urua'da o'ka'. Ida  
 okhuenkot. Ida o'taset. Diosa  
 huakunopia okhuenpakika' kenpa'ti  
 opudomeytaj huakka'da o'pakpo  
 bo'tihuapokika'apone yudtaj  
 mo'matojika'apone. Sue'da moknopoepo  
 nogiti Diostaj daka' yanoknopo'e.  
<sup>29</sup>Katetapi' mepu'kehue' yanika'.  
 ¿Kate o'bape'apo? Nopoehue' yanika'.  
 ¿Kate' o'mamaya'a? Nopoehue'  
 yanika'. <sup>30</sup>Oknopoehue' huae'eria  
 yudtata' kenpa'ti aypota' kenpa'da  
 on'eretpakika'. Opudnayo aypopi'  
 yudtapi' toehue' mo'enig Apag Diosa  
 kenda o'nopoika'. <sup>31</sup>Kenpa'da Dios  
 Huairitaj yan'pakika'po yan'nigpeika'.  
 Ken konig Dios Huairitaj e'paknayo  
 Diosa bo'yokika'apone. Katepi'

bo'pak yudtapi' aypopi' Apag Diosa  
 bo'yokika'apone. —Jesúsa ke'nen  
 huanigpeika'eritaj o'mana'uyate.

**Kenda Dios Huairitaj  
 mo'nigpeonhuahua'po bo'kika'nok  
 Diosa kurudya' okkahuehue'dik  
 o'epo. Kurudya' Diosere huakka'da  
 mo'matoeapone.  
 (Mt. 6.19-21)**

<sup>32</sup>—Do'hued huanigpeika'eri mo'epo  
 sue'da mo'ene. Me'pukhue' yane'.  
 Opudomeyen Apag Dios o'paknok  
 kenoka' aya'ada Diostaj on'nigpeede  
 opudomeykon Apag Diosere huairida  
 mo'epone. <sup>33</sup>Kenda mo'matoenig  
 yan'bahuaya'. Yan'bahuaya'depo pai'da  
 aratbuttaj ken huakupe yan'bayoketi'.  
 Kenda e'ka'te Diosa kurudya'  
 bo'tiahuayapone. Okkahuehue'dik  
 o'epo. Kenda bo'ka'po kurudyo  
 Diosere huakka'da mo'toeapone. Kenda  
 matone'pakhue' o'epo. Okkayhue'dik  
 mo'epone. Huabereeria berehue'dik  
 o'neapo. Kenpa'ti kenda kurudya'  
 mo'toeaponig sukka'poapi' bapehue'dik  
 o'epo. <sup>34</sup>Huakka'tada katetapi'  
 e'paknayo Diostaj sue'da bo'pakapo.  
 Diostaj mo'nigpeepo pai'da aratbuttaj  
 e'bayokika'nayo Diostaj huakka'da  
 bo'pakapone. —Jesúsa o'mana'uyate.

**Jesús Huairitaj ekpoe' yan'nige'ika'.**

<sup>35,36</sup>—Onte'ti indariyo ijtiakapoy.  
 Do huairitaj ekpoe' mennige'ikati'.  
 Konig en'toeapak fiestaya' huairi  
 ekye'taj ke'nen huanaba'a ekpoe'  
 on'nige'ika'. Ken ekye'te huairitaj ida  
 nigokhuike'dik o'neapo. Konigti do'taj  
 ekpoe' mennige'ikati'. <sup>37</sup>Konig huairi  
 o'tiakpo ke'nen huanaba'a ekpoe'  
 en'nige'te o'bahuahuayatonok durugda  
 o'neapo. Ken huairi nog yudtaj  
 o'tiokotdepo yan'bahuad huanaba'taj  
 o'mana'depo aypo o'bayokeapo.  
 Huanaba'taj o'bayokeaponok durugda

o'neapo. <sup>38</sup>Huairi nopotesikyo o'tiakapopi' sikyoeddapi' o'tiakapopi'. Huanaba'a ekpoe' on'nige'po huairi e'tiakte durugda o'neapo. Huanaba' durugda o'neapo. <sup>39</sup>Kenpa'ti nogdakon yan'nope'e. Konig huabereeri a'bereya'po ken horate o'tiakapo jak huatae'eria e'nope'nayo tayhue' o'enok huabereeria jakyo kudhue'dik o'eapo. Kenpa'ti berehue'dik o'eapo. <sup>40</sup>Do kurudya' ijtiakaponok ekpoe' mennige'ikati'. Do huabokerek ijjenok Diosa me'ta'mona'uyne kenoka' huame'noe sikyopi' o'tiakapo nopoe'hue'da ene'te kenoka' ijtiakapoy. —Kenda Jesúsa o'manmadika'uyate.

**Huairien huanaba' huamatoe'eri daka' huakika'eri konig o'ne.**

**Huairien huanaba' huamatoe'eri daka' kikahue' huag'eri konig o'ne.**  
(Mt. 24.45-51)

<sup>41</sup>—¿Oro'omeytayo'da menpa' kenda onmadika', Huairi? ¿Menpa' nogomeytakon i'manmadika'? —Pedroa ona'uyate.

<sup>42</sup>—Huanaba' huamatoe'eri daka' huakika'eri kenpa'ti huanaba' huamatoe'eri 'urua'da huaknopoe'eri konig o'ne ijmanmadikay. Ken huairien jak huanaba' huamatoe'eritaj "Do'hued huanaba'taj aypo yamabayokikati'. Nogbayo ijhua'apoy. A'ti ijtiakapoy." Onanpo. <sup>43</sup>Huairi o'tiakdepo konig huiria onanme'nig huanaba' huamatoe'eria daka' aypo e'bayokika'nayo durugda o'eapo. <sup>44</sup>"Aya'da do'hued ijmatoenig daka' me'tamatoe'." Huairia ken huanaba'taj onanpo. Buttida ijjay. <sup>45</sup>"Do'hued huairi ijhue'da ya'epo yatiakapet." Huanaba'a e'nope'nayo nog huanaba'taj huabokerekere ettone'eretaj huaboa'da o'mabitbitpo kenpa'ti huaboa'da huakka' o'bapudhua'po huakka'

o'mai'onhua'po kenpa'ti konig sine' o'siborudhua'po <sup>46</sup>Kenda huanaba' huamatoe'eria e'ka'te kenoka' ken huanaba' ekpoe' nighue' ee'te kenpa'ti kenme'noete o'tiakapo nopoe'hue'da ee'te huairi o'tiakapo. Ken huanaba' huamatoe'eritaj castiga diga'da ogka'apo kenpa'ti oknopoe'hue' huag'eriere kenpa'da o'maenapo.

<sup>47</sup>Huanaba' ke'nen huairi o'paknig en'nope'ada kahue' o'nepo dakhue'en ogka' kenpa'ti huairi e'tiakapote ekpoe' nighue' o'nenok kenomeyen huairia huakka'da castiga o'magka'apo. Konigti aratbut kenda ijmanika'nig e'nope'ada nigpeehue' o'nepo kenpa'ti do e'tiakapote ekpoe' nighue' mene'apetnigtaj Diosa castiga diga'da ya'magka'apet. <sup>48</sup>Nog huanaba'a kenda huairi o'paknig nopoe'hue' o'nepo kenda huairi pakhue'tada ogka'nok huairia sue'da castiga o'magka'apo. Dakhuea' ogka'nok sue'da castiga o'magka'apo. Konigti aratbut kenda ijyaki nopoe'hue'ada kenda pakhue' ijjeynig egka'nayo Diosa sue'da castiga o'magka'apo. Diosapi' huairiapi' aratbuttaj huakka' katapi' e'bayoknayo daka' nigpeika'dik ka'ne' Diosa 'urua'da e'nope'ana'ayo daka' nigpeika'dik o'neapo. Diosa huakka' e'tihuapoknayo nogomeytakon huakka'da tihuapokdik o'neapo. —Ken konig Jesúsa o'manmadika'uyate.

**Jesústaj sue'ada o'noknopoe'apo nogomeya' sue'ada oknopoe'hue' o'neapopo huaknopoe'eritaj on'bahuadiayapo.**  
(Mt. 10.34-36)

<sup>49</sup>—In huadariyo aratbut abakpoespakaya'po ijtiakuy. Aratbut on'poespakpo konig ta'ak e'bakpak o'e. Ken ta'ak a'bakpakaya'po ijtiakuy. Ken oyda e'bakpakte ijjeretpaki. <sup>50</sup>Konig bautiza egka'te o'e konigti

pai'da nopoe'dik ijjeapoy. Pai'da  
ijnopo'eapopo ijme'pukey. <sup>51</sup>Aratbut  
nog aratbuttaj a'manoeyyaya'po  
o'tiakuy opudomey nama'da  
mo'nopoe'ene. Aratbut nog aratbuttaj  
a'manoeyyaya'po Diosya' tiakhue'  
ijje'uy. Aratbut nog aratbuttaj  
a'poespakaya'po Diosya' ijtiakuy.  
<sup>52</sup>Huaboa'da nogjakyotida huabet nog  
huabettaj dakhuea' on'bahua'pakapo.  
Cinco o'nepo tresa dostaj dakhuea'  
on'bahua'pakapo kenpa'ti dosa trestaj  
huadak hua'a on'batia'pakapo. <sup>53</sup>Sue'da  
do'taj on'pakapo nogomeyanayo  
do'taj pakhue' o'nepo konigepo  
oknopoe'hue' huae'eria dakhuea'  
on'bahua'pakapo. Huaoapi' do'taj  
oknopoe'hue'da me'epo huasi'potaj  
huaknopoe'eritaj ya'huadiayapet.  
Mune'yo huaknopoe'eritaj huayea  
huadiaydik ya'eapet. Huakabua  
huasu'taj huadiaydik ya'eapet. —Jesúsa  
o'manmadika'uyate.

**Kurudtaj on'tiahuaypo huame'noe  
huadak o'eapopi' dakhue'me'noe  
o'eapopi' aratbuta on'nopoe'ika'.**  
(Mt. 16.1-4; Mr. 8.11-13)

<sup>54</sup>—Opudomey indariyo mo'epo  
kurudyo e'sihui' sika e'bia'te niokpo  
yakudyon bo'tiahuaypo “Ohui'apo,”  
boa'ika'nig a'ti o'hui'apo. <sup>55</sup>Kenpa'ti  
indariyo mo'epo toyed e'bapoknayo  
“juknanada o'eapo,” boa'ika'nig ida  
juknanada o'eapo. <sup>56</sup>Opudomey  
nama'da huanopoe'eri mo'ene. Kurud  
bo'tiahuaypo o'hui'apo kenpa'ti  
juknanada o'ta'teapo e'nopoika'ada inok  
do'tanayo Diosen Cristo o'e oknopoe'hue'  
o'nene. —Jesúsa o'mana'po.

**Nog aratbuta gobierno huairitaj  
e'tohua'nayo ida yan'noeya'.**  
(Mt. 5.25-26)

<sup>57</sup>—Kenda huadak e'ka' o'e.  
Kenyo'da 'uruda o'e. Opudomeya onda

nopoe'dik mo'ene. <sup>58</sup>“O'na dakhuea'  
ika'ne,” noga ena'nayo gobierno  
huairitaj bo'tohua'depo e'tohua'te  
kentaj yanoeya'. E'madehue'nayo  
huakupepi' yayokti'. Noeyahue'pi'  
yokhue'pi' ee'nayo gobierno huairitaj  
bo'tohua'apone. Ken gobierno huairi  
sorotataj bo'yokapone. Sorotataa  
huabakuda' jakyo bo'kuda'apone.  
<sup>59</sup>Keyoda ijhue'da orokhue'dik i'eapone.  
Aya'da dehue'te i'yokde'po orokdik  
i'eapone. —Jesúsa o'mana'uyate.

**Aya'da dakhuea' ogka'depo  
nopo'korea'dik ya'nepo  
onte'ti Diostaj nigpeika'dik  
yane'. Jesúsa o'mana'uyate.**

**13** <sup>1</sup>Kenoka' sue'ada Jesústaj  
o'nonbatia'pakpo. Sue'da  
huabokerek Galilea huadaribayo  
huae'eri Diostaj oveja 'uhua  
on'nigbatiaraka'depo Pilato gobierno  
huairien sorotataa Galileayo huae'eri  
huabokerektaj on'batiaraka'po  
'uhua mimi huabokereken mimiere  
jontayo' o'mimihua'uyate. Jesústaj  
o'nonbatia'pak'uyate.

<sup>2,3</sup>—Kenomey huabokerek Galileayo  
huae'eria dakhuea'da ogkika'po  
on'mabuey'uy. Nogomeynayo  
sue'da dakhuea' huaka'eri o'nepo  
mabueyhue' o'ne. Kenpa' nopoe'hue'  
yane', ijjay. Opudomey aya'da  
nopo'koreahue' ee'nayo kenpa'ti  
mo'mabueyapone. <sup>4,5</sup>Kenpa'ti  
Jerusalén huakka' jakyo huabid  
jaktone' o'huekpo o'manbetuyate.  
Dieciocho huabokerektaj  
o'manbetuyate. Kenomey huabokereka  
on'mabuey'uyate dakhuea'da  
huaka'eri o'nepo konigepo  
on'mabuey'uyate. Nogomey Jerusalén  
huae'eri sue'da dakhuea' huaka'eri  
o'nepo bueyhue' o'ne'uyate. Kenpa'  
nopoe'hue' yane', ijjay. Opudomey  
nopo'koreahue' ee'nayo kenpa'ti

aya'da mo'mabueyapone. —Jesúsa o'mana'uyate.

**Higuera hueymey dapakhue'da o'ë.  
Ken konig Jesúsa o'manbatia'pakpo  
o'manmadika'uyate.**

<sup>6</sup>Jesúsa ken konig o'ë  
o'manbatia'pakpo o'manmadika'po,  
—Nogtida huabokereka ta'ba o'toëpo  
menpa'ti higuera huada yanhuadmet  
o'nopepo ta'bayo o'hua'po huadataj  
o'tiahuaynig'a onhuadhue' o'ënok  
<sup>7</sup>ta'ba huatoë'eritaj,

“Eya' bapa' huabayok in ta'bayo  
ijtiakdeme'nig'a higuera hueymey  
huada onhuadhue' o'ëme'. Yata'teg.  
In sorok huadak o'ëneg'a nama'da  
o'kere.” Ta'ba huatoë'eritaj ona'uyate.

<sup>8</sup>“In huabayoknayo ta'teghue' ijjeapoy,  
hueymeyta'po ijtoruapoy kenpa'ti  
'uhua ovejadohua'a ijta'potibukapoy.

<sup>9</sup>Nog manhua'ata' ya'dapakapetpi'.  
Dapakhue' eë'nayo ijta'tegapoy.” Ta'ba  
huatoë'eria ona'uyate. —Ken konig  
Israel oknopoehue' huä'eri o'ne Jesúsa  
o'batia'pakpo o'manmadika'uyate.

**Kenme'noe okmapie'ahuaddikte  
ettone' dakhue' e'ika'te  
Jesúsa o'yarea'uyate.**

<sup>10</sup>Nogok okmapie'ahuaddik  
huame'noete judío aratbut  
baahue'dik e'nika'te judiöen huaitake'  
jakyä' Jesúsa o'manmadika'po.

<sup>11</sup>Keyo huaitake' jakyo ettone' o'ëpo  
dakhue'da o'ëonhuahuika'uyate.  
Dieciocho huabayok dakhue'da  
o'ëonhuahuika'uyate. Dakhuea'  
toto'a ken ettone'taj ogka'nok  
sodoa' o'boika'po butuka' bohue'dik  
o'ika'uyate. <sup>12</sup>Jesúsa o'tiahuaydepo  
—I'yaredene, ettone'. —Jesúsa  
ona'uyate.

<sup>13</sup>Ken Jesúsa o'tibata'tenok ida ken  
ettone' butuka'da o'bodpo huabo'da  
“Dios 'urunanada o'ë,” kenpa'ti “dakiti

Dios” oa'uyate. <sup>14</sup>Huaitake' jak  
huairianayo o'huadiay'uyate. Judíoen  
okmapie'ahuaddik huame'noete Jesúsa  
o'yarea'denok o'huadiaypo,

—Seis huame'noe baa'dik mo'ëne.  
Ken seis huame'noe e'yarea'ta'  
e'paknayo yan'tiakti'. Judíoen  
okmapie'ahuaddik huame'noete  
be'yare'po tiakhue' yanika'. —Huaitake'  
jak huairia o'mana'uyate.

<sup>15</sup>—Nama'da huanopoe'eri mo'ëne.  
Okmapie'ahuaddik huame'noete  
opudomey aya'da opudomeyen  
vacatapi' burrotapi' hue'ey kan'maye'po  
bo'tikujpo hue'eyte bo'tohua'ika'ne.

<sup>16</sup>In ettone' Abrahamen adhuea'  
huayayo eë'tada toto' huairia dakhuea'  
ogkadhuahuika'nok ettone' dakhue'da  
o'ëonhuahuika'po dieciocho huabayok  
dakhue'da o'ëonhuahuika'uyate.

Okmapie'ahuaddik huame'noete  
e'yarea' huadak o'ë. Dapi' huadakda  
o'ë yan'nope'. —Jesús Huairia judiöen  
huaitake' jak huairitaj ona'uyate.

<sup>17</sup>Jesúsa kenda enade'te kenomey  
Jesústaj on'huadiayika'nig'a  
on'mabira'uyate. Nogomeynayo  
aya'ada Jesústaj durugda o'nepo, kenda  
'urua'da Jesúsa o'kika' on'tiahuaydepo  
kentaj durugda o'nuyate.

**Mostazakidtaj ken konig  
o'ë o'man'batia'pakpo  
o'manmadika'uyate.**

(Mt. 13.31-32; Mr. 4.30-32)

<sup>18</sup>—Huadak hua'a konig Dios  
Huairitaj o'noknopoeaponigtaj  
on'nigpeeaponigtaj ken konig o'ëapo  
ijmanbatia'pakpo ijmanmadika'apoy.

<sup>19</sup>Konig huabokereka suigkidda  
mostaza huakid o'tuk. Kenkida  
o'kerekepo nogok huaboro'da  
o'ëdepo hua'opite huakka' bakoya  
o'pakka'. Konigti huakkuru Dios  
Huairien huaknopoe'eri sue'da o'ne.  
Nogok huakka'ada Dios Huairitaj

o'noknopoe<sub>o</sub>pon on'nigpeonhuahuika'po  
huakka'nada huaknopoe<sub>o</sub>eri o'neapo.  
—Jesúsa o'mana'uyate.

**Pan e'bia'og'a ken konig o'ka'  
Jesúsa o'manbatia'pakpo  
o'manmadika'uyate.  
(Mt. 13.33)**

<sup>20</sup>—Huadak hua'a konig Dios  
Huairitaj o'noknopoe<sub>o</sub>aponigtaj  
on'nigpee<sub>o</sub>aponigtaj ken konig o'epo  
ijmanbatia'pakpo ijmanmadika'apoy.  
<sup>21</sup>Konig sigda pan e'bia'og'a ettone'a  
huakka' harinaogyo o'tokbuk.  
Harinaogyo e'bia'og' o'tokbukdepo  
daka' ogkuayaga'. Huabada o'kudapo.  
Aya'da o'bia'apo. E'bia'og'a o'bia'po  
konig Dios Huairien huadak hua'a  
on'manmadika'nok huakka'ada nogya'  
nogyā' huabada o'noknopoe<sub>o</sub>apo.  
—Jesúsa o'mana'uyate.

**Diosyo huahua' konig suigda  
akbogpe huakud o'e.  
(Mt. 7.13-14, 21-23)**

<sup>22</sup>Jerusalényon Jesúsa  
o'hua'udhua'po nog huakka' jakyo  
nog huakka' jakyo o'pokandepo  
o'manmadika'uyate.

<sup>23</sup>—¿Menpa' Diosa sue'tada  
ya'manopo'yarea'apo? —Nogtiada  
Jesústaj ona'nok,

<sup>24</sup>—Diosyo huahua' konig  
suigda akbogpe huakud o'enok  
huakka' yan'pakpo yan'kud.  
Huakka'ada egkudta' on'pakpo  
onhuahua'nig'a kudhue'dik o'neapo  
Diosenbayo a'kudya'po konig  
o'e ijmanbatia'pakapoy. <sup>25</sup>Jak  
huatoe<sub>o</sub>eri huairi nogok e'mabode'te  
akbogpe jokhuikdepo opudomey  
dakhuea' huakka'eri jak kurute  
mo'epo “Mo'nigokhuike', Huairi.”  
Mona'aponig'a. “Opudomey meyo  
huae<sub>o</sub>eri mo'et. Okiehue'ya o'nene.”  
Huairia o'mana'apo. <sup>26</sup>“Onere

o'bape'ikay kenpa'ti onere o'may'ikay  
kenpa'ti oro'omeyen jak kuruta'  
onmadika'onhuahua'uyne.” Opudomeya  
huaboa'da mona'apone. <sup>27</sup>“Opudomey  
meyo huae<sub>o</sub>eri mo'et o'nona'dene.  
Do'taj me'nokhua'. Dakhuea' huaka'eri  
mo'ene.” Huairia mona'apone. Kenda  
konigti Diosa mona'apone. <sup>28</sup>Keyon  
dakhuea' huaka'eria bokbahua'depo  
pai'da mo'manopo'eapet. Kenpa'da  
Diosyo huahue'dik mo'eapopo.  
Abraham Isaacere Jacobere Diosen  
huamanbatia'pakeriere Dios Huairiere  
adyoda ee'ne'te mo'batiahuaydepo.  
Diga'da mo'bahuikonhuahuika'apo.  
Pai'da mo'nopo'epo bo'idokboke'apo.  
<sup>29</sup>Kenpa'ti aratbut Dios Huairitaj  
on'batiakapo. Niokpo e'orokyen  
on'tiakapo. Niokpo e'huakudyen  
on'tiakapo. Toya' kenpa'ti kutaya'  
on'tiakapo. Nogyā' nogya' Dios  
huairitaj on'huatiakapo. Dios  
Huairiere konig ke'nen'si'po  
on'bape'ika'apo. <sup>30</sup>Huakka'ada oy  
konig Diosen aratbut ehue'da o'ne.  
Judío aratbut ehue'da o'ne. Nogok  
Diosa o'matinepahuinok Diosere  
o'neapo. Nogomey judío aratbutpi' oy  
Diosen aratbut o'ey on'nope<sub>o</sub>nig'a  
nogok Dostaj oknopoe<sub>o</sub>ehue' o'neaponek  
Diosa matinepahuihue' o'maeapo.  
Diosere ehue'da o'neapo. —Jesúsa  
o'mana'uyate.

**Jerusalén huae'eritaj Jesúsa  
o'matinepahui'uyate.  
(Mt. 23.37-39)**

<sup>31</sup>Kenoka' sue'da fariseo aratbut  
o'nokyepo,

—Iya' yabakhua'. Herodes gobierno  
huairia ontaj e'arakta' o'pak.  
—Fariseoa Jesústaj o'nona'uyate.

<sup>32</sup>—Yanhuati'. “Eya', oy eme'tekon  
sue'da huame'noe toto'taj ijaenapoy  
kenpa'ti ijbayarea'apoy dakhue'taj  
ijbayarea'apoy. Eme'te kenta' aya'da

ijkuhuitapoy, oa'” Herodestaj ya'nona'. Herodes nama'da huaa'eri konig engaña huaa'eri o'e. Fariseomeytaj o'mana'po. <sup>33</sup>Ken oy eme'te adme'ta' nog adme'ta' nog adme'ta' Jerusalényo hua'dik ijje. Jerusalényayo' Diosen huamanbatia'pakeri bueydik o'nika'. —Jesúsa o'mana'uyate.

<sup>34</sup>—Jerusalényo huae'eritaj o'nona'ne. Diosen huamanbatia'pakeritaj mo'mabatiarakika'uyate. Kenpa'ti Diosa o'mata'mona'uyatenigtaj, kenomeytaj huida mo'bapa'ea'po mo'mabatiarakika'uyate. Konig huatahuaj huayea huasi'potaj okajpea o'batioka'ika' konigti opudomeytaj a'batiokaya'po e'kupopakata' ijpakuynig'a, nogok nogok a'batiokaya'po e'kupopakata' ijpakuynig'a opudomeynayo pakhue'da mo'e'uyne. <sup>35</sup>Opudomeyn jakya' Diosa o'bakhua'de. Opudomeytaj tiokahue' mo'eapone. Tihuapokhue' mo'eapone. Kenpa'ti nopo'yareahue' mo'eapone yan'nopoe'. Nogok do'taj tiahuahue' o'neonhuahuika'apone. “Dios Huairia in huabokerektaj o'ta'mona'uyate. Huadakda o'e.” Nogoknanada mona'deapone kenda onte'ti do'taj bo'tiahuahuyapone. —Jesúsa o'mana'uyate.

**Huabokereka dakhue'da o'epo,  
huabopij hua'opiere ke'poda  
o'iyokuyate. Jesúsa o'yarea'uyate.**

**14** <sup>1</sup>Nogok okmapie'ahuaddik huame'noete a'bapeya'po Jesús o'hua'uyate. Fariseo huairien jakyo o'hua'po, nog fariseo huairi o'nepo menpa' Jesús okmapie'ahuaddik huame'noete ya'yareapetpi' on'nopoe'po Jesústaj daka' on'tiahuahuyate. <sup>2</sup>Jesús huakkuruyon huabokerektaj okpoe'po dakhue'da o'epo huabopij hua'opiere diga'da o'iyokuyate.

<sup>3</sup>—¿Okmapie'ahuaddik huame'noete menpa' yarea'dik

ya'e? ¿Menpa' yareahue'dikpi' ya'e? —Jesúsa o'mana'po, Moisésenba' huamanmadika'eritaj kenpa'ti fariseotaj o'mana'nok. <sup>4</sup>Huamanmadika'eri fariseoere a'tokhue'da o'nenok Jesúsa dakhue'taj o'yareadpo o'ta'mona'uyate. <sup>5</sup>Onte'ti fariseomeytaj,

—Opudomey o'nen burropi' vacapi' hue'ey huabid sorokkogyo okmapie'ahuaddik huame'noete ee'pi' e'takotnayo dapita' ida sorokkogyo bo'totokatu'ika'. Opudomey kenda daka' mo'nopoe. —Jesúsa o'mana'uyate. <sup>6</sup>Kenda Jesúsa eade'te buttida o'e on'nopoe'po nogda a'tokhue' o'nepo sohuata'da o'noke'uyate.

**E'toepak fiesta menata huahuad  
ya'huad Jesúsa o'manmadika'uyate.**

<sup>7</sup>Ken fiestayoy on'batiakpo kutopate on'bahuadpo kente huairi on'huadika' ken huahuadtaj on'ukpo on'huaduyate. Jesúsa kenda o'tiahuahuyadepo o'manmadika'po:

<sup>8</sup>—E'toepak fiestate yatiakti' enade'te on'hua'depo huairi o'e aratbuta me'noknopoe'po kente huaboro' huairi on'huadika' kente huadhue' yanika'. Huairien huahuadte e'huadnayo nogda huakhuairi o'tiakatoapopi'. <sup>9</sup>Fiesta huaka'eria ontaj behuatiakaponepi'. “Yakbo' in huabokerek kente o'huadapo,” mena'apetpi'. Ken nogyon kente huanaba' on'huadika'nig kente huaddik i'epo. I'bira'epo nogtekon i'huadapone. <sup>10</sup>E'toepak fiestayoy yanhua'po kente huiri ehue'a on'huadika' kente yanhuadatoti'. Kente e'huadte fiesta huaka'eria o'tiakdepo, “Nogyon kente huairi on'huadika'nig kente yahua, huadi'.” Ontaj ona'dik mo'eapet. Kenoka' huadakda i'epo konig huairi i'e aya'ada kutopate on'huadpo on'nopoe'apo. <sup>11</sup>“Huairi ijje,” aratbut

huata'da nama'da e'tinopoe'nayo  
 "Huairi ehue' i'e," Diosa o'batia'pakapo.  
 "Huairi ehue' ijjej." Aratbuta huata'da  
 e'tinopoe'nayo "huairi i'e." Diosa  
 o'batia'pakapo. —Jesúsa o'mana'uyate.

<sup>12</sup>"E'toepak fiestate yatiakti' Jesús."  
 Fariseoa oname'nigtaj kentaj Jesúsa  
 ona'po,

—Nogok onte'ti fiesta i'ka'po  
 huakka' aypo i'manhuađ'po, huadi'taj,  
 huama'buytaj, huaojtaj, huayetaj,  
 huairitaj "Yan'tiakti', aypo doere  
 mon'bape'." Kenomeytaj manahue'  
 yaika'. Kenomeytaj e'tobape'nayo  
 onte'ti kenomeyere i'bape'apetpi'  
 kenpa'ti dehuehue' mo'eapone.

<sup>13</sup>Fiesta eka'nayo huakka' aypo  
 e'manhuađ'nayo "Yan'tiakti' doere  
 aypo mon'bape'." Pai'da huae'eritaj,  
 dakhue'so'taj, huakkettaj, ekpobigtaj  
 yamana'ika'. <sup>14</sup>Kenda e'mana'ika'nayo  
 durugda i'eapone kenomeya kenpa'ti  
 ontaj tobapehue'dik mo'eapone  
 Diostaj daka' huanigpeika'eri kurudyo  
 Diosyo en'huade'te Diosa huadakda  
 mo'nigka'apone. —Jesúsa ona'uyate.

**"Doere mon'bape' yan'tiak." Dios  
 Huairia huakka'tada o'mana'uy.  
 Ken konig Jesúsa o'manbatia'pakpo  
 o'manmadika'uyate.**

<sup>15</sup>Nogtida huabokereka kutopate  
 o'tohuadpo Jesústaj kenda o'peede  
 Jesústaj

—In huadariyo Dios Huairiere Diosen  
 aratbutere durugteda on'bape'apo.

—Kenbokereka Jesústaj ona'uyate.

<sup>16</sup>Jesúsa o'manbatia'pakpo  
 o'manmadika'po,

—Huairia a'ti huakka'tada aypo  
 kan'manigmanhuađje'po o'mana'apo.  
 Huanaba'taj o'mata'mona'po, "Huairia  
 be'tobape'po a'ti aypote yan'tiakti'."  
 Yan'mana'. Huakka'tada yan'manati'. <sup>17</sup>Ken  
 aypo e'mahueyde'te, onte'ti huanaba'taj  
 o'mata'mona'po, kenomeytaj 'ikken

mo'maname'te "Oyda yan'tiak. Aypo  
 o'mahueyde yan'tiak." Yan'manati'.

<sup>18</sup>Kenda e'peedeada "Aypote  
 huahue'dik ijjej." Aya'ada huabo'a'da  
 konigti on'mana'po, "Ta'ba huakupete  
 ekka'me'tenok tiahuyatudik ijjej.  
 Konigepo aypote huahue'dik ijjej. Huairia  
 do'taj huadiyahue' ke'e'." Huakkuruda  
 huanaba'taj ona'uyate. <sup>19</sup>Noga "Diez toros  
 konig 'uhua vaca konig tronco huatotokeri  
 huakupete ijbae'dey. Menpa'ti huadakda  
 totokdik ya'eta'po tiahuyadik ijjej. Aypote  
 huahue'dik ijjej. Huairia do'taj huadiyahue'  
 ke'e'." Noga huanaba'taj ona'uyate.

<sup>20</sup>Noga "Itoepakdey. Konigepo aypote  
 huahue'dik ijjej." Nogakon ona'uyate.

<sup>21</sup>Huanaba' huairitaj on'kumejdepo  
 kenda aratbuta on'mana'denig huairitaj  
 o'nona'to'uyate. Kenoka' huairi o'diayonpo,  
 "Huakka' jak kurute yanhuati'. Aya' jak  
 kurute yanhua'eti'. Iyo pai'da huae'eritaj  
 yan'batotiakti'. Dakhue' huašo' huae'eritaj  
 yan'batotiakti'. Huakkettaj yan'batotiakti'.  
 Kenpa'ti huakpobigtaj yan'batotiakti'.  
 Huairia huanaba'taj o'mana'uyate. <sup>22</sup>Nogok  
 huanaba' onte'ti on'tiakdepo, "Konig  
 o'na oname'nig konigti o'kay, huairi,  
 huakked huahud o'nenok nogda tiakdik  
 o'ne." Huanaba'a o'nona'nok <sup>23</sup>"Nogyon  
 nogyon dagtepi' huahuete'pi' meyopi'  
 aratbut e'ne'te, huairien aypote yan'tiakti'  
 ighua'da yan'manati'. Huakka'da do'hued  
 jakyo e'taeta' ijpaki. <sup>24</sup>Konigepo aya'da  
 huakkurueritaj yan'tiak, doere yan'bape'  
 ijmana'nig'a aya'ada do'ere huakka' aypo  
 bapehue' o'neapo." Huairia huanaba'taj  
 o'mana'uyate. —Ken konig Dios Huairia  
 o'ka'apo Jesúsa o'manbatia'pakpo  
 o'manmadika'uyate.

**Cristotaj e'nigpeika'ta' e'paknayo  
 huakkuruda monig ka'dik  
 ijjej nopoe'dik ya'ne.**

<sup>25</sup>Jesústaj huakka'ada aratbut  
 on'tahua'enek o'batikorudpo,  
 o'mana'po:



26—Be'api' do'taj e'nigpeika'ta' e'paknayo do'taj huakka'da di' e'dik me'nika'. Huaotapi' huayetapi' huatoe'tapi' huasi'potapi' huama'buytapi' huidpotapi' huata'dapi' sue'da di' yanika'. Do'tanayo huakka'da di' e'dik yanika'. Beapi' do'taj huakka'da di' ehue' ee'nayo do'taj nigpeikahue'dik mo'ëapone. Do'hued huanigpeika'eri ehue'dik mo'ëapone. 27 Konig hueypa cruzte pai'da on'nope'epo konigti do'taj a'nigpeikaya'po pai'da e'nopo'eta' pakhue' ee'nayo do'hued huanigpeika'eri ehue'dik mo'ëapone. Kenpa'de hua'enda e'paknayo do'hued huanigpeika'eri ehue'dik mo'ëapone. 28 Menpuru do'huedda katepi' ijeretpakikana'ig Jesústaj a'nigpeikaya'po onte'ti do'huedda eretpakhue' ijje'apo, kenpa' huakkuruda daka' yan'nope'epo. Kenpa'da hua'enda e'paknayo do'hued huanigpeika'eri ehue'dik mo'ëapone. Do'hued huanigpeika'eri ee'ta' e'paknayo huakkuruda monig ka'dik ijje daka' yan'nope'epo. Pai'da ijnopo'ëapetpi', nogpi' aya' ijmatoenig pai'da huae'eritaj bayokdik ijjeapetpi', kenpa' huakkuruda daka' yan'nope'epo. Konig huabokereki' huaboro' jak e'ka'ta' o'pakpo huakkuruda menigte e'dik ya'et daka' o'nope'epo. Sue'da e'toe'nayo jak huaboa'da kahue' o'ëapo. 29 Daka' nopoëhuedada eka'nayo jak 'iddu o'ka'denig'a siro jaktaj huakupebayo' o'epo dakeahue'dik o'ënok aya'ada kentaj on'tierikapo. 30 "Ken huabokereka huaboro' jak e'ka'ta' o'paknig'a jak dakeahued huakupe o'dakea'po jaknayo dakeahue'dik o'ëapo." Huayahuaya kenda on'mana'po on'tierikapo. 31 Konigti gobierno huairipi' diez mil sorotataj o'mato'epo nog gobierno huairipi' ke'nen taka' veinte mil sorotataj o'mato'epo

on'tiak. Tiakhuedaded gobierno huairi diez mil sorotataj o'mato'epo daka' nopounhua'dik o'ëapo. "Do'hued diez mil sorotataj menpa' gana ka'dik ya'net." Nopoë'dik o'ëapo. 32 Gana kahue'dik o'neapo. E'nope'nayo sue'da huabokerektaj taka' huairitaj o'mata'mona'apo. "E'manoeya'ta' o'paki." Taka' huairitaj ya'nona'. O'mana'apo. 33 Ken konig, "Jesústaj a'nigpeikaya'po Dios Huairia e'paknayo do'huedda eretpakhue' ijje'apo aya'da ijmatoenig kenpa'da ijmaenapoy." Kenpa' nopoëhue' ee'nayo do'hued huanigpeika'eri ehue'dik mo'ëapone.

**Sal konig Cristoen huanigpeika'eri o'ne. Sal pai' ehue' ee'nayo kenpa'da en'dik o'e.**

(Mt. 5.13; Mr. 9.50)

34 Sal huadakda o'epo aratbuttehuapa'. Konigti do'hued huanigpeika'eri konig sal huadakda o'nepo aratbuttehuapa' huadakda o'ne. Sal huadak ehue' ee'nayo onte'ti huadak kahue'dik o'ëapo. 35 Sal huadak ehue' ee'nayo huadaritehuapa' huadak ehue'dik o'ëapo. Paichi kahue'dik o'ëapo. Kenpa'da en'dik o'e. Daka' men'pee'. Daka' me'noknopenka'. —Kenda Jesúsa o'manmadika'uyate.

**Oveja e'titikon ken konig o'e Jesúsa o'manbatia'pakpo o'manmadika'uyate.**

(Mt. 18.10-14)

**15** 1 Jesústaj a'peeya'po aya'ada gobierino huakupe huabae'eri dakhuea' huaka'eriene Jesústaj on'huahua'po. Ken gobierno huakupe huabae'eri engaña huaka'eri o'nika'po dakhuea' huaka'eriene Jesústaj on'huahua'uyate.

2—Dakhuea' huaka'eritaj o'bae'. In huabokereka dakhuea' huaka'eritaj o'baepo o'batobape'. —Fariseo huae'eri

Moisésenba' huamanmadika'eriarea  
Jesústaj dakhuea' on'huaa'uyate.

<sup>3</sup>Jesúsa o'manbatia'pakpo  
o'manmadika'po,

<sup>4</sup>—Cien oveja on e'toē'nayo nogtida  
e'titikonnayo nogomey noventa  
y nueve mirebate oveja en'mae'te  
i'bakhua'apo ken nogtida ovejataj  
i'ukapo. E'huahuayta'da i'pakpo  
i'ukpo. <sup>5</sup>I'huahuaydepo i'kume'pepo  
durugda i'ēapone. Jakyo i'hua'po.  
<sup>6</sup>Jakyo i'tiakdepo aya'tada huadi'taj  
i'bakupopaka'po, “Do'hued oveja  
o'titikonme'tenig ken ijhuahuaydey.  
Konigepo doere mo'durugpak,”  
o'na i'mana'apone. <sup>7</sup>Konigti  
nogtida dakhuea' huaka'eri Diostaj  
o'nopo'korea'depo onte'ti Diostaj  
ijnigpeēapoy o'nopoēdepo kurudyo  
durugnanada o'neapo. Nogomey  
noventa y nueve'pi' sue'da huadak  
o'nepo Diostaj nopo'koreahue'dik o'ey  
on'nopoēnok kenomeytaj kuruderia  
durugda matoēhue' o'neapo. Ijjay.  
—Jesúsa o'manmadika'uyate.

**Ettone'en huakupe e'titikon konig  
o'e, Jesúsa o'manbatia'pakpo  
o'manmadika'uyate.**

<sup>8</sup>—Bepi' ettone' diez oro huakupe  
e'taeada nogtida e'titikonnayo  
huakjey o'bakpakapo kenpa'ti o'ukpo  
jonberokeapo, jakyo jonberokeapo,  
jakyo daka' o'ukonhua'po  
e'huahuayta'da o'pakpo o'ukonhua'apo.  
<sup>9</sup>Ken huakupe o'huahuaydepo ettone'  
huadi'taj kenpa'ti nogomey meyohue'da  
jakyo huae'eritaj o'bakupopakapo,  
“Ken huakupe be'tatitikonme'nig  
ijhuahuaydey doere mo'durugpak.”  
Ettone'a o'mana'apo. <sup>10</sup>Konigti nogtida  
dakhuea' huaka'eri e'nopo'korea'nayo  
kurudyo Diosere Diosen huata'moneri  
durugnada o'neapo, ijjay. —Ken  
konig Jesúsa o'manbatia'pakpo  
o'manmadika'uyate.

**Huabokerekeni'poa  
nama'da o'kadhuahua'depo  
o'nopo'korea'uyate. Ken konig  
Jesúsa o'manbatia'pakpo  
o'manmadika'uyate.**

<sup>11</sup>—A'nenda huabokerek o'uyate.  
Botsi'poa' huabokerek huasi'po o'toēpo,  
<sup>12</sup>huasueda huaojtaj, “Konig huaoj  
e'bueyte huasi'potaj on'bayokika' oyda  
ijpaknok o'na bueyhuedaded katepi'  
huakupepi' beyok, pag.” Huasueda  
huaojtaj ona'uyate. Ken huaoj ke'nen  
botta'si'potaj ke'nen o'tamaey  
o'bayoke'. Huakka'da o'tamaenok  
o'bayoke'uyate. <sup>13</sup>Sue'da huame'noe  
e'pokde'te huasueda huasi'poa aya'da  
huaboa'da huaojen o'toēdepo nog  
huadaribayo bidteda o'hua'uyate. Keya'  
dakhuea' o'kadhuahua'po aya'da ke'nen  
huakupe gasta o'ka'po dakhuea'da  
o'ka'po gasta o'ka'uyate. <sup>14</sup>Kenoka'  
aya'da gasta o'ka'depo huakupebayo'  
o'ēdepo ken huadaribayo hui'hue'da  
o'ēpo aypobayo' o'nenok ke'na  
huaboa'da o'kusitokpo. <sup>15</sup>Konigepo ken  
huadari huatoē'eritaj o'huahua'uyate.  
Ke'nen a'tabaaya'po o'huahua'uyate.  
Ken huadari huatoē'eria ke'nen  
huakyaritaj metamotoē'po  
o'ta'mona'uyate. <sup>16</sup>Ke'na diga'da  
o'kusitokpo huakyarien aypo e'paktada  
nog huakyari' huatoē'eria yokhue'  
o'nuyate. <sup>17</sup>Konigepo huaboa'da daka'  
o'nopoēpo “Do'hued huaojen jakyo  
huakka'da huanaba' e'ēada huakka'da  
aypo on'toēpo aya' bapehue'dik o'nika'.  
Donayo iyo aypota' bueydik ijjeapoy.  
<sup>18</sup>Do'hued huaojenbayo ijkumejapoy.  
“Diostaj dakhuea'da ijkadhuahua'mey  
kenpa'ti ontaj dakhuea'da ijka'mey.  
<sup>19</sup>Ontē'ti huasi'poa' onahue' meeti'.  
Q'nen huanaba' eē'ta' ijpaki, pag.' Ken  
do'hued huaojtaj anay,” o'nopoē'uyate.  
<sup>20</sup>Ken ke'nen huaojen jakyo huaboa'da  
ona'ti o'kume'uyate.

Ken jakyo iboteda ee'de'te kentaj ke'nen huaoa o'tiahuaydepo o'tinepahui'po huasi'potaj o'huaketpo di' o'epo o'dokopo kenpa'ti o'buyukuyate. <sup>21</sup>Huaojtaj "Diostaj dakhuea'da ijkadhuahua'mey. Ontakon dakhue'da ijka'mey. Onte'ti siona' onahue'dik meeti', pag." Huasi'poa ona'uyate. <sup>22</sup>Huanaba'taj "Uruda huaot yan'totiakpo yanotta'. Kenpa'ti huabapiokot yanotta'. Hua'iotkon yanotta'. <sup>23</sup>Kenpa'ti ken huabo vaca sihuada e'huae' yan'totiakpo yan'arak. Fiesta mogka'. Huakka' aypo mon'bape'. <sup>24</sup>Do'hued huasi'poa konig ekbueyonig me'ika'nig'a oy onte'ti o'noe. A'nen o'titikon'uyng oy huabo'da o'huahuaydey." Huaoa huanaba'taj o'mana'uyng huabo'da fiesta ogka'de'uyate.

<sup>25</sup>Kenoka' huatone'ma'buy ta'bayo o'epo o'baa'po jakyo o'tiakdepo música o'peepo kenpa'ti e'huak o'pee'uyate. <sup>26</sup>Huaojen huanaba'taj "¿Katia'po yagka'?" ona'uyate. <sup>27</sup>"O'nen huama'buy o'tiakdenok kenpa'ti dakda okyeyaknok o'nen huaoj huabo vaca e'huae' sihuada huanaba'taj yaarak o'mana'." Huanaba'a ona'uyate. <sup>28</sup>Huatone'ma'buya o'diaypo "Jakyo kudhue' ijjeapoy." Oa'. Ke'nen huaoa o'huao'oronpo, "Yakud ijjay," ena'tada <sup>29</sup>"Huakka'da huabayok o'nen ijbaa'onhuahua'ika'nig'a, ontaj o'nigpeika'nig'a, fiesta do'hued huadi'taj kabatoke'po do'taj sigpi' yokhue' o'ika'ne. Cabrito konig 'uhua sue'pi' yokhue' o'ika'ne. <sup>30</sup>O'nensi'ponayo huakka'da o'nen huakupe o'bae'uyng potajtaj o'bayokuyate. Oy e'kumejde'te huabo vaca e'huae' sihuada i'nigarakdene." Huaojtaj ona'uyate. <sup>31</sup>"Onnayo doereda i'ika'ne, aya'da ijmatoenig o'nen kenpa'ti i'taene. <sup>32</sup>Oy durugpakdik o'ene kenpa'ti fiesta ka'dik o'ene

konigepo o'nen huama'buy konig e'bueyda o'eme'nig'a oy onte'ti o'noe. Konig o'yoyahue'uyatenig'a oy o'huahuaydey, sion." Huaoa ona'uyate. —Kenda Jesúsa o'manbatia'pakpo ken konig e'nopo'korea'nayo dakhuea' huaka'eritaj Apag Diosa o'matinepahui'po o'bakkahuea'ika'apo o'manmadika'uyate.

**Huairien huatamatog'eri  
nama'da o'ka'po konig huairien  
e'tamatig'ada nama'da o'bayokenok  
kenpa'da huairia o'en'uyate. Jesúsa  
ken konig o'manbatia'pakpo  
o'manmadika'uyate.**

**16** <sup>1</sup>Huanigpeika'eritaj o'manbatia'pakpo o'manmadika'po, —Huairi o'uyate. Huakka'da o'tamaenok huatamatog'eria o'tamatog'epo, "O'nen huatamatog'eri huabokerek o'nen i'tamaenig daka' tamatoehue'ada dakhuea' i'takika'ne." Aratbuta on'huaa'nok, <sup>2</sup>"Yatiak." Huatamatog'eritaj ona'uyate. E'tiakde'te "Do'hued e'tamatog'ada nama'da o'bayokika'. Nogomeya menona'ne. Onte'ti do'hued huatamatog'eri ehue'da i'ea'pone. Aya'da e'bahuaya'ba' kenpa'ti aya'da e'bae'ba' menigtotiak." Huairia huatamatog'eritaj ona'uyate. <sup>3</sup>"Oy huairia me'endene ke'nen huatamatog'eri onte'ti ehue'da ijjeapoy. ¿Kate ijka'apet? Teyhue'da ijje'po ta'ba kahue'dik ijjej. Konig aratbuttaj huakupe beyok e'manika'ta' pakhue' ijje'po, ijbira'i." Kenda huairien huatamatog'eria huanopoya'da o'nopo'epo. <sup>4</sup>"Oyda kenda ijka'apoy i'jnopo'ey. Nogok jak to'ehue' e'ede'te, huakupe to'ehue' e'ede'te, ay'pobayo' e'ede'te aratbuta kenomeyen jakyo do'taj medeapetpi' kenda ijka'apoy i'jnopo'ey." Kenpa' huanopoya'da

o'nope'uyate. <sup>5</sup>Kenomey do'hued huairitaj dehuea' e'nahue'taj kenomeytaj nogti nogtia' menigtotiak ona'nok. Huakkuru huatiakeritaj "¿Do'hued huairitaj meniga' dehuea' i'e?" Huakkuru dehuea' huae'eritaj ona'uyate. <sup>6</sup>"Cien kajapotone'te huasihuaj dehuea' ijjej." Huakkuru huabokereka ona'nok "In o'nen dehuea' e'huae'ba' i'tene, ida yahuadpo yamadoya', cincuentayo'da yamadoya'. Ken onte'ti huairitaj cincuentayo'da dehuea' i'unapone." Huairien huatamatoe'eria ona'uyate. <sup>7</sup>Nogakon e'tiakde'te "¿O'na meniga' dehuea' i'e?" Nogtaj ona'nok, "Cien huaboro' sacco trigo dehuea' ijjej." Noga ona'uyate. "In o'nen dehuea' e'huae'ba' i'tene, kente ochenta huaboro' sacoyo'da yamadoya'. Ken onte'ti huairitaj ochenta huaboro' sacoyo'da dehuea' i'unapone." Huairien huatamatoe'eria ona'uyate. Kenda konigti nogtaj nogtaj dehuea' huae'eritaj o'mana'uyate.

Konigepo nogok dehuea' huae'eria huairien huatamatoe'eritaj ya'deapetpi'. <sup>8</sup>Huairien huatamatoe'eri ken konig o'ka'de huairi o'nokotdepo, "In dakhuea' huatamatoe'eria dakhuea' be'taka' aratbuta kentaj nogok mentihuapoke'po daka' akaya' o'nopoepo. In huadariyo Diostaj oknopoehue' huae'eri aratbut nogtaj nogtaj 'urua'da akaya' on'nopoepo, nogok kenpa'ti mentihuapoke'po. Diostaj huaknopoe'erinayo sue'da 'urua'da akaya' on'nopoika', nogok sue'da mentihuapokedepo."

<sup>9</sup>Konigepo huakupepi' nog katepi' mo'toepo nama'da gasta ka'dik mo'ika'pi'. Huata'da bo'pakpo Diostaj nigpeehue'da mo'epo gasta ka'dik mo'ika'pi'. Huata'da bo'eretpakpo nama'da bae'ika'dik mo'epi'. Diostaj daka' yan'nigpeepo aratbuttaj yan'tihuapokikati', yan'bayokikati',

pai'da huae'eritaj yan'bayokikati', ijjay. Nogok opudomey e'bueyde'te katepi' huakupepi' toehue' mo'edenok o'nen huadi'a Dioserea kurudya' mo'baedapone.

<sup>10</sup>Nogen sue'da e'tamaetaj daka' e'tamatie'ika'nayo konigti nogenkon nogitinada daka' mo'tamatie'ika'apo. Kenpa'ti nogen sue'da e'tamaetaj daka' matiehue' ee'nayo konigti nogen nogitinada daka' tamatiehue'dik mo'epo. <sup>11</sup>Huakupe katepi' mo'toepo daka' yan'nopoepo yanikati'. Huakupe gana e'ka'ta' bo'pakpo engaña ka'dikpi' mo'ene. Diosa o'paknok huakupe mo'toika'ne. Huakupe daka' toehue' ee'nayo pai'da aratbuttaj daka' bayokhue' ee'nayo Dios huadaknanada huaunhuahuika' yokhue'dik mo'epone. Kenpa'ti Diosa 'uruda huaknopoe' tihuapokhue'dik mo'epone. <sup>12</sup>Nogen daka' tamatiehue' e'ika'nayo o'nenda huatamae' Diosapi' bayokhue' mo'epone.

<sup>13</sup>Botta' huairi toehue'dik mo'ene. Diosyo'da Huairi o'e. Katepi' huakka' e'tamaeta' e'eretpaknayo konig nog huairi huanopoya' toe'dik o'e. Kenpa'ti huakka' huakupe e'tae'ta' e'eretpaknayo konig nog huairi huanopoyoda toe'dik o'e. Dios Huairitayo'da nigpeedik mo'ene. Diostayo'da di' e'dik mo'ene. Huakka'ta'da katepi' huakupepi' e'eretpaknayo Diostaj pakhue'dik mo'ene. Diostaj e'paknayo huakka'da katepi' huakupepi' pakhue'dik mo'ene. Diostaj e'nigpeenayo huakka'da katepi' huakupepi' pakhue'dik mo'ene. —Kenda Jesusa o'manmadika'uyate.

<sup>14</sup>Fariseoa huakka'da huakupeta' on'deretpakika'po Jesustaj on'peedepo Jesustaj on'tierikpo nama'da oa' on'huaa'uyate.

<sup>15</sup>—Opudomey fariseo "Huadakda o'ne," nog aratbuttaj mo'manopoeka'ika'nig'a

Diosanayo opudomeyennopo'taj dakhue' o'ne moknopone. Be'api engaña ogka'po "Huadakda o'ne," aratbuttaj e'manopoea'ta on'eretpakika'. Diosnayo kenda e'ka' dakhue'da o'e o'nopoika'. —Jesúsa o'mana'uyate.

**Moisésenba'taj kenpa'ti konig  
Dios Huairitaj o'noknopopeo  
on'nigpeika'apone Jesúsa  
o'batia'pakpo o'manmadika'uyate.**

<sup>16</sup>—Juan Bautista tiakhued ee'te Moisésba'taj mo'nigpeika'uyate, kenpa'ti Juan Bautista tiakhued ee'te Diosen huamanbatia'pakerin beroba' monmadika'uyate. Juan Bautista e'tiakde'te huadak hua'a konig Dios Huairitaj yanoknopoe' yan'nigpee' kenda on'manbatia'pakonhuahua'po oy huakka'da on'eretpakpo Dios Huairitaj huaboa'da on'nigpeedepo.

<sup>17</sup>Kurud huadariere ida batikhue'dik o'neapo konigti Moisésenba' kenpa'da o'ika'apo. Dikenhue'dik o'eapo. Nogtipi' huadik dikenhue'dik o'eapo. —Jesúsa o'mana'uyate.

**Huatoe'taj kenpa'da enhue' yane'.  
Jesúsa o'manmadika'uyate.  
(Mt. 19.1-12; Mr. 10.1-12)**

<sup>18</sup>—Be'api' huabokerek huatoe kenpa'da e'ennayo kenpa'ti nog ettone'taj e'toepaknayo huakkuru huatoe'taj dakhuea' o'ka'. Kenpa'ti konig e'bakdej o'enok dakhuea' o'ka'. Kenpa' Diosa oa'. Nog huabokereken huatoe e'enonde'te kentaj be'api' e'toepaknayo kenpa' dakhuea' ogka'. Kenpa' Diosa oa'. —Ken Jesúsa o'manmadika'uyate.

**Huabokerek huairitaj  
kenpa'ti pai'da Lázarotaj  
Jesúsa o'manbatia'pakpo  
o'manmadika'uyate.**

<sup>19</sup>—Huabokerek huairi o'uyate. Huakka'da o'matoe'uyate. 'Uruda

yudtaj huakka'teda ekkai' o'taenok o'otika'po aya' huame'noe huakka'tada o'matobapepo konig fiesta o'kika'po 'urua'da o'bape'ika'uyate. <sup>20</sup>Nog huabokerek Lázaro pai'nana o'ika'po huasi'dak huabada o'basetika'po huairien akbogpete o'huadika'po sorokte o'huadika'uyate. <sup>21</sup>Huairia en'bape'te sue'da aypota'suj barakte en'bakotate ken aypota'suj pai'da Lázaro e'bape'ta' o'pakika'uyate. Kenpa'ti Lázarotaj kuhua on'huatiakpo huasi'dak e'settaj on'timinika'uyate. <sup>22</sup>Nogok Lázaro pai'da huae'eri o'buey'uyate. Ken Diosen huata'moneria Lázarotaj on'tohua'po kente Abraham e'huae'yo on'tohua'uyate. Kente 'uruda o'ika'. Huairikon e'bueyde'te on'kubarakka'uyate. <sup>23</sup>Keyo oknopohue' huae'erikudak nokireg e'nika'yo ken huairia pai'da o'nopo'epo kutayo bidteda Abrahamtaj o'tiahuaypo Lázarotaj Abrahameretaj o'batiahuay'uyate. <sup>24</sup>"Do'taj yatinepahui', pag Abraham. Do'te Lázarotaj menigta'mona'. Ke'na huaba'pikunote hue'eyyo yaba'pisotpo do'hued huano'taj kano'pohue'po in ta'akyo pai'da ijnopo'ey." Kenpa' huairikudaka Abrahamtaj o'nokoypo ona'uyate. <sup>25</sup>"Okkahuehue' yae', sion. On i'noepo huakka'nana i'matoe'ika'uyate. Huadaknada i'ika'uyate, Lázaronayo pai'nada o'ika'uyate. Oy iyo doere Lázaro huadakda o'e. Durugda o'ika'. Onnayo pai'nada i'nopo'ene. <sup>26</sup>Kenpa'ti iyo konig kubog o'e. Mente huahue'dik o'e. Iya' opudomeytaj huahue'dik o'ey. Kenpa'ti iyo oro'omeytaj huatiakhue'dik mo'ene." Abraham huairikudaktaj ona'uyate. <sup>27</sup>"Ken do'hued huaojen jakyo Lázarotaj yata'mona'. <sup>28</sup>Do'hued cinco huama'buytaj yamana'tu' Lázarotaj

zana'. Do'hued huama'buy iyo tiakhue' ka'ne'po, iya' pai'da on'nopo'eapo. Konig do nama'da ijikika'mey konigti kahue' ka'ne'po. Lázaroa kamane', pag Abraham." Huairia Abrahamtaj ona'uyate. <sup>29</sup>“O'nen huama'buy kenda Moisésa o'nigmadoya'uyate, Moisésenba' on'ba'toë kenpa'ti Diosen huamanbatia'pakerienba' on'ba'toë. Kan'nigpee'.” Abrahamana ona'uyate. <sup>30</sup>“Ehue', Moisésenba'taj nigpee'ehue' o'neapo, pag Abraham. Be'api' kubarakya' o'noyhuadpo e'huatiakato'nayo do'hued huama'buya yan'nopo'korea'apet.” Huairia ona'uyate. <sup>31</sup>“Moisésenba'taj kenpa'ti huamanbatia'pakeriba'taj e'nigpeeta' pakhue' ee'nayo be'api' kubarakya' e'huatiakato'nayo kentaj kenpa'ti nigpee'ehue' o'neapo.” Abrahamana ona'uyate. —Kenda Jesúsua o'manbatia'pakpo o'manmadika'uyate.

**Keyoj nama'da eka'nayo dakhuea'da o'unhuahuika'apo.**

(Mt. 18.6-7, 21-22; Mr. 9.42)

**17** <sup>1</sup>Jesúsa huanigpeika'eritaj, —Katetapi' e'tiahuayapi' e'hui'rikapi' e'pee'api' konigepo aratbut kirigayo' dakhuea' e'ka'ta' o'babaka'ika'. Ken o'na nogtaj dakhuea' e'batoka'nayo konigepo ontaj Diosa ke'poda castiga megka'apone. <sup>2</sup>Do'hued huanigpeika'eritaj dakhuea' e'batoka'ta' i'pakpopi' dakhuea' batokahued be'api' huidtone' o'nen huahuerenta' yan'tiontidukupo a'ta'kotia'po odda yakoyo e'ennayo kenda sue'da castiga o'e. <sup>3</sup>Keyoj, opudomey, aya'da daka' yan'nopo'epo yan'manika'.

Huaknopoe'eri huama'buyapi' ontaj dakhuea' egka'nayo “Dakhuea'da ogka'ne. Kenpa'da yabatik.” O'nen huama'buytaj ighua'da yaboroay. E'nopo'korea'nayo o'nen huama'buytaj yakkahuea'. <sup>4</sup>Nogme'noetida ontaj

dakhuea' egka'nayo konig sietea'pi' ontaj dakhuea' egka'nayo ontaj “Nama'da ontaj ogka'ne, ijnopo'koreay, onte'ti konigti kahue' o'eapone,” sietea'pi' ena'nayo o'nen huama'buytaj sietea'a' yakkahuea'. Nogok nogok konigti o'nen huama'buya ena'nayo onte'ti yakkahuea'. —Ken Jesúsua huanigpeika'eritaj o'manmadika'po o'mana'uyate.

**Daka' eknopoe'nayo Huairi Jesúsua teyda 'uru'da o'ka'apo.**

<sup>5</sup>—Ontaj sue'da oro' oknopoe'y, nogiti ontaj huaknopoe' bo'tihuapok. —Huairi Jesústaj doce huamata'mona'eria o'nona'uyate.

<sup>6</sup>—Mostaza huakid sigda o'e. Do'taj sue'da eknopoe'nayo mostazakid konig suigda eknopoe' o'e “In hueymey o'dikka' sicómoro yauru, e'pogyo yathua'po yatuk.” Suigda iknopoe'po enapi' Diosa o'ka'apo. —Jesúsa o'mana'uyate.

**Diostaj huaknopoe'eri konig huairien huanaba' daka' nigpeika'dik o'ne.**

<sup>7</sup>—O'nen huanaba' ta'baya' o'baa'popi' campoduyte oveja o'tioka'popi' bisik jakyo e'tiakde'te “Yakud, yabape'.” Ken konig onahue' mo'ika'ne. <sup>8</sup>“Menigmanhuada' do'taj kabape'po kenpa'ti koya' menigtotiak. Do e'bape'de'te a'ti yabapedti' kenpa'ti koya' yamayenti'.” Ken konig mo'mana'ika'ne. <sup>9</sup>Huanaba' e'nigpeika'tada “dakiti” onahue' mo'ika'ne. <sup>10</sup>Konigti opudomey kenoka' aya'da Diosa o'mana'uyate boka'depo, “O'nen huanaba' o'ey, 'Huadaka'da boka'ne.' Kenpa'ti 'Dakiti' oro'taj onahue'dik o'ene. Kenyo'da ka'dik o'epo o'kay.” Diostaj ya'nona'. —Kenda Jesúsua o'manmadika'uyate.

**Diez huabokerek en'si'dakpara'ta Jesúsua o'bayarea'uyate.**

<sup>11</sup>Jerusalényo Jesús o'huae'onhuahua'po Samaria

huadaribayo Galilea huadaribayo  
ondariyonyo' e'ne'te o'hua'epo.

<sup>12</sup>Huakka' jakyo Jesús ekýede'te diez  
huabokerek e'si'dakpara'a sue'da  
bidteda on'nigbopo,

<sup>13</sup>—Oro'omeytaj mo'tinepahui'  
Jesús Huairi. —'Utta'da Jesústaj  
o'onokoy'uyate.

<sup>14</sup>Jesúsa o'batiahuaydepo,  
—Yanhuati'. Judío sacerdotetaj  
yanhuahuati'. Sacerdotea  
bo'tiahuaye'. —Jesúsa diez huabokerek  
e'si'dakpara'taj o'mana'uyate.

En'bahuade'te Diosa  
o'bayaread'uyate. <sup>15</sup>Kenoka' nogtiada  
ijyareay huaboa'da o'nopoedepo  
o'kumejpo, "Diosa 'urua'da o'kika'.  
Huadaknanada o'e Dios. Dakiti Dios."  
'Utta'da o'okoypo, <sup>16</sup>Jesústaj huikudate  
o'tihuadpo "Dakiti Jesús Huairi."  
Ona'uyate. Ke'na Samaria huadaribayo  
huae'eri o'uyate.

<sup>17</sup>—Dieztaj ijbayarea'nig, ¿Nog  
nueve meyon ya'ne? <sup>18</sup>In nogbayo  
huae'eriyoda "dakiti Dios" aa'ya'po  
o'kumej. Ka'tia'po nogda nueve  
kumejhue' ya'ne. —Jesúsa oa'uyate.

<sup>19</sup>—Ya'upakpo yabodpo yahuati'.  
Do'taj oknopoenok konigepo  
o'yareaddene. —Jesúsa ona'uyate.

**¿Dios Huairi o'tiakpo monig  
ya'epo?**

(Mt. 24.23-28, 36-41)

<sup>20</sup>—¿Menoka' Dios Huairi yatiakapet?  
—Fariseo aratbuta Jesústaj o'nona'nok,

—Dios Huairitaj huadak  
hua'a moknopoiika'nig kenpa'ti  
mo'nigpeika'nig tiahuayhue'dik mo'ene.

<sup>21</sup>Oy opudomey sue'ada Dios Huairitaj  
moknopodenok e'nigpeedepi' "In  
o'e." "An o'e." Be'api' ahue'dik o'neapo.  
—Jesúsa o'mana'uyate.

<sup>22</sup>Ke'nen huanigpeika'eritaj,  
—Do huabokerek ijenok Diosa  
me'ta'mona'uyne, nogok do'taj

e'tiahuayta' bo'pakaponig'a. Nogtida  
huame'noeyo'dapi' do'taj e'tiahuayta'  
bo'pakaponig'a kenoka' do'taj  
tiahuayhue'dik o'neapone. Aratbutere  
ehue' ijjeapoy. <sup>23</sup>'Ayo o'e.' 'Keyo o'e.'  
Yan'batia'pakapetnig'a. Kenomeytaj  
manpeehue' yane'. Do'taj a'ukya'po  
huahue' yane'. <sup>24</sup>Nogok do e'tiakte  
aya' huadariya' nogdari nogdariya'  
do'taj bo'tiahuayapone. Konig o'jbed  
o'ika' kurudya' huabada jeyda o'enok  
aya' huadariya' do'taj tiahuaydik  
o'neapo. <sup>25</sup>Huakkurunayo pa'da  
huakka' ijnopo'epoy. Kenpa'ti huakka'  
aratbuta oy do'taj eknopoe'ta' pakhue'  
me'neapone. <sup>26,27</sup>Do huabokerek ijenok  
Diosa me'ta'mona'uyne. Nogoka' do  
kurudya' e'tiakte aratbut on'bape'ika'apo  
vinopi' on'mamay'ika'apo kenpa'ti  
on'toepakika'apo. Konigepo do'taj  
ekpoe' ngehue' o'neapo. A'nennada  
Noékudak ee'te konigti ogkika'uyate.  
Diostaj pakhue'da o'nepo, on'bape'ika'po,  
on'mamay'ika'po, on'toepakika'po. Noé  
huaboro' kusi'petone'yo en'bakudde'te  
aratbut kenda egkika'te huekurua  
o'huepokdepo aya'da on'mabuey'uyate.  
<sup>28</sup>Konigti a'nennada Lotkudak  
e'huae'oka' aratbut Diostaj pakhue'  
o'nepo on'bapika'po on'mamay'ika'po  
kenpa'ti huakupete on'bae'ika'po  
on'bahuaya'ika'po, kenpa'ti ta'bayo  
on'batuke'ika'po kenpa'ti jak ogkika'po.  
<sup>29</sup>Kenda aratbut ogkika'uyne'ya Lot  
Sodoma huakka' jakya' en'makorokde'te  
Diosa castiga o'magka'po konig  
ta'akoniga kurudya' e'hui'a aya'tada  
o'mahui'uyate. Kenpa'ti azufre konig  
huidjeyada kurudya' o'batikahuapo  
aya'tada o'barakuyate. <sup>30</sup>Do huabokerek  
ijjenok Diosa me'ta'mona'uyate, do  
onte'ti kurudya' e'tiakte konigti aratbut  
ogkika'po, do'taj ekpoe' ngehue'  
o'nika'apo.

<sup>31</sup>Katepi' e'matoe'ta' me'pukehue'  
yanikati'. Do kurudya' e'tiakte

jakkurute opud ee'nayo katepi' jakyo e'tamae'nayo a'baetuya'po jakyo kudhue' yaneti'. Kenpa'ti do e'tiakte ta'bayo opud ee'nayo jakyo katepi' a'baetuya'po huahue' yane'. Konigepo do'taj daka' ekpoe' nige'dik mo'eaponok. <sup>32</sup>Loten huatoe'taj okkahuehue' yane'. Ettone'a katepi' do'hued jakyo me'tamaene o'nopoepo ta'nia' o'mabo'udpo konigepo kenteda o'buey'uyate. <sup>33</sup>Opudomey kenpa'da huata'da bo'pakpo doere kurudyo onte'ti noeonhuahuikahue'dik mo'eapone. Opudomey kenpa'da huata' pakhue' mo'ika'po Diostaj e'nigpeeta' huakka' bo'pakika'po onte'ti Diosere mo'noeonhuahuika'apone.

<sup>34</sup>Ken nogok do e'tiakte sikyopi' botta' jogkutopayoyo' en'tayte nogtiada do'taj ekpoe' o'nigenok Diosen huata'moneria o'tohua'apo. Nogtaj tohuahue' o'eapo. <sup>35</sup>Konigti botta' ettone' aros on'tugpo nogtatida Diosen huata'moneria o'tohua'apo nogtaj tohuahue' o'eapo. <sup>36</sup>Konigti ta'bayo botta' huabokerek o'nepo. Diosen huata'moneria nogtatida o'tohua'apo nogtaj tohuahue' o'eapo, ijjay. —Ken Jesúsa huanigpeika'eritaj o'mana'uyate.

<sup>37</sup>Huanigpeika'eri kenda on'peedeipo, —¿Kenda ia'nig meya' ya'eapet? —Huanigpeika'eria Jesústaj o'nona'uyate.

—Kente e'bueyen huaso' o'huednok, kente huakka' matuk on'tiakapo. Ken konig e'ne'te dakhuea' huaka'eri'taj Diosen huata'mona'eriomeya castiga o'magka'apo. —Jesúsa o'mana'uyate.

**Juez yamanoeya' huamana'eri o'epo yamanoeya' huamana'eritaj kenpa'ti 'ayhuataj Jesúsa o'manbatia'pakpo o'manmadika'uyate.**

**18** <sup>1</sup>Kirigayo' yan'tiona'pakika'po batikhue' yanika'. Jesúsa o'manbatia'pakpo o'manmadika'uyate.

<sup>2</sup>—A'nenda huakka' jakyo juez yamanoeya' huamana'eri o'epo, Diostapi' me'pukhue' o'epo kenpa'ti aratbuttaj manpee hue'da o'ika'uyate.

<sup>3</sup>Ken huakka' jakyo 'ayhuakon o'epo yamanoeya' huamana'erite o'huahua'ika'po, “Noga dakhuea' menogkame'ne mentihuapok, huairi.” 'Ayhua ona'ika'po nogok nogok kirigayo' konigti ona'ika'uyate. <sup>4</sup>Keje' keje' yamanoeya' manahue' ijjeapoy nogok nogok yamanoeya' huamana'eria e'no'poe'ada nogok “Diostaj okme'pukhue' ijje kenpa'ti aratbuttaj pee hue' ijikay. <sup>5</sup>In 'ayhua kiriga'da be'huatiakika'nok kentaj ijtipeonapoy. Onpeunhue' ee'nayo do'taj kirigayo' be'huatiakika'nok do'hua huadiaydik ijjeapoy.” Huanopoda o'tinopoe'uy. —Kenda kirigayo' yan'tiona'pakika'po batikhue' yanika', Jesúsa o'manbatia'pakpo o'manmadika'uyate:

<sup>6</sup>Onte'ti Jesús Huairia o'mana'po, —Kenda dakhue'a yamanoeya' huamana'eri huanopoya' o'tinopoe'uyate. Yan'no'poe'. <sup>7,8</sup>“Be'tihuapak, Dios.” “Be'tihuapak, Dios.” “Taka' dakhuea' megka'ne, Dios.” Diosen huabaktie'ea'eria Diostaj huame'noe kenpa'ti sikyo e'tiona'pakika'te Diosa idada o'batihuapokapo, Do huabokerek ijjenok Diosa me'ta'mona'uyne. Kurudya' ijhuarakapoy. ¿Huabaktie'ea'eritaj a'batiokaya'po e'tiakde'te meniga' do'taj yanoknopoe'apet? —Kenda Jesúsa o'manbatia'pakpo o'manmadika'uyate.

**Fariseo huag'eritaj kenpa'ti gobiernoen huakupe huabae'eritaj Jesúsa o'manbatia'pakpo o'manmadika'uyate.**

<sup>9</sup>“Huadakda ijje. Huadakda ijikay.” “Nogomeynayo dakhue'da o'nepo dakhuea' ogkika'.” Sue'ada



nama'da on'matinopoika'nigtaj Jesúsa o'manbatia'pakpo o'manmadika'uyate.

<sup>10</sup>—Diosen jakyo a'tiona'pakya'po botta' huabokerek on'hua'uyate. Nogtida fariseo huae'eri o'epo nogda gobiernoen huakupe huatabae'eri o'uyate. <sup>11</sup>Huakkuru fariseo huae'eria o'bopo, o'tiona'pakpo, "Konig nog aratbut dakhuea' huaka'eri o'nika'nig konig donayo ehue' ijje. Huadakda ijje, Dios. Konigepo dakiti ijje. Huabereeri konig ehue' ijje. Dakhuea' huaka'eri konig ehue' ijje. Nogen huatoe'taj huabakdejeri konig ehue' ijje. Kenpa'ti in gobiernoen huakupe huabae'eri konig ehue' ijje. <sup>12</sup>Nogsemanatida ee'te Diostaj iknopoepo botta'a' huame'noete bapehue' ijikay. Kenpa'ti huakupepi' ayopoi' katapi' ijbae'dey. Diostaj sue'da ijyokikay." Ken fariseo huae'eria o'bopo Diostaj o'tiona'pak'uyatenig'a. <sup>13</sup>Gobiernoen huakupe huatabae'erinayo Diosen jakte sue'da bidte o'bopo dakhuea' huaka'eri ijje o'nopoepo kurudyo mabohue'da o'epo o'tiona'pakpo, kenpa'ti konig pai'da o'epo huata' o'kagkatuktukpo o'tiona'pakpo, "Do'taj me'tinepahui', dahuea' huaka'eri ijje, Dios." O'tiona'pakuyate. <sup>14</sup>Gobiernoen huakupe huatabae'eri ke'nen jakyo e'kumejde'te Diosa okkahuea'depo huadaknopoda o'ean'uyate. Fariseo huae'eritaj okkahueahue' o'uyate. "Huadakda ijje. Huairi ijje." Aya'da kenda huanopo'e'eritaj "Do'tehuapa' dakhue'da mo'ene." Diosa o'mana'apo. "Huairi ehue' ijje. Huadakda ehue' ijje." Aya'da kenda, huanopo'e'eritaj "Huadakda mo'ene." Diosa o'mana'apo. —Kenda Jesúsa o'manbatia'pakpo o'manmadika'uyate.

**Jesúsa huasi'potaj huadakda Diosa kamagke'po o'batibata'te'e'uyate.**

(Mt. 19.13-15; Mr. 10.13-16)

<sup>15</sup>Nogok huasi'potaj Jesústaj on'batohua'uyate. Jesúsa

kabatiba'ta'te'e'po on'batohua'uyate. "Keje' batohuahue' yane'."

Huanigpeika'eria en'mana'tada <sup>16</sup>"Men'huatiake," Jesúsa o'mana'po, "Huasi'po do'te en'huatiakte, kaeya' manahue' yane'. Konigepo konig inomey 'urunopoda huasi'po o'ne konigti aratbut huaknopoe'eri Dios Huairitaj on'nigpeika'po Diosensi'po o'ne. <sup>17</sup>Huasi'po do'taj 'urunopoda me'noknopoe'po men'nigpeika'ne. Konig huasi'po Dios Huairitaj o'noknopoenig konigti opud oknopoe'hue' ee'nayo Dios Huairiensi'po ehue'dik mo'eapone. Buttida ijje." Jesúsa o'mana'uyate.

**Huairia Jesúserere on'batia'pakuyate.**

(Mt. 19.16-30; Mr. 10.17-31)

<sup>18</sup>—iKurudyo Diosere a'noeonhuahuikaya'po kate kika'dik ijje, huadak huamanmadika'eri? —Nogtia'da judío huairia Jesústaj ona'uyate.

<sup>19</sup>—Ka'tia'po huadakda i'e ona'. Diosyo'da huadakda o'e. <sup>20</sup>Nogen huatoe'taj bakdejhue' yane'. Nog aratbuttaj e'huadiayte arakhue' yan'maika'. Nogen bakberehue' yanika'. Nog aratbuttaj dakhuea'da bahuaahue' yanika'. Huaotaj huayetaere yanigpeika'po daka' yan'matoika'po yan'bayokika'. Ken Diosen e'mana' yanopoe'. —Jesúsa ona'uyate.

<sup>21</sup>—Do huasi'poedada kenda aya'da ijnigpeika'uy. —Jesústaj ona'nok.

<sup>22</sup>Jesúsa o'pe'edepo, —Nogitied ka'diken i'ene. Aya'da katapi' i'matoenig huakupete yabahuaya'. Ken huakupe yabaedepo pai'da aratbuttaj yabayoke'. Kenda on eka'nayo kurudyo Diosere huakka'da i'matoenhuahuika'apone, do'taj behuatiakpo do'tayo'da menigpeonhuahuika'. —Jesúsa ona'uyate.

<sup>23</sup>Kenda huairi o'pe'edepo huakka'nanada o'matoepo huaboa'da

suhue'nanada o'uyate. <sup>24</sup>Suhue'nada o'ēnok Jesúsa o'tiahuaydepo,

—Huairi ke'nenda huakka' e'matoe'ta' e'eretpaknayo Diostaj oknopoehue'dik o'neapo Diosensi'po ehue'dikda o'ne.

<sup>25</sup>Konig camello huaboro' uhua sakpi'peyo kudhue'dik o'e. Konigti huairi huakka'da e'matoe'nayo Diosensi'po ehue'dikda o'neapo.

—Jesúsa ona'uyate.

<sup>26</sup>—¿Be'a manopo'yarea'dik ya'ne? ¿Be'a Diosere noeonhuahuika'dik ya'ne? —Nogomeya Jesústaj on'peedeipo o'nona'uynok,

<sup>27</sup>—Huabokerek huata'da nopo'yareahue'dik o'ne. Huata'da on'pakpo noeonhuahuikahue'dik o'neapo. Diosayo'da nopo'yarea'dik o'mae kenpa'ti onte'ti noeonhuahuika'dik o'mae. Diosayo'da aya'da ka'dik o'e. —Jesúsa o'mana'uyate.

<sup>28</sup>—Oro'omeynayo aya'da o'matoe'ika'nig o'maenon'uy. Ontaj ata'huaya'po aya'da o'maenondemey, huairi. —Pedroa Jesústaj ona'uyate.

<sup>29</sup>—Aya'da ke'nen jakpi', ke'nen huaojpi', ke'nen huayepi', ke'nen huama'buypi', ke'nen huidpopi', ke'nen huatoepi', ke'nen huasi'popi' Dios Huairitaj a'nigpeeya'po e'maenon'nayo indariyo <sup>30</sup>durugda on'noeonhuahuika'apo huakka'da nogda on'matoe'epo kenpa'ti onte'ti Diosere on'noeonhuahuika'apo.

—Jesúsa o'mana'uyate.

**Nog aratbuta do'taj me'darakapone. Jesúsa onte'ti o'batia'pakuyate.**

(Mt. 20.17-19; Mr. 10.32-34)

<sup>31</sup>Doce huamata'mona'eritaj Jesúsa meyohue'da o'batohua'depo,

—Oy Jerusalényo o'hua'deapone. Do huabokerek ijjenok Diosa me'ta'mona'uyne. A'nenda Diosen huamanbatia'pakeria do'taj kenda

men'timadoya'uyatenig huabokereka do'taj me'nogka'apone. <sup>32</sup>Nog aratbuttada menyokapone. Do'taj nog aratbuta men'tierikapone, dakhuea'da men'tidi'keapone, do'taj mentisupu'eapone, <sup>33</sup>pidetbi'a kenpa'ti men'bitbitapone, me'darakapone, botta'a' kubarakyo eksikonde'te kubarakya' Diosa me'noyhuada'apone. —Jesúsa doce huanigpe'ika'eritaj o'mana'uyate.

<sup>34</sup>Doce huanigpe'ika'erinayo nopenkahue' o'nyuyate. Kenda Jesúsa e'mana'tada nopenkahue' o'nepo konig e'ireg o'ēnok nopenkahue' o'ne'uyate.

**Jericó huakka' jak huag'eri ekpobigtaj Jesúsa okpoyarea'uyate.**

(Mt. 20.29-34; Mr. 10.46-52)

<sup>35</sup>Huakka' jak Jericóyo Jesúsa e'tikayopakte dagte huabokerek o'huadpo ekpobig o'epo huakupepi' aypopi' men'yok oa'ika'. <sup>36</sup>Huakka'da aratbut on'poknok ekpobiga o'peedeipo, “¿Katete mo'e?” o'mana'uyate. <sup>37</sup>“Jesús Nazareteri o'pok.” O'nona'uyate.

<sup>38</sup>—Metinepahui, Jesús. Daviden adhuea' huayayo i'ene. —O'okoy'uyate.

<sup>39</sup>“Yabatik, soata' yae.” Huakkuru aratbuta Jesúsere huahua'eria e'nona'tada onte'ti onte'ti o'okoypo, —Metinepahui, Jesús. Daviden adhuea' huayayo i'ene. —O'okoy'uyate.

<sup>40</sup>Jesús ehuada o'boato'po, “Men'ngtotiak,” huanigpe'ika'eritaj o'mana'uyate. O'tikayopakonyakdenok,

<sup>41</sup>—¿Katetaj i'pak? —Jesúsa ona'uyate.

—Ekpoyarea'ta' ijpaki, huairi. —Ekpobiga ona'uyate.

<sup>42</sup>—Yatiahuay'. Do'taj oknopoēnok okpoyareaddene. —Jesúsa ekpobigtaj ona'uyate.

<sup>43</sup>Jesúsa kenpa' eade'te huaboa'da ekpobig tiahuaydik o'edeipo, Jesústaj

o'tahua'po "Dios kurudyo 'uruda o'ika'po huadaknanada o'kika," o'batia'paknok, aya'ada Jesústaj on'tahua'po on'tiahuaypo on'peepo kenpa'ti "Dios kurudyo 'uruda o'ika'po huadaknanada o'kika," on'batia'pakuyate.

**Jesúsa Zaqueotaj o'nopo'yarea'uyate.**

**19** <sup>1</sup>Ken, Jericó huakka' jakyo Jesús o'kudonpo o'huae'po dagte o'huae'uyate. <sup>2</sup>Ayo huairi o'epo o'dikka' Zaqueo. Ke'na gobierno huakupe huabae'eri huairi o'uyate. <sup>3</sup>Jesústaj e'tiahuayta' e'pakada huakka'ada Jesústaj on'tikupopakika'nok ke'na jontojyo'da o'epo tiahuayhue'dik o'epo, <sup>4</sup>Konigepo huakkuruyon o'ketonhua'po kente Jesús o'pokapo o'nopoepo hueymeyyo sicómoroyo o'behuikato'po Jesústaj a'tiahuaya'po hueymeyyo o'behuikato'uyate. <sup>5</sup>Ken hueymeyte Jesús o'pokpo kutayo o'maboatopo, —Ida yahuarak, Zaqueo. Oy o'nen jakyo tahuade'dik ijjeý. —Jesúsa ona'uyate.

<sup>6</sup>Konigepo Zaqueo o'huarakonpo ida o'huarakpo durugda o'toepo ke'nen jakyo Jesústaj o'tohua'uyate. <sup>7</sup>Huakka'da aratbuta Jesústaj Zaqueoere e'hua'te on'tiahuaydepo, "Dakhuea' huaka'erien jakyo o'hua'depo keyo o'tay'apo," dakhuea' onpapayo' on'huaa'uyate. <sup>8</sup>Ken Zaqueo hua'ite o'bodpo,

—Eya', Huairi, huakka'da do ijmatoenig ijposakapoy paí'da aratbut huae'eritaj ijbayoke'apoy. Paí'da aratbuttaj huakka'da ijbayoke'apoy. Aratbuttaj engaña e'magkikame'nayo kenomeyen huakupe botta' botta' ijbatahua'apoy. —Zaqueo Jesús Huairitaj ona'uyate.

<sup>9,10</sup>—Do huabokerek ijjeýo Abrahamen adhuea' huayayo judfo

dakhuea' huakka'eritaj a'ukya'po a'bakkahueaya'po a'manopo'yareaya'po ijtiakpo Abrahamen adhuea' huayayo i'nenok, Zaqueo, ontaj o'nen huabettakon dakhuea' o'bakkahuea'po o'manopo'yarea'ne. Diosere mo'noeonhuahuika'apone. —Jesúsa ona'uyate.

**Diez huakupetaj Jesúsa o'manbatia'pakpo o'manmadika'uyate.**

<sup>11</sup>Jesús Jerusalényo o'hua'po meyhue'da o'nenok a'ti Dios Huairitaj o'huahuayapoy aratbut on'nopo'nenok huakka'da e'peede'te Jesúsa o'manbatia'pakpo,

<sup>12</sup>—'Uruda huabokerek o'epo, huadakda ke'nen huabet o'nepo ke'na nogbayo o'hua'uyate. "O'nenbayo gobierno huairi i'e." Nogbayo huae'eri huairi kayahue'po o'hua'uyate. Nogok gobierno huairi o'edepo o'kumejapo. <sup>13</sup>Ke'na 'uruda huabokerek huahued diez huanaba'taj o'magkupopaka'depo nogtitaj nogtitaj nogtida huakupe huakka'teda ee' konig oro huakupetone' o'baktoyoke'uyate. "Ijhue'da ijjeonhuahuika'depo ijtiakapoy. Do ayoda huakka'a'da e'unhuahua'te in huakupete yudtapi' yan'bae'ikati' kenpa'ti yan'bahuayika' huakupe gana yag'kikati'." O'mana'uyate. Diez huanaba'taj o'mana'uyate. Kenpa' o'mana'depo nogbayo o'hua'uyate. <sup>14</sup>Ke'nenbayo huae'erinayo ken huairitaj on'huadiaypo sue'tada aratbut on'mata'mona'po 'uruda huabokerektaj ta'pote on'mata'mona'po, "In huabokerektaj konig oro'omeyen huairi e'taeta' pakhue' o'ey." Nogbayo huae'eri huairitaj yan'mana'. Ke'nenbayo huae'eriomeya on'mana'uyatenig'a. <sup>15</sup>Ken nogbayo 'uruda huabokerek ee'te "Gobierno huairi i'ene." E'nonade'te o'kume'uyate.

Ke'nenbayo o'kumejdepoy kenomeytaj huakupe a'nenda e'baktoyo'ke'me'taj "yan'tiak," o'mana'uyate. Konig ke'nen huakupe yudtaj on'baepo kenpa'ti on'bahuaya'po meniga' gana yagka'met e'nopoeta' o'pakuyate. Nogtiaj nogtiaj meniga' gana yagka'met e'nopoeta' o'pakuyate. <sup>16</sup>Ken huakkurueria huanaba'a huairitaj o'huahua'depo, "O'nen huakupe oktoyokuyinog nog diez gana ijka'demey, huairi." Kenda huakkurueria huanaba'a ona'uyate. <sup>17</sup>"Huadakda i'kame'te. Huadakda huanaba' o'taene. Konigepo sue'da do'hued e'nigtoeunhuahua'te daka' o'nigtoeunhuahuame'nok diez huakka' jaktaj gobierno huairi i'epo." Huairia ona'uyate, huakkurueria huanaba'taj ona'uyate. <sup>18</sup>Nog huanaba'a huairitaj o'huahua'depo, "O'nen huakupe oktoyokuyinog nog cinco huakupe gana ijka'demey, huairi." Ken huanaba'a ona'uy. <sup>19</sup>"Cinco huakka' jaktaj gobierno huairi i'epo." Huairia ona'uyate. <sup>20</sup>Ken noga huanaba' gobierno huairitaj o'huahua'depo, "In o'nen huakupe pañuelote ijtoeunhuahua'mey, huairi. <sup>21</sup>Huakupe gana eka'nayo o'na bektiparatapetpi' ijnopopepo ijme'pukpo. Kenpa'ti aya'da o'nen huanaba' gana on'ka' ken aya'tada i'baktiparatika'. Kenpa'ti ta'ba nogomey on'batuke'uyate. Ken katetehue' i'bakbae'ika'ne." Ken huanaba'a ona'uyate. <sup>22</sup>"On huanaba' dakhuea'da i'ene. Kenda huaboada ona'ne o'peedene dakhue'ada i'ene ijnopopey. Do'hua o'noktiparatika'ne kenpa'ti do batukehue'da nogen ta'baya' katetehue' o'nokbae'ika'ne o'na e'nopome'nayo <sup>23</sup>mena'po do'hued huakupe bancoyo kudahue' i'eme'te. Huakupe bancoyo e'unhuahua'nayo nog huakupe huakka' itakdik o'ikay'nig'a. Do'hued huakupe bancoyo a'nenda e'kudame'nayo do e'tiakte

do'hued huakupe do'taj yokdik o'epo kenpa'ti nogiti huakupe do'taj yokdik me'neaynig'a." Huairia ona'uyate. <sup>24</sup>Nogomey kentaj meyhue'da o'bonigtaj "Ken huakupe o'toenig yanoktiparatpo, ken diez o'toenigtaj yan'yokti." Huairia o'mana'uyate. <sup>25</sup>"Mena'po ia', huairi, diez huakupe o'tae." Kenomey huairitaj o'nona'uyate. <sup>26</sup>"Konigepo aya' huag'eria huairien sue'da huakka'mon on'nigtoepo huairitaj daka' e'nigtoenayo daka' huairitaj nogda e'nigitaka'nayo kenomeyen huairia o'pakpo nogdakon o'bayokeapo. Nogomey huairien sue'da on'nigtoepo huairitaj daka' nigtoehue' ee'nayo kenpa'ti huairitaj nogda nigitakahue' ee'nayo kenomeyen huairi kenda sue'da e'huatoetaj o'baktiparatapo. Kenpa'ti konig Diostaj sue'da huakka'mon moknopopepo, Diostaj 'uruada e'nigpee'nayo nog aratbuttaj huadakda e'tihuapoknayo nogiti Diostaj moknopopepo. Sue'da Diostaj moknopopepo, Diostaj sue'da e'nigpee'nayo aratbuttaj sue'da e'tihuapoknayo kenda moknope'nig'a bokkahueapo, ijjay. <sup>27</sup>Inomey aratbut do'huedbayo huag'eri do'taj menhuadiaypo do konig kenomeyen gobierno huairita' pakhue' o'nenig'a, yan'totiakpo yan'darak. Iyo do'hua e'tiahuayte yan'darak." Huairia ke'nen huanaba'taj o'mana'uyate. —Kenda Jesusa o'mana'uyate.

#### Jerusalényo Jesús o'kuduyate.

(Mt. 21.1-11; Mr. 11.1-11; Jn. 12.12-19)

<sup>28</sup>Kenda e'manade'te Jerusalényo Jesúsua onte'ti o'hua'po. <sup>29</sup>Ken o'hua'po huakka' jak Betfagé kenpa'ti huakka' jak Betania meyhue'da ee'te kenpa'ti ote' huadik on'dikkika' Olivos meyhue'da ee'te botta' huanigpeika'eritaj o'mana'po, <sup>30</sup>—Keyon huakka' jakyo meyhue'da ee'te yanhuati'.

Bo'kudonde'po burro 'uhua e'tinuku' bo'huahuayapone. Huabo burrote bepi' huadhued o'ne. Yan'tikujpo yan'totiakti'. <sup>31</sup>“¿Mena'po bo'tikuj?” Be'api' ena'nayo, “Huairia o'paknok o'kay.” Yā'nona'ti'. —Botta' huanigpeika'eritaj Jesúsa o'mana'uyate.

<sup>32</sup>Ken botta' huanigpeika'eri on'hua'po, kenda Jesúsa o'mana'nig konigti on'huahuaypo burrotaj on'huahuay'uyate. <sup>33</sup>Burrotaj huabo'a' e'tikujte burro huatoe'eria on'mana'po, —¿Burrotaj mena'po bo'tikuj? —On'mana'uyate.

<sup>34</sup>—Huairi o'paknok o'kay. —Huanigpeika'eria on'mana'uyate.

<sup>35</sup>Ken Jesúste on'tohua'po, ekyede'te huanigpeika'eriomey kenomeyen yudta'a burrota'pite on'hueda'depo Jesús burrota'pite o'huadde'uyate. <sup>36</sup>Jesús burrote o'hua'depo aratbut keyo'ti o'nepo dagte huakkuruyon huaok on'bahueda'po, kente Jesús o'pokapo on'nopepo huaok on'bahueda'uyate.

<sup>37</sup>Olivos ote'yo o'nepo huaduk on'tikayo'pakpo Jerusalén meyhue'da keyo on'tibehuikepo. Huakka'da huanigpeika'eriomeya on'durugpakpo “Uruda Dios o'e.” “Huadakda Diosa o'kika'. Huakka'tada Diosa o'bayareadde o'tiahuaymey. 'Urua'da Diosa o'kika'.” 'Utta'da o'nokoy'uyate.

<sup>38</sup>—In Gobierno Huairi o'tiakde Dios Huairia o'pakpo o'ta'mona'uyate. Dios Huairia daka' katoe'. Kurudya' kentaj on'durugpak. Dios 'uruda o'e. —Huakka'da aratbut ogkupopakpo o'nona'uyate.

<sup>39</sup>Huakka'da aratbut ogkupopakpo huakka'da aratbutere sue'da fariseo keyo'ti o'nepo,

—“Soata' yane'.” O'nen huanigpeika'eritaj yamana'. —Fariseo Jesústaj o'nona'uyunig'a.

<sup>40</sup>—Do'hued huanigpeika'eria 'utta' okoyhue' ee'nayo soata' e'ne'nayo

huidapi' o'dokoyapo. —Jesúsa o'mana'uyate.

<sup>41</sup>Jerusalényo meyhue'da o'edepo Jerusalén huakka' jaktaj o'tiahuaypo Jesúsa Jerusalén aratbuttaj o'matinepahui'po o'batohuikuyate.

<sup>42</sup>O'mana'po,

—Opudomeytaj Diosa kamanopo'noeyepo kate ka'dik mo'e oy opudomey e'manopenka'ta' huakka'da on'tipaknig'a oy konig e'ireg o'enok suigpi' nopenkahue' mo'ene. <sup>43</sup>Dios Huairitaj okiehue' mo'enok nogok opudomeytaj dakhue'nanada o'eapo. Opudomeytaj taka' on'huatiakdeapo. Huakka' jak kurute ke'na huaktioke' huakbirik taka'a o'nokbirikpo on'tiokkudejeapo nogyen nogyen bo'huatiakpo bo'batiarakapone.

<sup>44</sup>Opudomenen jak sorokte mokmaena'apone. Opudomey huakka' jak aratbuttaj bo'batiarakapone. Aya'da jak huidtaj barakte on'maenapo. Kenoka' Diosen Huasi'po a'manopo'noeyaya'po o'tiakme' opudomey oknopoehue' mo'eme'nok. —Jerusalényo huae'eriomeytaj Jesúsa o'mana'uyate.

**Diosen jakya' huabahuaya'eritaj o'maen'uyate.**

(Mt. 21.12-17;

Mt. 11.15-19; Jn. 2.13-22)

<sup>45</sup>Ken Diosen jakyo Jesús o'kudonpo huabahuaya'eriomeytaj huabo'a'da o'makmaena'po huabae'eriomeytakon o'makmaena'uyate.

<sup>46</sup>—“In do'hued jak o'e. A'tiona'pakya'po aratbut iyoda on'kudika'. Konig huabereerien jak opudomeya mo'toene.” Apagba'a kenpa' oa'. —Jesúsa huabahuaya'eritaj o'mana'uyate.

<sup>47</sup>Diosen jakyo Jesúsa o'manmadika'ika'po aya'me'noeda o'manmadika'ika'uyate.

Sacerdote huairi, Moisésenba' huamanmadika'eriere, nog huakka' jak huairiere Jesústaj on'huadiaypo e'arakta' on'tipakpo monig arakdik o'eapo on'nopoepo o'duknig'a. <sup>48</sup>Aya'ada aratbut on'peonhua'po Jesústaj on'pakpo daka' on'peonhuahua'uyatenok Jesústaj konig arakdik nopoenkahue' o'nyuate.

**“Yabayareati'. ¿Be'a menuy?”**  
**Jesústaj judío huairia o'nona'uyate.**  
*(Mt. 21.23-27; Mr. 11.27-33)*

**20** <sup>1</sup>Nogok nog huame'noete Diosen jakyo konig Dios aratbuttaj o'manopo'yarika'nig kenda Jesús a e'manmadika'te Jesústaj sacerdote huairia on'huatiakpo, Moisésenba' huamanmadika'eria on'huatiakpo, huatone' huairiere a on'huatiakuyate.

<sup>2</sup>—“Yamanmadika'. Yabayarea'.” ¿Be'a menuy? —Judío huairiomeya Jesústaj o'nona'uyate.

<sup>3,4</sup>—Huakkuru do'taj me'nakonen. Bautiza yamagkadhuati'. ¿Be'a Juantaj yanuyate, huabokereka Diosapi'? ¿Mempa' Juan onda ya'pakpo bautiza yamagkika'uyate? —Jesús a o'mana'uyate.

<sup>5</sup>Huayahuaya onpayo' judío huairiomey on'batia'pakpo, —¿Jesústaj katia' ona'apet? Diosa Juantaj o'ta'mona'uyate. Oro'omeya Jesústaj ena'nayo “¿Juantaj mena'po oknopoehue' mo'e'uy? ¿Mena'po nigpeehue' mo'e'uy?” Jesús a mona'apone oro'omeytaj. <sup>6</sup>“Juantaj Diosa ta'monahue' o'e'uy.” Jesústaj ena'nayo aratbut oro'omeytaj huida bo'pa'ea'apone. Bo'pa'ea'po oro'omeytaj bo'arakapone. Kenda Juan Diosen huamanbatia'pakeri o'uyate. Aya'ada aratbut o'noknopoenok. —Ken konig judío huairia on'batia'pakpo konig huayahuaya on'batia'pakuyate.

<sup>7</sup>—Bautiza kama'gke'po be'a Juantaj ya'ta'mona'uyet nopoehue' o'e'y. —Jesústaj huairiomeya o'nona'uy.

<sup>8</sup>—Do kenpa'ti, “Yamanmadika'. Yabayarea'.” Ke'na do'taj mena'uyne, kenda onahue' o'neapone. —Jesús a o'mana'uyate.

**Huairien ta'ba huatatoe'eria dakhuea'da on'magka'uyate.**  
**Kenda Jesús a o'manbatia'pakpo o'manmadika'uyate.**  
*(Mt. 21.33-44; Mr. 12.1-11)*

<sup>9</sup>Nogok huakka'da aratbuttaj Jesús a onte'ti o'manbatia'pakpo o'manmadika'po,

—Huabokerek o'epo, ta'ba huatoe'eri o'epo uva o'batuke'uyate. Kenoka' uva ta'ba huatatoe'eritaj o'baktoyokdepo nogbayo adteda o'bakhua'uyate. Nogbayo ijhue'da o'e'uyate. <sup>10</sup>Nogok uva huada o'boyogdenok huanaba'taj o'ta'mona'po ta'bayo o'ta'mona'po ta'ba mentatoenigtaj, “Sue'da uva huada boyok.” Yamana'. Ken huanaba' o'hua'uyate. Ta'bayo o'tiakdepo “Sue'da uva huada boyok,” e'mana'tada huatatoe'eria nigpeehue' o'nepo huanaba'taj on'tuktukpo uva huada yokhue'ada on'ta'mona'uyate. <sup>11</sup>Ken ta'ba huatoe'eria nog huanaba'takon o'ta'mona'uyate. Kentakon on'tidi'ke'po on'bitbitdepo uva huada yokhue'ada on'ta'mona'uyate. <sup>12</sup>Ta'ba huatoe'eria nog huanaba' o'ta'mona'uyate. Ta'ba huatatoe'eria kentaj dighuea' siroa on'tuka'po tabaya' on'en'uyate.

<sup>13</sup>Kenoka' “¿Kate ijka'apo?” Ta'ba huatoe'eria o'nopoepo, “Do'hued huasi'po huadi'nanada ijta'mona'apoy. Kentanayopi' on'tiahuaydepo dakhuea' onahue' ya'neapetpi'.” O'nopo'e'uyate. Ken huasi'potaj o'ta'mona'uyate. <sup>14</sup>Ta'ba huatatoe'eria huasi'potaj on'tiahuaydepo huayahuaya on'batia'pakpo “In ta'ba

huato<sub>ə</sub>'erieni'si'po o'e. Ke'nen huaoj e'bueyde'te huaojen ta'ba ke'nakon o'to<sub>ə</sub>apo. Huasi'potaj mon'arak. Ke'nen huaojen ta'ba oro'omeyen mo'tae'po mo'darak." Kenda ta'ba huatato<sub>ə</sub>'eriomeya on'batia'pakuyate. <sup>15,16</sup> Ken uva ta'bokpeyo on'tohua'depo on'darakuyate. —Jesúsa o'mana'po.

—Ta'ba huato<sub>ə</sub>'eria huatato<sub>ə</sub>'eriomeytaj o'bahuatiakapo. Huatato<sub>ə</sub>'eritaj o'baarakapo. Ta'ba nog aratbuttaj o'bayokapo. —Jesúsa o'manbatia'pakuyate.

Kenda huakka'da aratbut on'pe<sub>ə</sub>depo, —Keje' kenda kahue'dik ka<sub>ə</sub>'e.

—O'da'uyate.

<sup>17</sup> Jesúsa aratbuttaj o'batiahuaypo, —Apagba' yan'noopenka'. Kenpa' Apagba'a oa',

Huid jak huaka'eria jak ogka'po Diosen 'uru huid pakhue' o'nuy. Ken hueretda huida Diosen jak jon'ta'tihuada'apo. Nogok huaknop<sub>ə</sub>'erien Huairi ijjeapo.

Konig huid jak huaka'eriomey ogka'po huidtaj pakhue'da o'nepo o'nen'uyate konigti do'taj pakhue'ada o'nepo kenpa'ti do'taj me'nenapone.

<sup>18</sup> Konig huidtone'taj o'tikude'po o'nokketogka'apo konigti Diosen Huairitaj oknop<sub>ə</sub>ehue' o'nepo dakhue'da o'neapo. Huidtone' kutahueya' e'tikotnayo konig huagoga'da yamagkapet. Ehue'da o'neapo. Konigti kenomey Diosen Huasi'potaj pakhue' o'nepo nopo'koreahue' o'nepo. Diosa castiga o'magka'apo. Ehue'da o'neapo. —Kenda Jesúsa o'manbatia'pakpo o'manmadika'uyate.

**¿Menpa' Romano aratbuten gobierno huairitaj huakupe yokdik o'e?**

(Mt. 21.45-46; 22.15-22; Mr. 12.12-17)

<sup>19</sup> Ken sacerdote huairiomey, Moisésenba' huamanmadika'eri

Jesústaj on'peonhua'depo Jesúsa oro'omeytaj bo'tia'pakne, oro'a konig huairien ta'ba huatato<sub>ə</sub>'erionig o'nea', bo'tia'pakne. Judío huairiomeya on'nokotdepo Jesústaj huabakuda' jakyo e'tohua'ta' on'tipaknig'a aratbuttaj on'makme'pukpo tohuahue'dik o'nuyate. Jesús Diosen huamanbatia'pakeri o'e. Aratbuta o'noknop<sub>ə</sub>enok huairia aratbuttaj on'makme'pukuyate. <sup>20</sup> Konigepo Jesúste nama'da huaa'eriomeytaj on'tita'mona'po sacerdote huairia on'tita'mona'po nama'da huaa'eritaj konig huadaknoponigda on'nigepo Jesústaj on'pe<sub>ə</sub>apo nama'da Jesúsa yaa'apetdapi'. Jesúsa nama'da ea'nayo gobierno huairite tohua'dik ya'neapet. Jesús nayo nama'da ahue'dik o'ika'uyate.

<sup>21</sup> Konigepo Jesústaj o'nona'po, —Buttida i'manikate. Buttida i'manmadika'ika'. Kenda Diosa o'pak buttida i'manmadika'ika'. Be'api' aratbut huairipi' ontaj e'pe<sub>ə</sub>'nayo me'pukhue'ada i'epo buttida i'manmadika'ika'. <sup>22</sup> ¿Romano gobierno huairitaj menpa' huakupe yokdik o'e? ¿Yokhue'dikpi' o'e, huamanmadika'eri? Jesústaj o'nona'uyate. —Kenda nama'da huaa'eria o'nona'uyate.

<sup>23</sup> Jesúsa nama'da ya'mana'apetpi' nama'da huaa'eria nama'da o'nona'denok Jesús o'nokotonpo, —¿Mena'po nama'da do'taj o'nona'? <sup>24</sup> Men huakupe. ¿Be'ed huakok huakupete ya'e? ¿Be'ed huadik huakupete e'madoya' ya'e? —O'mana'nok,

—Romano gobierno huairi o'e. —Onte'ti Jesústaj o'nona'nok.

<sup>25</sup> —Gobierno huairien huakupe huairitaj yan'yokti'. Kenpa'ti Diostaj yanoknop<sub>ə</sub>epo yan'nigpeika'. —Jesúsa o'mana'uyate.

<sup>26</sup> Aratbuta en'pe<sub>ə</sub>'te Jesúsa nama'da ahue' o'neapo on'nop<sub>ə</sub>'uy.

Jesúsa 'urua'da oa'ika' on'nopepo  
nama'da huaa'eri soata' o'ne'uyate.

**¿Menpa' aratbut kubarakya'  
yan'noyhuadapetpi'?**

(Mt. 22.23-33; Mr. 12.18-27)

<sup>27</sup>Nogok Jesústaj on'huahua'po  
sue'ada saduceo aratbut  
on'huahua'uyate. Aratbut kubarakya'  
onte'ti noyhuadhue' o'neapo saduceo  
on'nopepo kenpa'ti on'batia'pakika'po,

<sup>28</sup>—“Huabokerek huatoeere e'eada  
suigpi' okhuj ehue'ada e'bueynayo  
ke'nen huama'buy 'ayhuataj toepakdik  
o'neapo. Huakkuru e'tasi'poe' kentaj  
ka'dikke' huama'buykudakendik kae'.”  
Moisésa a'nennada o'mana'uyate.

<sup>29</sup>Ken siete huama'buy o'nuy.  
Huakkurueria o'toepakdepo nogok  
okbuey'uyate. Sigpi' okhuj ehue'ada  
okbuey'uyate. <sup>30</sup>Nog huama'buyakon  
'ayhuataj o'toepakpo nogok ke'nakon  
sigpi' okhuj ehue'ada okbuey'uyate.

<sup>31</sup>Konogada 'ayhuataj o'toepakpo  
ke'nakon sigpi' okhuj ehue'ada  
okbuey'uy. Konigti nog huama'buy  
ogka'uyate. Aya'da huama'buy seis  
huama'buy huakkuruerien 'ayhuataj  
on'toepakdepo sigpi' onpapayo'  
okhujhue'ada on'buey'uyate. <sup>32</sup>Ken  
nogok 'ayhuakon on'timabuey'uyate.

<sup>33</sup>Nogok aratbut kubarakya' onte'ti  
Diosere en'manoyhuadde'te, ¿Ke'na  
'ayhua be'ed huatoe ya'eapo? Aya'da  
siete huama'buy on'toe'uyate,  
huamanmadika'eri. —Saduceoa  
o'nona'uyate.

<sup>34</sup>—Oy aratbut indariya'  
on'toepakika'. <sup>35</sup>Kenomeynayo  
Diostaj daknopo'da o'nepo  
Diostaj o'noknopo'enok nogok  
on'manoyhuaddepo Diosere o'nedepo  
onte'ti toepakhue' o'neapo. Kenpa'ti  
huayobu katoepake'po bayokhue'  
o'neapo. <sup>36</sup>Onte'ti bueyhue'dik o'neapo.  
Ken konig Diosen huamata'moneri

kurudyo o'ne konigti o'neapo.  
Kubarakya' Diosa o'manoyhuada'nok  
Diosensi'po o'neapo. <sup>37</sup>Aratbut  
kubarakya' on'noyhuadapo Moisésa  
o'madoya'po Diosba' o'madoya'po  
o'manopoea'uyate. Kente Moisésenba'te  
hueymey e'bakpakte Moisés  
o'timadoya'uyate kente Dios Huairi  
Abrahamen Dios o'e. Dios Huairi  
Isaacen Dios o'e. Kenpa'ti Dios Huairi  
Jacoben Dios o'e. Apagba'a kenpa'  
oa'. <sup>38</sup>Abrahamkudak Isaackudak  
Jacobkudakere huaknopoe'eri  
o'ne'uynok konig nokireg on'noe  
Diosa o'matinopoe'po. Aya'da Diostaj  
huaknopoe'eri en'bueypi' on'noe Diosa  
o'matinopoe'po. —Jesúsa o'mana'uyate.

<sup>39</sup>—Huadakda i'mana',  
huamanmadika'eri. —Sue'da  
Moisésenba' huamanmadika'eria  
o'nona'uyate.

<sup>40</sup>Onte'ti Jesústaj on'me'pukpo  
onahue' o'nuyate.

**Cristotaj Diosa o'ta'mona'apo.  
Kenpa' Diosba' oa'uyate. Cristo  
Daviden Dios Huairi o'e kenoka'ti  
kenpa'ti Daviden adhuea'  
huayayo o'e.**

(Mt. 22.41-46; Mr. 12.35-37)

<sup>41</sup>—“Cristo Davidkudaken adhuea'  
huayayo o'eapo.” Mena'po kenpa'  
on'da'ika'.

<sup>42,43</sup>Salmosba' Apagba'te Cristotaj  
o'batia'pakpo, Cristo do'hued Huairi  
me'taene, Davida oa'uyate.

“Doere teyada kenpa'da  
yamana'ika'. Aya'da o'nen taka'  
konig toto' kenpa'ti oknopoehue'  
huae'eri nogoka'da huaboa'da  
ontaj nigpeedik o'neapo.” Cristo  
do'hued huairitaj Dios Huairia  
ona'uy. Davida Salmosba'te  
oa'uyate.

<sup>44</sup>“Do'hued Huairi me'taene.” Cristo  
si'popakhued Davida oa'uyate. Cristo



Huairi e'si'po'e'dete Davidkudaken adhuea' huayayo kenpa'ti o'e'uy. Kenda dapi' mo'nopo'e. —Jesúsa o'mana'uyate.

**Moisésenba' huamanmadika'eri  
nama'da ogkika'. Jesúsa  
o'bahuaa'uyate.**

(Mt. 23.1-36; Mr. 12.38-40;  
Lc. 11.37-54)

<sup>45</sup>Aya'da aratbut Jesústaj on'peedepo,

<sup>46</sup>—Moisésba'

huamanmadika'eriomey huata'da on'eretpakpo nama'da ogkika' daka' yan'nopoika'. Konigti huairi kirigayo' huabidokda e'otta' on'pakika'po, kenpa'ti huakka' jak eretnopoyo e'huae'te "I'tiak, huairi." Ena'te e'peeta' on'pakika'. Kenpa'ti judfoen huaitake' jakyo huairied huahuadte e'huadta' on'eretpakika'. Kenpa'ti fiestate konig huairied huahuadte e'huadta' on'eretpakika'po. <sup>47</sup>Kenpa'ti 'ayhuaen huakupepi' jakpi' katepi' en'tae'te konig engaña ogka'po on'bakkayika'po. Kenda ogkika'po onokteteyo' Diostaj ijhue'da on'tiona'pakonhuahuika'po aratbuta men'tiahuaye'po huadakda o'ne men'tinopo'e'po konigepo kirigayo' on'tiona'pakonhuahuika'po. Kenda ogkika'nok Diosa daka' o'nopo'epo huakka' castiga o'magka'apo. Huakka' pai'da on'nopo'eapo. Konig kenomey nama'da ogkika' konigti kahue' yane'. —Jesúsa huanigpeika'eritaj o'mana'uyate.

**'Ayhuaa pai'da e'e'ada Diostaj botta'  
sigkupe aya'da o'yokuyate.**

(Mr. 12.41-44)

**21** <sup>1</sup>Diosten jakyo o'nepo, judfo huairi huakka'da on'mato'epo Diosten jakyo huakupe cajayo on'kuda'po Jesúsa o'tiahuay'uyate. <sup>2</sup>Kenpa'ti pai'da 'ayhua e'e'ada botta' sigkupe jeyda e'kudate Jesúsa o'tiahuaypo,

<sup>3,4</sup>—In 'ayhua suigda e'toe'ada konig huakka'da o'kuda'. Judfo huairinayo huakka'da e'taetada konig suigda on'kuda'. 'Ayhuanayo sue'da e'taetada Diostaj daka' oknopoe'po aya'da Diostaj o'yok. Buttida ijjay. —Jesúsa o'mana'uyate.

**Diosten jak ekbirik huidtaj aya'da  
sorokte on'baksaka'apo. Jak ehue'da  
o'e'apo. Jesúsa oa'uyate.**

(Mt. 24.1-2; Mr. 13.1-2)

<sup>5</sup>Ken Diosten jak 'uruda o'e. Sue'da on'batia'pakpo. 'Uruda huid kenpa'ti Diostaj 'uruda katepi' katetehue' on'yokuyate. Kendakon on'nigbetuyate. Diosten jak 'uruda o'e. Kenda on'tiahuaypo on'batia'pakuyate.

<sup>6</sup>—Nogok in 'uruda jak bo'tiahuayika'nig ekbirik huid on'majenapo. Aya'da huid sorokte nog aratbuta on'baksaka'apo. Huid kupahu hue'da o'e'apo. Diosten jak ehue' o'e'apo. —Jesúsa o'mana'uyate.

**Diosten kene'huaya' huame'noe  
tiakhued ee'ted kenpa'  
aratbut ogkika'aponig Jesúsa  
o'manopo'ea'uyate.**

(Mt. 24.3-28; Mr. 13.3-23)

<sup>7</sup>—¿Kenda oro'omeytaj ona'dene menoka' ya'e'apet? ¿Oro'omey a'nopo'eya'po kate huakkuru tiahuaydik o'e'apet? Huamanmadika'eri. —Jesúsen huanigpeika'eria Jesústaj o'nona'uyate.

<sup>8</sup>—Keyoj nama'da mona'apey.

Opuomeytaj huakka'ada bohuatiakapone, "Diosa me'ta'mona'uyné, Cristo ijjeý." Nama'da on'batia'pakapo. "Oy opudtaj ijhuatiakpo, do Cristo ijjeý." Nama'da on'batia'pakapo. Kenomeytaj keyoj kenomeytaj manigpeehue' yane'. <sup>9</sup>Nogbayo nogbayo gobierno sorotataj nog gobierno sorotataj on'barakonhuahua', on'batia'pakdeapo

mo'peedeapet, me'pukehue' yane'. Ken huakkuruda gobierno sorotataj barakonhuahua'dik o'neapo. A'ti nogok Diosen kene'huaya' huame'noete do onte'ti ijtiakapoy. —Jesúsa huanigpeika'eriomeytaj o'mana'po.

<sup>10</sup>—Huadaribayoeri nog huadaribayoeri sorotataa yan'barakapet. Kenpa'ti huadaribayo gobierno sorotataj nog huadaribayo gobierno sorotataj digá'da yan'barakapet.

<sup>11</sup>Nogya' nogya' huadaribaya' digá'da ya'iyegapet. Nogya' nogya' aypo ehue'da ya'eapet. Aypota' yan'mabueyonhua'apet. Kenpa'ti nogya' nogya' aratbut dakhue'da o'nepo huakka'da yan'mabueyapet. Kurudyo huiyoknana on'tiahuaypo digá'da yan'mame'pukapet. Konig tiahuayhue'ya on'tiahuaypo yan'me'pukapet.

<sup>12</sup>Kenda kahued ee'ted opudomey huaknopoe'eritaj mo'baea'po mo'batohua'apone. Opudomey huaknopoe'eritaj bo'huadiayapone. Judío aratbuten huaitake' jakyo mo'batohua'apone. Opudomeya dakhuea'da bo'kame'ne, bo'huadiaypo nama'da bo'huaa'apone. Huabakudá' jakyo bo'kudá'apone. Kenpa'ti do'taj moknopoenok gobierno huairite mo'batohua'apone, opudomey huaknopoe'eri dakhuea' ogkame' a'huaaya'po huairite mo'batohua'apone. Gobierno huairite huakkurute mo'nigboa'apone.

<sup>13</sup>Do Cristotaj huaknopoe'eri ijjeipo Cristoen ijjei, Diosensi'po ijjei. Dios aratbuttaj o'matinepahui'po o'manopo'yareadhuahuika'. Batia'pakdik mo'eapone. <sup>14</sup>Huairite huahuahued "Katia' kentaj yona'apet," nopoehue' yane'. <sup>15</sup>Kenok huairitaj huana'dikte huadadik kenpa'ti 'uru e'nopoe' do'hua on'nopea'apone.

'Urunanada mona'apet opudomeyen taka' oknopoe'hue' huaje'eria onte'ti katia'pi' sigpi' opudtaj huahue'dik ya'neapet. <sup>16</sup>Opudomeyen huaoapi' huayeapi' huama'buyapi' huidpoapi' kenpa'ti nog huabetapi' kenpa'ti huadi'da aratbutapi' dakhuea'da opudomeytaj mogka'apone. Castiga kagke'po gobierno huairitaj bo'yokapone. Opudomeytaj sue'tada bo'arakapone. <sup>17</sup>Do'taj o'noknopoenok do'hued huadik men'diktoika'nok konigepo aya'da aratbuta bo'huadiayapone. <sup>18</sup>Me'pukehue' yane'. Daka' Diosa mo'matoeika'apone. Opudomey kenpa'da bueyhue' mo'eapone. Diosere mo'noeonhuahuika'apo. Aya' opudenso'taj Diosa daka' mo'matoeapone. Huakuhuij opuden nogtipi' ehue' ehue'dik o'eapo. <sup>19</sup>Daka'da do'taj eknopoeonhuahuika'nayo batikhue'ada eknopoeonhuahuika'nayo Diosere mo'noeonhuahuika'apone.

<sup>20</sup>Jerusalén jakkuru huanig taka' sorotataj e'nedete opudomeya e'tiahuayade' Jerusalén huakka' jakyo ida on'barakapo kenpa'ti jak on'maenapo. Huakka' jak ehue'da o'eapo, yan'nopoeti'. <sup>21</sup>Kenoka' aya'da aratbut Judea huadaribayo o'nepo ote'yon ida kan'mamone'po, aya'da Jerusalényo huaje'eri ida ka'norokone'po, kenpa'ti kenoka' ta'bayo o'nepo huakka' jakyo onte'ti kumejhue' ka'ne'. <sup>22</sup>Kenoka' Dios ke'nen Israel aratbuttaj castiga o'magka'apo. Kenpa' Diosba'a oa'uyate. Kenda Diosa o'ka'apo. <sup>23</sup>Kenoka' Diosa ke'poda castiga yamagka'apet. Ettone' bogdakhue' ya'neapet kenpa'ti nog ettone' yobed on'toepo yan'minoga'deapet kenpihuay ke'ponada ya'eapet. Pai'nana on'nopo'eapo. Huadarite in judío

aratbuttaj Diosa digá'nanada castiga o'magka'apo, pai'da on'nopo'e'apo.  
<sup>24</sup> Sorotataa judíotaj yan'barakapet huakka' yan'mabueyapet nogomeytaj noybayo nog gobiernoenbayo nogyon nogyon yan'batohua'apet. Nog aratbut Jerusalényo ya'neonhuahuika'apet, nog aratbutda huairi Jerusalényo ya'neonhuahuika'apet. Kenoka' Diosa o'pakpo judío onte'ti Jerusalényo ya'nika'apet. Gobierno huairi huá'enda yan'toe'apet. —Jesúsa o'mana'po.

**Kurudya' ijhuarakapet. Jesúsa o'mana'uyate.**

(Mt. 24.29-35, 42-44; Mr. 13.24-37)

<sup>25</sup> —Diosa castiga o'magka'apo huanopoea' niokpo puug siokpo nogpa'da ya'neapetnok nogoknanada nogbaya' nogbaya' aratbuta en'tiahuyada kate Diosa yaka'apet yanokkahueapet. Kenpa'ti e'poga 'utta'da yaa'apet kenpa'ti huiyokda e'poga digá'da ya'bosakapetnok digá'da yan'mame'pukapet. <sup>26</sup> Ken niokpo siokpoere konig huiyokda o'iyegaponok konigepo kate Diosa yaka'apet aratbut on'nopo'e'apo huakka'nanada on'me'pukpo konig on'mabueynoatu'apo. <sup>27</sup> Kenoka' do e'tiakte on'tiahuyapo. Do huabokerek ijjenok Diosa me'ta'mona'uyne kurudya' e'sihui'ya' ijhuarakapoy. Teynanada kenpa'ti konig senogda jeynanada ijhuarakapoy. Ken konig do'taj bo'tiahuyapone. <sup>28</sup> Kenoka' huaboa'da o'edeapo konig kurud e'iyegde'te kenoka' yan'durugpakpo kutayo yan'mabo'. Opudomeytaj Diosa o'manopo'yarea'deapo. —Kenda Jesúsa o'manmadika'uyate.

<sup>29</sup> Onte'ti Jesúsa o'manbatia'pakpo o'manmadika'po,

—Higuera hueymey kenpa'ti nog hu'eymeytapi' yan'tiahuy'.

<sup>30</sup> Kenoka' huakutaj o'bakutapakde

huabayokok a'ti o'e'apo, mo'nopo'e.

<sup>31</sup> Kenda huaboa'da o'nona'denig kenda huaboa'da bo'tiahuyaydepo Dios Huairi a'ti o'tiakapo nopoe'dik mo'ene.

<sup>32</sup> Kenda huaboa'da ijja'nig opuden huakka' jaktaj taka' sorotataa ke'poda ogka'apo. Jak ehue' o'e'apo. Aya' aratbut oyda on'noepo bueyhued o'nepo on'tiahuyapo. Buttida ijjay. <sup>33</sup> Kurud ehue' o'e'apo. Kenpa'ti huadari ehue' o'e'apo. Do'hued buttida huadiknayo batikhue'dik o'eonhuahuika'apo.

<sup>34,35</sup> Keyoj ijjay. Daka' yan'nopo'ika'.

Kenpa'da huadakda yag'kika', huadakda yan'nopo'ika'. Katepi' fiestapi' e'ka'ta' me'pukehue' yanika'. Huakka'da e'mamay'ta' eretpakhue' yanika'. Katetapi' huakka' mepu'kehue' yanika'. Ken konig nama'da e'kika'nayo kenoka' do'taj ekpoe' nige'hue' e'ne'te do huabokerek ijje'po kurudya' ida ijhuarakapoy. Castiga a'magkaya'po ijtiakapoy. Konig trampa idada o'kotika' konig ekpoe' nige'hue' e'ne'te idada kurudya' ijhuarakapoy. Castiga e'magka' ijtiakapoy. Aya'tada aratbut nogya' nogya' nog huadari nog huadariyo aya'tada castiga a'magkaya'po ijbahuatia'kapoy.

<sup>36</sup> Konigepo do'taj e'tiaktaj ekpoe' men'nige'ika'. Kenpa'ti kenoka' konig kenda huaboa'da ijja'nig konig sorotataa nogbayo sorotataa on'barakika'po kenpa'ti kenoka' opudomeytaj digá' bo'huadiapo ke'poda mogka'apone. Konigepo opudomeya daka' Diostaj yanoknopo'ika' Diostaj yan'tiona'pakika'. Do huabokerek ijje'po, do'hua e'tiakte daknopo'da e'dik yanika'. —Jesúsa o'manmadika'po o'mana'uyate.

<sup>37</sup> Ken huame'noete Diosen jakyo o'manmadika'ika'po Jesúsa o'manmadika'ika'uyate. Sikyo Jerusalénya' o'orokika'po ote' Olivoste o'hua'ika'po keyo jakyo o'tayika'uyate.

<sup>38</sup>Sikyoedda huakka'da aratbut Diosen jakyo o'nehua'po Jesústaj a'peeya'po on'kudika'uyate.

**Jesústaj a'arakya'po monig  
yan'totiakapo judío huairiomey  
on'batia'pakuyate.**

(Mt. 26.1-5, 14-16;

Mr. 14.1-2, 10-11; Jn. 11.45-53)

**22** <sup>1</sup>A'ti judíoen fiesta o'ëapo. Ken fiestate biahue' pan on'bape'ika'. E'bia'og' okbukhue' o'nepo pan biahue' o'ika'. Ken fiesta huakkurueri isi'po mabueyhue' ee' okkahuehue' fiesta on'dikkuyate. <sup>2</sup>Kenoka' sacerdotte Diosen jakyo huabaa'eri huairi, Moisésenba' huamanmadika'eriene sue'da keyoti o'nepo Jesústaj monig arakdik o'ëapoy. Kenomey on'nopepo Jesústaj e'tohua'te huakka' aratbuta oro'taj en'tiahua'y'nayo aratbuta bo'huadiayapey on'nopepo on'makme'pukuy.

<sup>3</sup>Judas Iscariote Jesúsen doce huamata'mona'eri nogtida o'uyate. Judastaj toto' huairia o'nopo'toedenok, <sup>4</sup>Sacerdote huairitaj kenpa'ti Diosen jak huato'e'eri huairitaj o'bahuahua'po monig Jesústaj ijbayokapo o'batia'pakuyate. <sup>5</sup>Ken sacerdotte huairi Diosen jak huato'e'eriene Judastaj on'peedepo durugda o'nepo, "Huakka'da huakupe bo'yokapone." Judastaj o'nona'uyate. <sup>6</sup>"Huakka' huakupe on'yokaponok Jesúste on'tohua'apone." Judasa o'mana'uyate. "Kente huakka' aratbut ehue' e'ne'yo menpeeta' sacerdotetaj ijbatohua'a." Huaboa'da Judasa o'nopo'e'uy.

**Doce huanigpeika'eriene Jesús  
Huairi on'bape'uyate.**

(Mt. 26.17-29; Mr. 14.12-25;

Jn. 13.21-30; I Co. 11.23-26)

<sup>7</sup>Ken huame'noe pan e'bia'og'a okbukhue'ada on'bape'ika'nig

fiesta o'ede. Kenoka' ovejasi'po on'darakika'. <sup>8</sup>Pedrotaj Juaneretaj o'mata'mona'uyate Jesúsá.

—Yanhuati'. Judío huakkurueri isi'po mabueyhue' ee' okkahuehue' fiesta aypo yan'manhuada'. —Jesúsa o'mana'nok,

<sup>9</sup>—¿Meya' fiesta aypo o'manhuada'apo? —Jesústaj o'nona'uy.

<sup>10</sup>—Jerusalényo yanhua'. Huakka' jakyo yan'kudondepo, huabokerek hue'ey huaegpu'te hueda' e'tohua'te bo'huahuayapone. Kentaj yan'tahuati'. Ken jakyo o'kudapo. Ken jak kurute yan'huahuati'.

<sup>11</sup>—¿Do huanigpeika'eriene o'nen jakyo meya' o'bape'apo?" oro'en huamanmadika'eria mena'ne. Ken konig jak huata'e'eritaj ya'nonati'. <sup>12</sup>Ken jak huata'e'eri opudomeytaj o'peedepo jak kutayo huaboro' kiregyo o'batohua'nok kutopa huabidda huahuadere mon'tiahua'yatu. Keya' aypo yan'manhuada'. —Jesúsa Pedrotaj Juaneretaj o'mana'uyate.

<sup>13</sup>Ken Juan Pedroere o'nokhua'po, huakka' jak Jerusalényo on'hua'po kenda Jesúsá o'mana'nig on'huahuay'uyate. Ken jakyo o'nehua'po fiesta aypo on'manhuada'uyate.

<sup>14</sup>Kenoka' aypo e'mahueyde'te kutopate Jesús Jesúsen huamata'moneri on'huaddepo,

<sup>15</sup>—Do bueyhued ijjepe in judío huakkurueri isi'po mabueyhue' ee' okkahuehue' ka'ne'po fiesta opudomeyere e'tobape'ta' huakka' ijpaki. <sup>16</sup>Onte'ti in fiesta aypo bapehue' ijjeonhuahuika'apopo. Nogok aya'da Diosen Huairitaj en'nigpeede'te kenpa'ti do Diosen Huasi'po e'nigbuey'uyde'te do'taj okkahuehue'ada aypo mo'bape'ika'apone. Kenoka' nogoknada onte'ti in

okkahuehue'ada aypo ij**bape'**apoy.

—Jesúsa o'mana'uyate.

<sup>17</sup>Ken huaba'te huamai'pu' o'toepo, Diostaj dakiti ona'depo,

—Aya'ada yan'mai'e'. <sup>18</sup>Konigepo uva huada hue'ey mayhue' ijjeonhuahuika'apoy. Nogokda Dios Huairitaj aya'ada en'nigpeede'te onte'ti ijmayapoy. —Jesúsa o'mana'uy.

<sup>19</sup>Kenpa' oa'depo pan o'bapadpo Diostaj dakiti oa'depo o'po'sakea'po doce huanigpeika'eritaj o'bayoke'po,

—In pan do'hued huaso'nigti o'e. Aya'tada kamannigbueye'po Diosa me'ta'mona'uyne. In pan yan'bape'. Do e'buey okkahuehue' huai'ka' yan'bape'. —O'mana'uyate.

<sup>20</sup>Ken on'bape'depo onte'ti huamai'pu' o'bayokpo,

—In vino konig Diosen huaboa' huamanopo'yarea' e'mana' huadik o'e. Buttida o'e a'manopo'ayaya'po do'taj bo'arakapone. Do'hued mimi o'mimihua'apo.

<sup>21</sup>Oynayo ken huabokerek oro'ere o'bape'nig'a konig huadi'da o'bapenig'a do'taj taka'taj be'yokapone.

<sup>22</sup>Do huabokerek ijjenok Diosa me'ta'mona'uyne. Ijbueyapoy. Konig Diosa o'pakpo a'nnanada o'nopouyatenok, ijbueyapoy. Ke'na taka'taj be'yokapone. Kentaj Diosa diga' castiga ogka'apo. Pai'nada o'no'po'unhuahuika'apo. —Jesúsa o'mana'uyate.

<sup>23</sup>Ken, huaboa'da on'batia'pakepo Jesúsen huata'mona'eriomey huayahuaya on'batia'pakepo, ¿be'auru Jesústaj taka'taj ya'bayokapo? on'batia'pake'uyate.

**¿Oro'omey be'aturu hueretda huairi o'e'apet? Huayahuaya on'batia'pakuyate.**

<sup>24</sup>Kenoka' on'batia'pakpo. ¿Oro'omey be'aturu hueretda huairi o'e'apet?

Huayahuaya huamata'mona'eriomeya on'batia'pakuyate.

<sup>25</sup>—Nog aratbuten gobierno huairi teyda on'mana'ika' kenpa'ti on'mata'monea'ika'. “Huadakda ogkika'.” Nog aratbuta kenomeyen huairitaj huaa'dik o'nika'. <sup>26</sup>Opudomeynayo konig nog aratbut gobierno huairi ehue'dik yane'. Opudomeya hueretda huairi ee'ta' e'paknayo teyda e'mata'mona'ika'ta' pakhue' yaneti' konig huasuedonig yaneti'. Kenpa'ti opudomey huairi ee'ta' e'paknayo konig huanaba' yanikati'. <sup>27</sup>Ke'na kutopate o'bape'. Ke'na huairi o'e. Ke'na aypo o'nigtotiakika'nig ke'nataj huanaba' o'e. Donayo opudomeyere konig opudomeyen huabatihuapokika'eri ijjey. Ken konig Diosa o'pak.

<sup>28</sup>Kenoka' judío huairi do'taj engaña egka'ta' on'eretpakpo nama'da ena'ta' mentipakikame'ne kenoka' do'ere mo'ikame'ne. <sup>29</sup>Konig do'hued Apag Diosa hueretda huairitone' me'ea'uyne. Konig aya'tada mana'dik ijje'po kenpa'ti mata'mona'dik ka'e'po huairi me'ea'uyne. Konigti huairi opudomeytakon o'nea'ne. <sup>30</sup>Nogok do gobierno huairitone' ee'te doeretaj mo'tobape'apone. Kenpa'ti doere mo'mayapone. Dios Huairien huahud huahudte bo'huadapone. Aya'da Israel aratbuttaj, doce tribus aratbuttaj konig huamanoeya'eri huairionigti mo'ea'apone. Kenda katapi' Israel aratbut ogkika'uyate, kenda mo'peedeapone. Dakhuea' ogka'nigtaj mo'no'poenok Diosa castiga o'magka'apo. —Jesúsa doce huamata'mona'eriomeytaj o'mana'uyate.

**“Jesústaj jokiahue'ya ijjey.” Simón Pedroa ia'apone. Jesúsa ona'uyate.**  
(Mt. 26.31-35; Mr. 14.27-31;  
Jn. 13.36-38)

<sup>31</sup>—Yapee' Simón, yapee' Simón.  
“Beyok Jesúsen huanigpeika'eri

konig trigotaj ektipoapa' o'nen huata'mona'eritaj e'magka'ta' ijpaki. Jesús en huata'mona'eritaj menpa'ti daka' yanoknopenhuahuiketapo batikhue'ada e'noknopenhuahuikate nama'da e'magka'ta' ijabatipaki, Dios." Toto' huairia ona'uyatenig'a. <sup>32</sup>Donayo ontaj Simón o'tiona'pakne. "Simón Diostaj do'takon daka' kaknopoike' batikhue'ada kaknopoike' kenpa'ti ona'ti do'taj e'nopo'korea'de'te huama'buy huaknopo'e'eritaj teyda eknopo'e' kabatihuaopokike'." Kenda o'tiona'pakne. —Jesús a Simón Pedrotaj ona'uyate.

<sup>33</sup>—On huabakudá jakyo egkudá'nayo kuddiktion ijje. Onere a'bueyya'po hua'diktion ijje, ijnopoey, Huairi. —Simón Pedroa Jesús taj ona'uyate.

<sup>34</sup>—Oyedda in sikyo huatahuaj sipoghued "Jesústaj jokiahue'ya ijje," bapa'a' ia'apo, Pedro. —Jesús a Pedrotaj ona'uyate.

#### A'ti Jesús pai'da o'nopo'epo.

<sup>35</sup>—A'nenda opudomeytaj do'hua on'mata'mona'uyne. Kutamabayo', huakupebayo' nog hua'iotbayo' on'mata'mona'uyne. Enhua'de'te konig aya'da e'tamae'onig mo'eme'ne. —Jesús a mana'nok,

—Ee', katepi' aya'da o'paknig o'mato'e'uy. —O'nona'uyate.

<sup>36</sup>—Oynayo huakupe e'tae'nayo yan'tohua'. Kutama e'tae'nayo yan'tohua'. Sorotataen siro toehue' ee'nayo huaok yan'bahuaya'po siro yadeti'.

<sup>37</sup>Konigepo "Ke'na dakhuea' huaka'eri o'e. On'batia'pakapo." Apagba'a oa'. Kenda Apagba'a oa'nig do'taj a'ti men'huaa'deapone ijjay. Aya'da Apagba'te me'nigbatia'pakuyatenig do'taj a'ti me'nogka'apone. Pai'da ijnopo'epoy. A'ti ehue'da ijjeapoy. —Jesús a mana'uyate.

<sup>38</sup>—In botta' sorotataen siro o'e, Huairi. —O'nona'denok.  
—Kenyo'da kae'. —Jesús a mana'uyate.

#### Getsemani ta'baya' Jesús a Diostaj o'tiona'pakuyate.

(Mt. 26.36-46; Mr. 14.32-42)

<sup>39</sup>Ken Jesús huakka' jakya' Jerusalén ya o'orokonpo ote' Olivosyo o'hua'ika'po ote' Olivosyon o'hua'beduyate. Kenere huanigpeika'eriomeyere on'hua'uyate.  
<sup>40</sup>Keyo o'tiona'pakikana'igyo jokyedepo, —Dakhuea' kahue' huae'te yan'tiona'pak. Konig Diosa bo'tihuapoke'po dakhuea' kahue' huae'te yan'tiona'pak. —Jesús a mana'uyate.

<sup>41</sup>Ken Jesús meyhue'da o'bakuato'po a'tiona'pakya'po huikudate ohuadpo.  
<sup>42</sup>—"Pai'da yanopo'epo bueyhue'dik yae'ti sion." On e'paknayo mena', Dios. Do konig ijpaknig kahue' yae'. Konig kenda on i'pak megka', do'hued pag. —Jesús a o'tionapakuyate.

<sup>43</sup>Ken kurudya' Diosen huata'moneri o'huarakondepo Jesús taj ateypakaya'po o'huarakonde'uyate. <sup>44</sup>Konigepo cruzte ijbueyapoy diga'da o'nopo'epo nogiti huakka'a'da o'tiona'pakpo diga'da o'ukpakpo konig mimi e'ukpakhue huakka' barakte o'surukuyate.

<sup>45</sup>Ken o'tiona'pakonhua'depo o'bopo huanigpeika'eriomeytaj o'bahuahua'po e'tayte o'bahuahuay'uyate. Sue'nanada o'nepo on'batay'uyate.

<sup>46</sup>—¿Mena'po bo'tai? Yan'mabo'. Yan'tiona'pak. Onte'ti dakhuea' kahue' huae'te yan'tiona'pak. —Jesús a huanigpeika'eritaj o'mana'uyate.

#### Jesústaj huakka'ada a'tohuaya'po on'huatiakuyate.

(Mt. 26.47-56; Mr. 14.43-50; Jn. 18.2-11)

<sup>47</sup>Jesús huanigpeika'eritaj e'manbatia'pakonhua'te huakka'ada on'huatiakde'uyate. Huakkuru Judasa o'huatiakpo. Ke'na Jesús en doce

huanigpeika'eri nogtia' o'uy. Judas huakka' aratbut o'batotiakdepo Jesústaj a'buyukya'po o'huahua'uyate.

<sup>48</sup>—Do huabokerek ijjenok Diosa me'ta'mona'uyne. Do'taj inomey do'hued taka'taj a'yokya'po do'taj o'buyukne. —Judastaj Jesúsa ona'uyate.

<sup>49</sup>Huakka' aratbut on'huatiakdepo Jesústaj on'tohua'apo. Jesúsen huanigpeika'eria on'batiahuayondepo, —¿Sorotataen siro menpa' o'magka'apo, Huairi?

—Huanigpeika'eriomeya o'nona'uyate.

<sup>50</sup>Nogtida huanigpeika'eria sacerdoten huanaba'taj huada'kopen huapesod okteg'uyate.

<sup>51</sup>—Keje' kennigda yamagka'. —Jesúsa o'mana'po,

Ken huanaba'en huapesod Jesúsa o'tibata'tepo o'yarea'uyate.

<sup>52,53</sup>—Konig huabereeritaj egkapa' siroa hueypaerea on'huatotiakbedne. Ka'tia'po kenpa' o'nogka'. Diosen jakyo opudomeyere nog huame'noe nog huame'noe nogok nogok ijika'niga do'taj sigpi' opuda' tohuahue'da o'nikame'ne. Onayo sikyoda toto'a mo'toenok o'nogka'bedne. —Sacerdote huairitaj Diosen jak huairitaj huatone' huairitaj Jesúsa o'mana'uyate. Kenomey Jesústaj a'tohuaya'po on'huatiakbeduyate.

**Jesústaj jokiahue'ya ijje. Pedroa bapa'a' oa'uyate.**

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup>Ken Jesústaj on'toepo on'tohua'beduyate. Sacerdote huairitone'en jakyo on'tohua'beduyate. Pedroa ta'pote hueytemon o'tahua'po.

<sup>55</sup>Sacerdote huairitone'en jakyo o'nokye'depo jakkurunopote ta'ak on'bakpaka'po ta'akope huabirika' on'tibahuadpo Pedro keyoti

kenomeyere o'huaduyate. <sup>56</sup>Pedro ta'akopete e'huadte huanaba' ettone' o'boato'po Pedrotaj o'tiahuaypo daka'da o'tiahuaydepo,

—In huabokerekkon Jesúsere o'ika'uyate.

—Huanaba' ettone'a o'mana'uyate.

<sup>57</sup>—Ehue', ettone'. Jesústaj jokiahue'ya ijje, —Pedroa ona'uyate.

<sup>58</sup>A'timon nogakon Pedrotaj o'tiahuaydepo, —O'nakon Jesús en huanigpeika'eri i'ene. —Ona'uyate.

—Ehue', huabokerek, Jesús en huanigpeika'eri ehue' ijje. —Pedroa ona'uyate.

<sup>59</sup>A'ti noghoratida nogakon o'mana', —In huabokerek Jesúsere o'ika'uyate, buttida ijje. Konigepo Galilea huadaribayo hua'e'eri o'e. —O'mana'uyate.

<sup>60</sup>—Ehue', ka'tia' ia' nopoehue' ijje, huabokerek. —Pedroa ona'uyate.

Kenoka' kenpa' Pedroa ea'te huatahuaa o'sipogde'uyate. <sup>61</sup>Jesúsa Pedrotaj o'huakorudpo o'tiahuaynok, kenda Jesús Huairia ona' Pedro okkahuehue' o'epo huaboa'da o'nopo. “Oyedda in sikyo huatahuaj sipoghued 'Jesústaj jokiahue'ya ijje,' bapa'a' ia'apo, Pedro.” Huairia mename'ng Pedro okkahuehue'da huaboa'da onte'ti o'nohon'uyate. <sup>62</sup>Jak kuruyo o'makorokdepo pai'nada o'huikuyate.

**Jesústaj on'tierikpo on'tidi'ke'uyate.**

(Mt. 26.67-68, Mr. 14.65)

<sup>63</sup>Huabokereka Jesústaj on'toepo on'tierikonhua'po on'bititonhua'po <sup>64</sup>huakpotaj tela o'nokpotidoka'po huakokta' on'pebasbasdepo, “Diosa mennopo'e, ¿Be'a ontaj bo'kokbasbas? oro'taj mona.” Jesústaj o'nona'uyate.

<sup>65</sup>Ken nogda nogda dakhuea'da Jesústaj on'tidi'keunhua'uyate.

**Judío huairi egkupopakyo Jesústaj on'boa'uyate.**

(Mt. 26.59-66; Mr. 14.55-64; Jn. 18.19-24)

<sup>66</sup>Emede'te judío aratbut huatone' huairi ogkupopakpo, sacerdoten huairiere

ogkupopakpo kenpa'ti Moisésenba' huamanmadika'eriere ogkupopakpo, Jesústaj on'manigtotiakdepo,

<sup>67</sup>—¿Menpa' Cristo i'e? ¿Menpa' Diosa meta'mona'uy? Oro'omeytaj kenda mona'. —Judío huairiomey ogkupopakpo Jesústaj o'nona'uyate.

—Ee', do'hua e'mana'nayo, Cristo ijjeý do'hua e'mana'nayo oknopohue' mo'epone. Da oa' mo'nopohue'epone. <sup>68</sup>“Do Cristo ijjeý. Diosa me'ta'mona'uyne. ¿Kenda menpa' mo'nopohue'?” Opu domeytaj e'mana'nayo do'taj onte'ti a'tokhue' o'neapone. Kenpa'ti “Yahua.” Onahue'dik o'neapone. <sup>69</sup>Do huabokerek ijjenok Diosa me'ta'mona'uyne. A'ti Diosere ijhuadapoy. Dios teyda o'epo aya'da ka'dik o'енок Dioste huada'kopen konig Dios teyda ijjeapoy. Aya'da ka'dik ijjeapoy. —Jesúsa o'mana'uyate.

<sup>70</sup>—¿Menpa' o'na Diosen Huasi'poda i'e? —Aya'ada Jesústaj o'nona'uyate.

—Ee', Diosen Huasi'po ijjeý konig opudada o'nona'ne, Diosen Huasi'po ijjeý. —Jesúsa o'mana'uyate.

<sup>71</sup>—“Diosen Huasi'po ijjeý.” Jesúsa oa'nok oroda o'peene. Dakhuea'da oa'po o'ka', o'nopohue'. Konigepo castiga ogka'dik o'epone. “Jesús dakhuea' oa'uy.” “Dakhuea' o'ka'uy.” Noga en'dapi' peehue'dik o'epone. —Huatone' huairiomeya oda'uyate.

**Pilato Romano gobierno huairitaj e'koka' Jesúsa o'nigbo'uyate.**

(Mt. 27:1-2, 11-14; Mr. 15:1-5;

Jn. 18:28-38)

**23** <sup>1</sup>Kenoka' aya'ada judío huairi egkupopakpo on'maboddepo Jesústaj Pilato Romano gobierno huairite on'tohua'uyate. Judío huairinayo Jesústaj arakhue'dik o'nenok Romano huairiayo'da yan'arak a'dik o'nenok. <sup>2</sup>Ayo Jesústaj Pilatotaj huaboa'da nama'da on'huaa'po,

—Oro'omeyen judío aratbuttaj in huabokerek nama'da o'manmadikika'uy. Romano gobiernotaj yan'magka' nama'da o'manmadikika' oro'a o'pee'uy. Kenpa'ti Romano gobierno huairitaj huakupe bayokhue'dik yanika'. Nama'da o'manmadika'. Kenpa'ti “Cristo ijjeý,” oa'. Cristo konig gobierno huairi huadik o'e. —Jesústaj Pilatotaj nama'da on'huaa'uyate.

<sup>3</sup>—¿Judío aratbuten gobierno huairi menpa' i'e? —Pilatoa Jesústaj ona'uyate.

—Ee', konig o'na ia'nig ijjeý. —Jesúsa ona'uyate.

<sup>4</sup>—In huabokerek dakhuea' kahue' o'ika'. Castiga ogkahue'dik ijjeý. —Pilatoa sacerdote huairitaj huakka' aratbutomeytaj o'mana'uyate.

<sup>5</sup>—Romano gobierno huairi dakhuea'da o'ne. Yan'maen. Ken konig Jesúsa nama'da o'manmadikika'. Judío aratbut aya'tada nama'da o'manmadikika'po adyonda Galileayo huakkuruda nama'da o'manmadikika'po nogyo nogyo konigti o'kika'po ta'pota' iyokon konigti o'kika'po nama'da o'manmadikika'. —Kenpa' judío huairia ighua'da on'tihuaa'po Jesústaj, Pilatotaj nama'da on'tihuaa'uyate.

**Herodes nog Romano gobierno huairi o'epo Galilea huadaribayo huairi o'енок Herodeste Jesústaj Pilatoa o'ta'mona'uyate.**

<sup>6</sup>Jesús Galileayo o'manmadika'uyate. Pilatoa o'peedeipo “¿Galilea huae'eri menpa' Jesús ya'e?” O'mana'uyate.

<sup>7</sup>“Ee', Galilea huadaribayo huae'eri Jesús o'e.” Pilatotaj o'nona'de'uyate. Kenda Pilato o'peedeipo Jesústaj Herodeste o'ta'mona'po, Herodes Galilea gobernador o'енок kenpa'ti kenoka' Herodes Jerusalényo o'uyate.

<sup>8</sup>Herodes nogok nogok Jesústaj



o'tipeonhuahua'po konigepo Jesústaj e'tiahua'ya' o'pakpo Jesús katepi' 'urua'da e'ka' konig e'bayarea'te e'tiahua'ya' o'pakpo konigepo Jesústaj e'tiakte o'tiahua'ydepo Herodes huakka' o'durugpakuyate. <sup>9</sup>Nogiti nogiti ena'tada Jesúsanyo a'tokhue' o'uyate. <sup>10</sup>Keyo sacerdote huairi kenpa'ti Moisésenba' huamanmadika'eri o'nepo Jesústaj íghua'da on'huaa'nok <sup>11</sup>Herodes sorotataere Jesústaj a'tierikya'po 'uruda huaok on'ota'po konig gobiernoen huairien yudtaj on'ota'depo onte'ti Pilatote o'ta'mona'uyate. <sup>12</sup>Kenme'noete Pilato Herodesere huaboa'da huayahuaya di'da on'mae'uyate. A'nenda huayahuaya on'bahuadiay'ika'uyate. Huaboa'da di'da on'mae'uy.

**“Jesústaj arakdik mo'ene.” Pilatoa o'mana'uyate.**

(Mt. 27.15-26; Mr. 15.6-15;  
Jn. 18.39-19.16)

<sup>13</sup>Sacerdote huairitaj aratbuten huairitaj kenpa'ti nog aratbuteretaj “Yan'batiaj, do'taj menhuatiak.” Pilatoa o'mana'po egkupopakde'te,

<sup>14</sup>—In huabokerektaj opudomeya on'ngtotiakne. “In huabokerek nama'da o'manmadikika'. Romano gobiernotaj yan'magka' nama'da o'manmadikika'.” Opudomeya o'nona'nig'a opudomey on'tiahua'yo Jesústaj íjbatia'pakdepo Jesúsna nogda nogda dakhuea' o'ka' bo'huaa'nig'a kenda nama'da bo'huaa'nig'a Jesúsnyo sigpi' dakhuea' kahue' o'ika'te. Ijnopoy. <sup>15</sup>Herodes kenpa'ti Jesústaj o'peedepon dakhuea' kahue' o'ika'te. Herodesakon o'nopoyepo oro'omeytaj onte'ti bo'tokumejne. Yan'pee'. Jesúsna sigpi' dakhuea' kahue' o'ika'tenok Jesústaj yadarak. Ahue'dik íjje. <sup>16</sup>Castiga yogka'depo yahuati' yona'apoy. —Pilatoa judío huairiomeytaj o'mana'uyate.

<sup>17</sup>Fiestate nogtida huabakuda' jakyo huae'eritaj jakya' o'orokika' konigepo Pilato nogtatida oroka'dik o'uyate. <sup>18</sup>Onoktete'yo' aya'ada 'utta'da o'nokoypo,

—Jesústaj yadarak. Barrabástanayo yaoroka'. —Onoktete'yo' aya'ada 'utta'da o'nokoy'uyate.

<sup>19</sup>Jerusalényo Barrabás huakka'da aratbut o'bakupopaka'depo gobierno huairitaj a'mabatiarakaya'po e'batoahua'ta' o'pakuyatenig'a. Kenpa'ti nogtatida o'arakuyate. Konigepo huabakuda' jakyo o'enk. <sup>20</sup>Jesústaj Pilatoa e'oroka'ta' o'pakpo, “Jesústaj e'oroka'ta' íjpaki.” O'mana'nig'a.

<sup>21</sup>—Hueypa cruzte yadarak. Hueypa cruzte yadarak. —Huakka'ada judío aratbut e'kupopakya' 'utta'da o'nokoypo. Onte'ti onte'ti o'nokoy'uyate.

<sup>22</sup>—Ina sigpi' dakhuea' kahue' o'ika'tenok keje' arakhue'dik íjje. Konigepo Jesústaj castiga yogka'depo Jesústaj íjorokapoy. —Bapa'a' Pilatoa o'mana'nig'a.

<sup>23</sup>—Hueypa cruzte Jesústaj yadarak. Hueypa cruzte yadarak. —Huakka'ada aratbuta ogkupopakpo sacerdote huairierea diga'da o'nokoypo, nogok Pilato ta'pota'taj e'nokoyte o'manigpee'uyate. <sup>24</sup>“Kenda on'paknok íjka'apoy.” Pilatoa o'nopoyepo, o'mana'uyate. <sup>25</sup>Pilato huakka' aratbuttaj o'manigpeepo, Barrabástaj o'oroka'uyate. A'nenda Barrabás huakka' aratbuttaj o'bakupopaka'depo gobierno huairitaj a'mabatiarakaya'po e'bahuatoahua'ta' o'pakuyatenig'a. Kenpa'ti Barrabása o'arakuyate. “Barrabástaj yaoroka'.” Huakka'ada o'nokoynok o'oroka'uyate. Ken judío aratbuta Jesústaj e'arakta' oneretpaknok, Jesústaj Pilato Romano sorotataj ka'darakepo o'bayokuyate.

**Hueypa cruzte Jesústaj on'arakuyate.**

(Mt. 27.32-44; Mr. 15.21-32;  
Jn. 19.17-27)

<sup>26</sup>Ken sorotataj Jesústaj on'tohua'depo Simóntaj on'dejdepo, Simón Cirene

huakka' jak huae'eri o'epo ta'baya' e'tiakde'te Simóntaj on'toepo hueypa cruz katohue'po sorotataa o'nona'nok Jesúsén ta'pota' Simóna cruz o'tohua'uyate.

<sup>27</sup>Huakka'nanada aratbut on'batahua'po kenpa'ti huakka'da ettone' on'batahua'po Jesúsétaj on'tinepahui'po digá'da on'bahuikonhua'po 'utta'da on'bahuikonhua'uyate. <sup>28</sup>Jesúsa ettone'taj o'batiahuaypo,

—Dota' huikhue' yane', Jerusalén ettone', huata'da yan'tohuik, opudomeyensi'pota' yan'tohuik.

<sup>29</sup>Konigepo opudta'taj nogok ke'poda dakhuea'nada o'epo. Aratbuta pai'nanada on'nopo'epo. “Ettone' si'popakhue'dik o'nepo durugda o'neapo, ettone' bogdakhue' ehue'dik o'nepo durugda o'neapo, ettone' huasi'potaj huau'te minonhue' o'nepo durugda o'neapo.” Nogok ke'ponada ee'te kenda on'batia'pakapo.

<sup>30</sup>Kenoka' nogokda aratbut digá'da pai'nada on'nopo'eaponok e'bueyta' on'pakapo. “Oro'omeytaj monbet,” huakupataj o'nona'apo. “Pendaka bo'tiyurak,” o'nona'apo. <sup>31</sup>Donayo konig ohueyburanig ijje'po huadakda ee'tada do'taj dakhuea'da me'nogka'ne. Opudomeynayo dakhuea'da mo'epo konig ohuey e'ay'onig opudomeytaj nogiti ke'poda dakhuea'nada on'magka'apo. —Jesúsa o'mana'uyate.

<sup>32</sup>Kenpa'ti nog botta'taj dakhuea' huakka'eritaj on'batohua'po Jesúsétaere a'arakya'po on'batohua'uyate. <sup>33</sup>Ote'te o'nokyedepo Jesúsétaj hueypa cruzte on'beta'uyate. Kenpa'ti botta' dakhuea' huakka'eriére hueypa cruzte on'mabeta'uyate. Jesúsén huada'kopen nogtaj on'beta'po nogtaj Jesúsén ope'topen on'beta'uyate. Ote' huadik o'e La Calavera. <sup>34</sup>Jesústaj en'beta'dete,

—Dakhuea' e'ka' yabakkahuea', Pag. Kenda menogka'ne nopoehue' o'nepo. —Jesúsa ona'uyate.

Ken sorotataj Jesúsén yudtaj be'ati ya'deyapet a'nopoeya'po huid okmo o'nene'uyate. <sup>35</sup>Huakka'da aratbut o'nepo Jesúsétaj on'tiahuaya'po judío huairiomeyakon Jesúsétaj on'tierikpo,

—Jesús nogomeytaj o'batihuapokikame'te. Ken Diosen Cristo ee'nayo Diosa ektie'ea' ee'nayo huata' katihuapoke'. —Judío huairiomeya Jesúsétaj dakhuea'da on'tierikpo on'batia'pakuyate.

<sup>36</sup>Sorotataa kenpa'ti Jesúsétaj on'tierikpo, Jesúsétaj on'huahua'po, vino pai' kamaye'po on'yokuyate.

<sup>37</sup>—On judfoen gobierno Huairi ee'nayo huata' yatihuapokpo hueypa cruzya' yahuarak. —Sorotataa Jesúsétaj on'tierikpo o'nona'uyate.

<sup>38</sup>Jesúsén huaku kutapen huaensi'pote bapa'en hua'ate on'madoya'uyate, griego hua'a, latin hua'a, hebreo hua'a on'madoya'po “In judío aratbuten gobierno Huairi o'e.” On'madoya'uyate.

<sup>39</sup>Botta' dakhuea' huaka'eri cruzte on'betonhua'po Jesúsétaj nogtiada o'tierikpo,

—O'na Cristo ee'nayo Diosa e'ta'mona'uynayo huata'da cruzya' yahuarak kenpa'ti oro'omeytaj bo'tihuapokpo bohuaraka'. —Nogtiada dakhuea' huaka'eria Jesúsétaj nama'da ona'uyate.

<sup>40</sup>—Dakhuea' ia'. Menpa' Diostaj okme'pakhue'ada ia'ne. Jesús pai'da o'nopo'e konigti pai'da i'nopo'ene castiga ontaj mogka'ne.

<sup>41</sup>Oro'omeynayo dakhuea'da o'kika'nok oro'omeytanayo castiga mogka'ne. Inbokereknayo sigpi' dakhuea' kahue' o'ika'. —Noga dakhuea' huaka'eria huakkuru huaa'eritaj ona'uyate.

<sup>42</sup>—Nogok Dios Huairi on i'edepo do'taj okkahuehue' yaepo do'taj metinepahuiti', Jesús. —Jesústaj huatodiayeria ona'uyate.

<sup>43</sup>—Oy doere paraísoyo  
i'ëapone. Paraísoyo durugda  
i'ëonhuahuika'apone. Buttida ijjay.  
—Huatodiayeritaj Jesúsa ona'uyate.

**Jesús o'bueyonde'uyate.**  
(Mt. 27.45-56; Mr. 15.33-41;  
Jn. 19.28-30)

<sup>44</sup>Niokpo tokhuada' ekpohuadte  
huadari huabada o'ta'sikon'uyate.  
Sikkiregda o'uyate. Huaduknopoyo  
e'huadte onte'ti niokpo o'tieyhuaduyate.  
<sup>45</sup>Niokpo jey ee' e'batikonte sikkiregda  
ee'te Diosen jakyo huahuakda cuperina  
eretnopoyo e'oroya'da huanopota'da  
o'huison'uyate. Kenoka',  
<sup>46</sup>—Ontaj Apag Dios do'hued  
nokireg o'yokne, Pag. —Jesúsa 'utta'da  
ona'uyate.

Kenpa' oa'depo o'bueyon'uyate.  
<sup>47</sup>Capitán sorotataj Romano  
o'ëpo sorotataj huairi o'ëpo kenoka'  
kenda aya'da o'tiahuaydepo, "Apag  
Dios 'uruda o'e. Huadakkanada o'e,"  
o'batia'pakpo,  
—In huabokerek dakhua' kahue'  
o'ika'te, buttida ijjay. —Capitán  
sorotataa oa'uyate.

<sup>48</sup>Aya'da aratbut kente o'nepo  
on'tiahuaydepo o'nokbahua'po  
suhue'nanada o'nepo o'nokbahua'uyate.  
<sup>49</sup>Nogomeynayo Jesústaj huakie'eri  
o'nepo huahue' o'ne'uyate. Ettone'ere  
o'nepo ettone' Galileaya' Jesústaj  
huatahua'eri o'nepo huahuedda o'nepo  
sue'da bidte on'kupobopo Jesústaj  
e'darakte on'batiahuaya'uyate.

**Jesús bueytaj on'kubarakka'uyate.**  
(Mt. 27.57-61; Mr. 15.42-47;  
Jn. 19.38-42)

<sup>50</sup>Ken huabokerek o'ëpo ke'nen  
huadik o'ë José. José huadakda o'ëpo  
Diosenba' daka' o'nigpeika'uyate.  
Judea huadaribayo huae'eri o'ëpo  
huakka' jak Arimateayo o'si'poepo

o'kerekuayate. Ke'na judío huairiere  
on'kupopakika'uyate. <sup>51</sup>José Dios  
Huairitaj e'mabo' o'nigikuyate.  
Kenda judío huairiomey Jesústaj  
o'nogka'denig kenda pakhue' o'uyate.  
<sup>52</sup>Ken José Pilatotaj o'huahua'po,  
"Jesús buey beyok." Ona'uyate.  
<sup>53</sup>"Ee', yatohuati'," Pilatoa e'nade'te  
Jesús bueytaj o'huaraka'depo  
o'bueyto'ëpo Jesús bueytaj o'tihuiyigpo  
'uruada telaa konig sávana  
o'tihuiyigdepo sipana' huidkogyo  
huabokogyoda o'bueyhueda'uyate.  
Ken kubarak huabokogda o'ëpo keyo  
nogtaj kubarakkahuedda o'ë'uyate.  
<sup>54</sup>Ken huame'noe konig e'manhuada'  
huame'noe o'ënok a'ti huaboa'da  
okmapie'ahuaddik huame'noe o'ëapo.  
<sup>55</sup>Kenomey ettone' huaboa'da  
Jesúsere Galileaya' on'tiakme'te kente  
Jesús bueyte on'huahua'po kubaraktaj  
on'tiahuaypo kenpa'ti konig ke'nenbuey  
e'huedte on'tiahuayon'uyate. <sup>56</sup>Ettone'  
jakyo ogkumejdepo 'uru'huieda  
hue'ey e'ka'deada okmapie'ahuaddik  
huame'noete kahue' o'nuyate. Konig  
Moisés e'mana' oa'uyatenok kenomey  
on'nigpee'uyate.

**Jesús huakudaka'da e'bueyada  
o'noyhuadon'uyate.**  
(Mt. 28.1-10; Mr. 16.1-8; Jn. 20.1-10)

**24** <sup>1</sup>Judío aratbuten  
okmapie'ahuaddik  
huame'noe e'pokonde'te domingo  
emedete sikyoednada kubarakyo  
ettone' on'hua'po 'uru'huieda hue'ey  
adikken e'ka'de' on'tenok on'tohua'po,  
nog ettone'ere on'huahua'uyate.  
<sup>2</sup>Ettone' kubarakyo o'nokyedepo  
huaboro' huid huanokbet kubaraktaj  
o'nonokbetame'te onokbethue'kon  
on'huahuay'uyate. <sup>3</sup>On'kudondenig'a  
Huairi Jesús bueytaj huahuayhue'  
o'nuyate. <sup>4</sup>Kenpihuay, Jesús buey  
huedhue' o'ë menpapi' ya'ëate

en'no<sup>o</sup>pe'te. Ida botta' huabokerek on'tibopo meyohue'da on'tibopo yudtaj senogda e'ot o'nuyate. <sup>5</sup>Huabokerektaj on'batiahuaydepo diga'da on'me'pukpo sorokyon on'kuboyon'uyate.

—Kubarakyo kente aratbutbueyyo'da o'nika'nig'a katia'po huabokerektaj o'noedenig'a bo'uk. <sup>6,7</sup>Jesús iyoda ehue' o'e. Diosa o'noyhuadande. Jesús Galileayo o'epo “Do huabokerek ijjenok Diosa me'ta'mona'uyne. Do'taj dakhuea' huaka'eritaj beyokapone. Dakhuea' huaka'erimey men'tohua'apone. Hueypa cruzte do'taj men'arakapone. Bapaa' huame'noe kubarakyo ijjedepo a'ti ijnoyhuadapoy.” Jesúsna mona'uyne, okkahuehue' mo'et. —Botta'a Diosen huata'moneria ettone'taj on'mana'uyate.

<sup>8</sup>Ken, kenda Jesúsna o'mana'uyate ettone' huaboa'da onte'ti on'no<sup>o</sup>pe'uyate. <sup>9</sup>Ken kubarakya' on'kumejdepo aya'da on'tiahuaydepo on'peedenig on'manbatia'pakuyate. Once huamata'mona'eritaj kenpa'ti aya'tada nogomeytaj aya'da on'manbatia'pakuyate. <sup>10</sup>María Magdalena, Juana, María Jacoboen huaye, nog ettone'ere once huamata'mona'eritaj aya'da e'manbatia'pakato'tada <sup>11</sup>nama'da mona'ne once huata'mona'eria on'no<sup>o</sup>pepo butti o'da' makno<sup>o</sup>pehue' o'ne'uyate.

<sup>12</sup>Pedronayo o'oro<sup>o</sup>kondepo o'ketonhua'po kubarakyo o'ketonhua'po okyede<sup>o</sup>depo kubarakyo o'tiahuayato'po 'uru tela konig sávana adkorepen e'hued o'tiahuayondepo onte'ti jakyo o'hua'po, “Kenpihuay, kate yaka' Diosa,” o'nononpo o'hua'uyate.

**Emaús huakka' jakyo dagte  
on'hua'uyate.**

(Mr. 16.12-13)

<sup>13</sup>Kenme'noete botta' Jesús en huanigpeika'eri Emaús huakka'

jakyo on'hua'po, Jerusalénya' Emaús sue'da bidte o'e. Once kilómetros o'uy. <sup>14</sup>Huahua'a' on'batia'pakonhua'po aya'da huaboa'da on'tiahuayme'nig aya'da on'peeme'nig aya'da Jesústaj o'nogkame'nig aya'da on'batia'pakonhua'po, <sup>15</sup>e'batia'pakde'te Jesúsna o'bata'dea'po kenoka' kenomeyere on'hua'epo. <sup>16</sup>Jesústaj on'tiahuaynig'a ken Jesús o'e no<sup>o</sup>pehue' o'ne'uy. Kenpa' Diosa o'paknok okiehue'dik o'ne'uyate.

<sup>17</sup>Botta' huanigpeika'eritaj —¿Huahua'a' kate'taj mo'batia'pakonyak? ¿Mena'po sue' mo'e? —Jesúsna o'mana'nok,

<sup>18</sup>—Kenda huaboa'da Jesústaj o'nogkame' Jerusalényo huaboa'da o'nogkame' aya'ada aratbut on'no<sup>o</sup>pe. O'na Jerusalényo i'ika'nig'a menpa' onyo'da no<sup>o</sup>pehue' i'e. —Nogtiada Jesústaj ona'uyate. Ke'nen huadik Cleofas o'uy.

<sup>19</sup>—¿Kate yagkame'? —Jesúsna o'mana'uyate.

—Kenda Jesús Nazareteritaj o'nogkame'. Jesús Diosen huamanbatia'pakeri o'epo huakka'tada o'bayarea'uy kenpa'ti ihua'da oa'ika'uy. Kenda Diosa daka'da o'no<sup>o</sup>pe. Konigti aya' aratbutere Jesúsna huadakda o'kika' on'no<sup>o</sup>pe'nig'a <sup>20</sup>oro'omeyen sacerdote huairia kenpa'ti judío huairia Romano gobierno huairitaj on'yokme'. Hueypa cruzte kan'arake'po on'yokme'. <sup>21</sup>Jesúsna Romano gobierno huairitaj ya'maenapetpi'. Romano sorotataj ya'maenapetpi'. Oro'omeyen Israel aratbuttaj o'batihuapokapo oro'omeya' o'no<sup>o</sup>pe'nig'a. Jesús o'bueyme'nig bapa' huame'noe o'tipokde. <sup>22</sup>Kenpa'ti oro'omeyere sue'da ettone' oro'taj on'mame'puke'po konigepo sikyoedda kubarakyo on'hua'. <sup>23</sup>Jesús en buey huahuayhue' o'nepo on'kumejdepo “Diosen huata'moneritaj o'tiahuay.

Jesús o'noe, mona'ne." Ettone'a on'batia'pak. <sup>24</sup>A'timon nogomey oro'omeyere o'nika'po on'hua', kubarakyo on'hua'. Konigti ettone'a on'batia'pak on'huahuaynig'a Jesústaj tiahuahue' o'neate. —Jesústaj o'nona'uyate.

<sup>25</sup>—Nopoenkahue'da mo'e. Ijhue'ta'da moknopoe. Aya'da Diosen huamanbatia'pakeria e'mana'uytada ijhue'ta'da moknopoe. <sup>26</sup>Cristo 'uruda o'e. 'Urua'da o'kika'uy. Aya'ada on'batia'pakapo. Huakkuruda Cristo pa'i'da nopo'e'dik o'e. —Jesúsa botta'taj o'mana'uyate.

<sup>27</sup>Moisésenba' Cristotaj o'batia'pak, konig Cristo o'e'apo kenpa'ti kenda Cristo o'ka'apo o'batia'pakpo kenpa'ti Diosen huamanbatia'pakeri Cristotaj o'batia'paknok Jesúsa huakkuru Moisésenba' Cristotaj e'batia'pakte o'manopo'e'a'po. Kenpa'ti Cristotaj e'batia'pakte Diosen huamanbatia'pakeriomey ona'uyate Jesúsa o'manopo'e'a'uyate.

<sup>28</sup>Emaús huakka' jakyo onhua'po o'nokyedepo, Jesús yapokonapetdapi' o'hua'nig.

<sup>29</sup>—Keje' huahue' yae'. Oro'en jakyo yaksik. Osikde. Sikkirega' o'ede. —Jesústaj daka'da o'nona'po.

Ken Jesús keyo jaksikya'po o'kore'uyate. <sup>30</sup>Kutopate botta'taj Jesús onteteyo' o'bata'huaddepo pan o'badapdo "Dakiti, Dios," oa'depo o'posakea'depo o'bayoke'uyate.

<sup>31</sup>Huaboa'da Jesústaj o'nokie'de. Jesús o'e on'nopoenenok onte'ti Jesústaj tiahuahue'dik o'nuyate.

<sup>32</sup>—Dagte e'tiakte Jesúsere e'tiakte Jesús Apagba'taj mo'nopoenka'depo oro'ennopo' diga' o'nopo'durugpak. —Huayahuaya on'batia'pakuyate.

<sup>33</sup>Ken ijhuiti ehue' jakya' o'norokonpo Jerusalényo on'kumejpo Jerusalényo once

huanigpeika'eri nogomeyere onteteyo' on'bahuahuayato'po,

<sup>34</sup>—Jesús Huairi o'noyhuadate, buttida o'ay. Simónakon Huairitaj o'tiahuahuate. —Botta'a on'mana'uyate.

<sup>35</sup>Konig dagte on'hua'po Jesúsere on'batia'pakpo kenpa'ti konig jakyo kutopata' pan e'posakea'te Jesústaj huaboa'da o'nokie'po, kenda on'batia'pakuyate.

**Huanigpeika'eriomeytaj Jesúsa o'manokyon'uyate.**

(Mt. 28.16-20; Mr. 16.14-18; Jn. 20.19-23)

<sup>36</sup>Kenda botta'a en'batia'pakte Jesús huaboa'da o'manokyondepo kenomeyere onteteyo' o'batobopo, —Yan'manopo'noey'. Mame'pukhue' yane'. —Jesúsa o'bopo o'mana'uyate.

<sup>37</sup>Ken huakka'nada on'me'pukpo o'mididpo nokiregtaj o'tiahuahy nama'da on'nopo'enok.

<sup>38</sup>—Me'pukhue' yane'. Do Jesús ijjeý opuden huanopoya' daka' menoknopoe'. <sup>39</sup>Do'hued huaba'taj daka' men'tiahuahy'. Do'hued hua'itakon men'tiahuahy'. Jesúsda do ijjeý. Do'taj men'so'toea'. Kenpa'ti do'taj men'tiahuahy'. Nokiregnayo huaen huaay' toehue' o'nika'. Donayo huaen huaay' ijtoey konigda do'taj on'tiahuahy. —Jesúsa o'mana'uy.

<sup>40</sup>Kenda Jesúsa o'mana'depo ke'nen huaba' o'batiahuahy'ea'po ke'nen hua'i o'batiahuahy'ea'uyate. <sup>41</sup>On'durugpakpo kenpa'ti on'me'pukpo oknopoe'hued o'nenok.

—¿Aypo menpa' ya'e? —Jesúsa huanigpeika'eritaj o'mana'uyate.

<sup>42</sup>Ken biig e'tiaya' on'yokpo ai'moro'huekon on'yoknok

<sup>43</sup>Jesús o'toe'po o'bape'uyate. Huanigpeika'eriomey Jesústaj e'bape'te on'tiahuahy'uyate.

<sup>44</sup>—E'mana' beroba'te Apagba'te aya' Moisés do'taj be'timadoya'uyate.

Aya'da huamanbatia'pakeria do'taj mentimadoya'uyate. David salmos Apagba'te do'taj be'timadoya'uyate. Kenda ka'dik ijika'po ijikika'uy. Kenda ogka'dik me'nepo me'nogka'uyne. Bueyhued opudomeyere ijika'uy. Kenda menogka'apone opudomeytaj daka' o'nona'ika'uyne. —Jesúsa huanigpeika'eriomeytaj o'mana'uyate.

<sup>45</sup>Kenoka' o'manopoenka'po kenda Apagba'te Jesústaj on'timadoya'uyate Jesúsa huanigpeika'eriomeytaj o'manopoenka'po,

<sup>46</sup>—Apagba'te on'timadoya'po, Cristo bueydik o'eapo. Bapa'a' huame'noete noyhuaddik o'eapo. Kubarakya' noyhuaddik o'eapo.

<sup>47</sup>Huakkuru Jerusalén aratbuttaj huadak hua'a manbatia'pakdik yanikati'. Nogok aya'tada aratbuttaj aya' huadaribayo huadak hua'a manbatia'pakonhuahua'dik yanika'. Diosa bekkahue'po manopo'korea'dik yane'. Mana'dik mo'eapone. Apagba'te kenpa' on'timadoya'uyate. <sup>48</sup>Opudomey aya'da bo'tiahuayikame'ne. Kenda aya'tada mo'manbatia'pakapone.

<sup>49</sup>Eya'. Konig Apag Diosa o'mana'uyate, opudomeytaj Diosen Nokireg do'hua o'nigta'mona'apone. Diosen Nokireg tiakhued oy Jerusalényo yan'nigika'. Diosen Nokiregtaj yan'nigikati'. Diosen Nokirega opudomeytaj e'nopo'toede'te konig Diosya' teyda mo'edeapet. Daka' manbatia'pakika'dik mo'ika'apone. —Jesúsa huanigpeika'eriomeytaj o'mana'uyate.

**Kurudyo Jesús o'behuikuyate.**

(Mr. 16.19-20)

<sup>50</sup>Ken Jerusalénya' o'orokonpo Betaniayo o'batohua'po huanigpeika'eriomeytaj o'batohua'uyate. O'ba'tepo, “Do'hued huanigpeika'eriomeytaj 'urua'da yamatog', Apag Dios.” O'tiona'pakondepo, <sup>51</sup>kurudyo Diosa o'baktobehuikuyate. <sup>52</sup>Jesús huadaknada o'e. 'Urua'da o'kika'. Diosen Huasi'po o'e. On'batia'pakdepo durugnanada Jerusalényo on'kume'uyate. <sup>53</sup>Diosen jakyo o'nika'po Dios 'urua'da o'e. Dios huadakda o'e. On'batia'pakika'uyate, ken.